



胤

滌

二

谿

夔

贛

雅則表在當時本與楊萬里陸游范成大並駕齊驅今三家之集皆有完本而表集獨湮沒不存蓋文章傳不傳亦有幸不幸焉然卽今所存諸詩觀之殘章斷簡尙足與三家抗行以少見珍彌增寶惜又烏可以殘賸棄歟

宋南渡後以詩齊名者四家楊廷秀詩所稱尤蕭范陸是已千巖詩學于曾幾吉甫授之姜夔堯章當時劉潛父許爲誠齋敵手而方萬里謂其詩苦硬頓挫而極其工使不早死雖誠齋猶出其下蓋爲詩家矜許若是顧其詩曾刊于永州歲久散失而尤公梁谿集五十卷公之孫藻鋟木新安焚于兵火故范陸詩盛行而尤公之作流傳者寡蕭特僅見其數首而已後之論者遂易之曰尤楊范陸於是蕭愈湮晦至有不能舉其姓氏者翰林檢討西堂先生自梁谿徙吳實文簡裔孫慮公之詩文罕傳于世乃鈔撮其僅存者爲二卷鏤板行之屬其同年友秀水朱彝尊爲之序予因撫其大略書之簡端蕭西江人諱德藻字東夫別字千巖潛父稱其詠梅絕句有云湘妃危立凍蛟背海月冷挂珊瑚枝又云百千年蘚著枯樹一兩點花供老枝造句奇崛洵足與文簡公梁谿西畔小橋東之作並傳者也

梁谿遺藁目錄

○卷之一

詩

君子堂

節愛堂

凝思堂

樂山堂

匿峰亭

駐日亭

己亥元日

次韻德翁苦雨

梅

和渭叟梅花

梅花

蠟梅

次韻尹明梅花

梅花二首

落梅此詩一作瑞鷓鴣詞

入春半月未有梅花

德翁有詩再用前韻三首

次韻渭叟蠟梅

雪

甲午春前得雪三首

正月二十八日夜大雪

別李德翁

別林景思

送朱晦庵南歸

送提舉楊大監解組西歸

送吳待制帥襄陽二首

海棠

玉簪花一名鷺鸞

拄杖

劉屯田墓壯節亭

送趙子直帥蜀得須字二首

庚子歲除前一日游茅山

游張公洞并序

題雲海亭

青山寺

聽鶯閣

米敷文瀟湘圖二首

重登斗野亭詩

○卷之二

文

大行太上皇帝廟號疏二首

獻皇太子書

論賀正使不當卻疏

臨海縣重建縣治記

節愛堂記

霞起堂記

玉霄亭柱記

報恩光孝寺僧堂記

雪巢記

雪巢小集序

思賢堂三贊

畢文簡公

元章簡公

章郇公

刑部郎官題名記

跋蘭亭八首

朱逢年詩集序

與吳斗南書

米敷文瀟湘跋

光緒丙申武進盛氏思惠齋刊臨桂況周儀陽湖吳文郁江寧馬長儒全校

梁谿遺藁卷一

無錫尤表延之

詩

君子堂

堂堂文簡公一世夔與皋君子哉若人此言聖所褒遺愛在斯民
誰能薦牲牢獨有坐嘯地清風仰彌高
陳者卿赤城志云太平興國三年畢文簡公士安來守郡真宗有君子人之稱堂以是名

節愛堂

誰憐窮山民糠粒不自贍紛紛死溝壑往往困征斂夫惟節與愛
是謂仁且儉揭茲聖人言聊用自鍼砭
陳者卿云節愛堂在君子尤守更今名

凝思堂

失脚墜塵網牒訴擾我懷公庭了官事時來坐幽齋天風肅泠泠
山鳥鳴啾啾我思在何許獨對蒼然崖
陳者卿云凝思堂淳熙四年尤守建

樂山堂

草堂有遺基榛莽歲月久我來始經葺挹翠開戶牖羣山供笑傲
萬象皆奔走所以名樂山欲企仁者壽

陳耆卿云樂山堂淳熙三年尤守建

匿峰亭

小亭在山背不見山巍巍但見四面風輻湊朝宗之深藏固甚智
自牧甘處卑一謙受四益是以能不危

陳耆卿云匿峰亭淳熙四年尤守建取孫綽賦匿峰

千嶺之句

駐日亭

攀梯上甃級小憩得危亭一覽盡寥廓四山聳寒青浩若凌太虛

以上見陳耆卿赤城志

己亥元日

玉曆均調歲啟端東風又逐斗杓還蕭條門巷經過少老病腰肢
拜起難白髮但能欺槁項青春不解駐朱顏餘齡有幾仍多幸占
得山林一味閒

次韻德翁苦雨

十年江國水如淫怕見三秋雨作霖可念田家妨卒歲須煩風伯
蕩層陰禾頭昨夜憂生耳木德何時卻守心兀坐書窗詩作祟寒
蟲鳴咽伴愁吟

梅

不奈雪埋照可堪風漏香天寒無疹粟日暮有嚴妝桃李真肥婢
松筠共老蒼合教居第一獨自占年芳

和渭叟梅花

不避風霜苦自甘邱壑潛未禁沾額角信好插梳尖春意已張本
寒威今解嚴殷勤畱客意尙許隔牆覘

梅花

冷豔天然白寒香分外清稍驚春色早又喚客愁生待索巡簷笑
嫌聞出塞聲園林多少樹見爾眼偏明

蠟梅

破臘驚春意凌寒試晚妝應嫌脂粉白故染麴塵黃綴樹蜂懸室

排箏雁著行團酥與凝蠟難學是生香

次韻尹明梅花

江北江南天未春陽和先已到孤根斜枝冷落溪頭路瘦影扶疏
竹外村水部未妨時遣興玉妃誰復與招魂天寒好伴羅浮醉明
月清風許重論

梅花二首

竹外籬邊一樹斜可憐芳意自萌芽也知春到先舒葉又被寒欺
不放花索笑幾回驚歲晚相思一夜繞天涯直須待得垂垂發
月相攜過酒家

冷蘂疏枝半不禁眼看芳信日駸駸雪霜不管朝天面風月能知
匪石心望遠可無南北使客愁空費短長吟年年準擬花排恨不
道看花恨更深

落梅

此詩一作瑞鵬鵠詞

梁谿西畔小橋東落月紛紛水映空五夜客愁花片裏一年春事

角聲中歌殘玉樹人何在舞破山香曲未終卻憶孤山醉歸路馬
蹏晴雪襯東風

入春半月未有梅花

枯樹扶疏水滿池攀翻未見玉團枝應羞無雪教誰伴未肯先春
獨探支幾度杖藜貪看早一年芳信未開遲畱連東閣空愁絕只
誤何郎作好詩

德翁有詩再用前韻三首

文章仙伯記仇池每想橫斜竹外枝未放柔柯攢玉雪稍看紅蒂
染燕支別來望遠憑誰寄老去尋春只恐遲把酒問花花解語定
應催促要新詩

立馬黃昏繞曲池幾回蹋雪問南枝不應春到花猶未定恐寒侵
力不支隴上已驚傳信晚尊前只想弄妝遲臨風不語空歸去獨
立無慘自詠詩

嘗記尋芳到習池攀條頻認去年枝曉穿曲徑千林去晚度危橋

一木支不避春寒來得得只緣人望故遲遲無錢可辦羅浮醉報
答春光只有詩

次韻渭叟蠟梅

快瀉鶯黃若下春要將香色鬪清珍蠟丸暗坼東君信
梳貌寧欺我輩人光價未輸何遜早詩篇早見豫章新
渾金璞玉爭多少要與江梅作近親

雪

睡覺不知雪但驚窗戶明飛花厚一尺和月照三更草木淺深白
邱塍高下平飢民莫咨怨第一念邊兵

甲午春前得雪三首

寒聲昨夜響蕭蕭逗曉階前亦已消殘臘距春無幾日一年飛雪
只今朝微陽欲動梅驚萼餘潤纔沾麥放苗天意未能違物意漫
畱殘白占山腰

飛翼回旋逐風飄爽氣令人意欲消在苒流年春送臘殷勤密雪

暮連朝冬回庾嶺花無數煙煖藍田玉有苗一飽自今真可望更
看南畝麥齊腰

凍雲排陣擁山椒待伴還應不肯消皎月冰壺千頃夜冷煙茅屋
幾家朝梅枝堆亞難尋萼萱草侵凌不辨苗殘甲敗鱗隨處是被
誰敲折玉龍腰

正月二十八日夜大雪

一冬無雪潤田疇渴井泉源凍不流昨夜忽飛三尺雪今年預兆
十分秋占時父老應先喜忍凍飢民莫漫愁晴色已回春氣候晚
風搖綠看來牟

別李德翁

長恨古人少斯人今古人二難俱益友兩載覺情親世態深難測
心期久益真相看俱半百此別倍酸辛

別林景思

二年無德及斯民獨喜從游得此君囊之一錢窮到骨胸蟠千古

氣凌雲論文卻恨相逢晚別袂真成不忍分後夜相思眇空闊尺
書應許雁知聞

送朱晦庵南歸

二年摩手撫瘡痍恩與廬山五老齊合侍玉皇香案側卻持華節
大江西鼎新白鹿諸生學築就長虹萬丈隄待哺飢民偏戀德老
翁猶作小兒嘯

送提舉楊大監解組西歸

征轅已動不容攀回首棠陰蔽芾閒爲郡不知歌舞樂憂民贏得
鬢毛斑澄清未展須持節注想方深合賜環從此相思隔煙水夢
魂飛不到螺山

送吳待制帥襄陽二首

方持紫橐待西清忽領雄藩向暑行誰謂風流貴公子甘爲辛苦
一書生詞源筆下三千牘武庫胸中十萬兵從此君王寶北顧山
南東道得長城

欲將盤錯試餘鋒故擁旗麾訖外庸南峴北津形勝地前羊後杜
昔賢蹤不妨倒載同民樂自有輕裘折鹵衝努力功名歸報國莫
思山月與林鐘

海棠

兩株芳蘂傍池陰一笑嫣然抵萬金火齊照林光灼灼彤霞射水
影沈沈曉妝無力燕支重春醉方酣酒暈深定自格高難著句不
應工部總無心

玉簪花一名鷺鷥

一種幽花迥出塵孤高恥逐豔陽辰瑤枝巧插青鸞扇玉蘂斜敲
白鷺巾難與松筠爭歲晚也同葵藿趁時新西風昨夜驚庭綠滿
院清香惱殺人

拄杖

久矣相隨若弟昆周旋險阻可須論斷橋測水露半影野路搗泥
畱亂痕癡坐自憐今日懶顛持敢忘昔年恩得君分付吾何恨休

向林閒打睡門

劉屯田墓壯節亭

西澗當年卜考槃便於神武挂衣冠後生無復知前輩故老猶能說長官三尺荒墳埋玉冷百年壯節倚天寒表章賴有羣賢力誰把生芻奠酒盤

送趙子直帥蜀得須字二首

射策當年首漢儒去登雲路只斯須飽聞治最誇閩郡已有先聲到益都壯略定羌元自許宗英帥蜀舊來無前驅叱馭休辭遠看取東歸上政塗

帝念西南在一隅簡求才德應時須羌夷種落誇威令秦隴關河聽指呼自古功名多少壯及今談笑定規模玉山舊政人誰記應掃棠陰看畫圖

以上見方回瀛奎律髓

庚子歲除前一日游茅山

犯寒出行邁值此歲云除剛風駕颿輪送我游清都華陽第八天

仙聖之所居洞門劣容人中寬如室廬橫前大谿水於焉限塵區其右萬石林錯落空翠圖茅庵著深秀細路緣崎嶇幽泉見客喜頗亦類逃虛山深日易曠捷徑趨元符琳宮照金碧天籟鳴笙竽側睨白雲峰前瞻赤沙湖金壇聳百丈陰洞通七塗俯視人閒世擾擾眞蟲蛆早以穴陋質忝分赤城符豈悟夙昔緣復造神霄墟平生夢寐處恍若登華胥歸來拜綠章足力尙有餘珍館十六所安能徧邀娛窮探恨不盡太息仍躊躇

游張公洞

并序

見劉大彬茅山志

舟次湖汛侍季父伯兄游洞靈步行五里夾道皆喬木參天鶴巢其上若笑若咳澗水瀲灩鳴聲甚悲殆不類人閒也入洞靈宮覽前賢畱題徘徊久之由石徑里許達于洞洞深數十丈磴道險絕俯僂僅可下下寬廣容數百人大石離立或下聳欲落若劔盾矛戟相撐拄或蕘連崛起而不斷若虎豹蹲伏俯踞而拏攫中有小門持炬乃得入丹竈井田在焉由石罅而上皆流

石怪形無窮其狀旁行屈曲蓋深遠不可到其陽有懸崖滴乳
水水流澗谷乍細乍大自成宮商橫澗得小閣可憩朱藤纏絡
崖上丹花簌簌下墜芬芳襲人毛髮凜然欲少畱而大風作遂
歸余游山川多矣茲游最可紀因成五百字貽我同志以備他
日觀覽焉

吾聞荆漢南有地仙所宅十年勞夢想今日著腳歷扁舟下湖泐
水漲沒沙磧結纜小橋旁杖藜從此適平岡面陂陀疊嶂堆巖積
行行三兩里夾道喬木植其木幾合抱其高乃千尺風生萬壑響
日照四山赤時搖樹林杪忽見屋宇脊宮門何崢嶸古道頗脩直
長廊景曠曠崩殿人寂寂寥落昔賢題摩挲壁閒墨捫蘿上層巔
俯瞰得深窟危梯交枝撐鳥道穿詰屈投身乍寬閒跼步仍逼窄
攀援愁顛躋傲睨驚險僻懸崖朵頤頷亂石供劔戟白雲何時橫
乳溢或自滴中空正瀕洞了不見天隙冥行迷近遠偃僂猶擿埴
巉巖豈人工隱軫入地脈窮幽或篝火俯跪僅容席仙壇尙故處

丹竈儼遺跡山蟲鳴咿嘓野鼠聲噴暗傳聞老父語以往真莫測
中有白玉堂橫絕巨石塞傍連洞庭野欲去不可極潛窺目先旋
縱走膝無力迢迢步西徑突兀出峭壁樅風高枝膠藤蔓青陰冪
芳草何芊緜丹花亦狼籍躊躇古亭上頰仰幽澗碧玳瑁下流水
磊砢欲落石雖云培塿高氣與嵩華敵其南有空穴澹瀕殷幽黑
陰風牙吞吐冷氣森噴逼蛟龍久伏藏金玉閱簡冊靈蹤信茫昧
幻怪紛慘戚將無神物守欲與世壤隔平生邱壑念早歲泉石癖
豈不思三山所恨無六翮樂哉茲辰游逸興潛有激仙翁在何許
綠髮尙如昔髣髴笙簫聲徘徊鸞鶴翼俗緣磨不盡夢境坐形役
何階築衡茅幽時窮日夕風雲西北起天地忽改色倉皇促歸舟
造物豈戲劇良游易乖忤眞賞難再得寄語山中人重來儻相識

見沈敕荆溪外紀

題雲海亭

亭前山色繞危闌亭下波濤直浸山波上漁舟亭上屋相看渾在

畫圖間見咸淳
毘陵志

青山寺

崢嶸樓閣插天開門外湖山翠作堆蕩漾煙波迷澤國空濛雲氣
認蓬萊香銷龍象輝金碧雨過麒麟駁翠苔二十九年不到此一
生知有幾回來

聽鶯閣

春催金谷曉一望百花齊不作遼西夢從渠著意唬以上見無
錫新志

米敷文瀟湘圖二首

萬里江天杳靄一村煙樹微茫只欠孤篷聽雨恍如身在瀟湘
淡淡曉山橫霧茫茫遠水平沙安得綠蓑青笠往來汎宅浮家

淳熙辛丑中春十八日一作仲夏
十六日梁谿尤袤觀于秋浦

重登斗野亭詩二首

野色涵空闊平蕪接渺瀰江淮天設險星斗地分維喬木千年意
滄波萬古悲老僧尤好事見在索題詩

豪傑舊游處此亭名亦俱淒涼謝公堰浩蕩董家湖陳迹成興廢
遺篇今有無登臨何限恨搔首獨長吁以上見揚
州府志

梁谿遺藁卷一

梁谿遺藁卷二

文

大行太上皇帝廟號疏二首

臣等竊惟宗廟之制祖有功而宗有德創業垂統功莫大焉繼體守文德莫懋焉藝祖皇帝規創大業爲宋太祖太宗皇帝混一區夏爲宋太宗自眞宗至于欽宗聖聖相傳廟制一定萬世莫易仰惟大行太上皇帝宏濟多難紹開中興功德兼隆上比太祖陛下孝思罔極求所以盡尊親之意稱祖立廟有何不可然在禮子爲父屈示有尊也子雖齊聖不先父食大行太上皇帝親爲徽宗之子子爲祖而父爲宗則難以正尊卑昭穆之序今議者不過以光武爲比太上皇帝中興大業雖與光武同然漢自高祖至于平帝國統中絕光武以長沙王之後起布衣之中不與哀平相爲繼承其稱祖無嫌一也漢制每帝卽位輒立一廟不列昭穆故明帝更爲光武立廟號爲世祖廟蓋不與高祖爲一其稱祖無嫌二也大

行太上皇帝功德盛大禮當尊崇然實繼徽宗之正統以子繼父非若光武比也本朝參稽三代之制列昭穆于太廟非若漢世可更為廟也仰惟大行太上皇帝孝悌之至冠于百王將來祔廟若在父廟之下而稱祖竊恐在天之靈有所不安若更為廟如東漢則於國朝之制豈容違戾質之典禮則不合驗之人情則不順夫昭穆尊卑之序所以闕綱常係事體者甚大豈易輕變乞以臣等此章付集議所參稽禮經博采衆論施行

昔曹操朱温皆號太祖本朝太祖用之不嫌者名實所在自有定論也烈宗則劉聰楊渥僭偽之主皆嘗用之光宗雖若可用然字體太輕士庶名字多或稱之堯舜乃二帝之名唐高祖諡神堯太上皇帝尊號光堯猶曰比德于堯而又過之爾今獨取堯之一字以為廟號有所未安本朝開基中興皆在商邱國號大宋則今擬廟號獨取乎商之高宗實為有證

獻皇太子書

大權所在天下之所爭趨甚可懼也願殿下事無大小一取上旨而後行情無厚薄一付衆議而後定且利害之端常伏于思慮之所不到疑閒之萌每開于隄防之所不及儲副之位止於侍膳問安不交外事撫軍監國自漢至今多出權宜事權不一動有觸礙乞候祔廟之後便行懇辭以彰殿下之令德

論賀正使不當卻疏

祖宗以來雖喪制未有不引見使亦無不受禮物之文前朝諸臣豈不知不當受而所以不免從權者以為既已通好不當無事而使之疑也況元日朝會俱罷初無賀儀幣物所以將書亦非慶禮萬一使客必欲如禮而去則徒為紛紛在禮有反經而從權者正為是也臣等以為當受

時賀正使至帝以在喪服中禮物當受與否令禮官詳議公與宇文价顏師魯倪思

黃元章張體上疏以上見

李心傳建炎以來朝野雜紀

臨海縣重建縣治記

乾道癸巳秋九月臨海居民不戒于火濫爛扇延以及縣治燔熱

俱盡當官者因陋就簡僅能建三椽於煨燼之中以聽獄訟吏民無所託足案牘無所棲列一遇風雨則沾漬暴露叫呼謹叟訟牒計簿散匿吏胥之家最易甲乙莫可質考縣日以不理後三年予來爲州有意興之而無與任其責者淳熙丁酉秋永嘉彭君仲剛來主縣事予聞彭君舊矣心固望其有爲彭乃言曰夫環百里之地而爲之長聚萬室之衆而聽其令民社所寄視古子男治必有所一邑之條教於是乎出而司存弗備亡以施政廢之當舉舍此孰先然後役大用夥非受命于郡則令不得擅敢以爲請予乃昇錢三十萬使營度之是冬予罷官歸踰年則彭以書來告成矣外爲重門以嚴啟閉上建層樓以斂敕書治事有廳燕居有室翼以脩廊挾以外廡吏直賓次環列有序奧者爲藏爽者爲獄爲亭於大門之外以班詔令爲閣於東廡之上以藏案牘爲堂爲齋爲軒以備宴休游息之地下至於庖湏之所微至於什器之末雜至於丹雘登覽之事纖悉畢具規撫堅壯工用精密總爲屋八十有一楹

中鑿五池瀦水爲備復以其餘力建丞簿之舍而新社稷之壇鄉之荆榛瓦礫之場今乃爲高明宏麗之觀民始識有官府之嚴而稱其所以爲邑大夫之居者問其經費之所出則曰未嘗巧取而奇斂也凡財之隱於吏而亡籍木之訟於官而願獻者悉取而拘之鉤校畸贏積累銖寸故費廣而不闕問其工役之次第則曰未嘗厲民而強使也籍境內之爲工者若干官出餽庸率如其私之直居處飲食先爲規畫使極安便率旬有五日而迭休之其用夫止及於附邑之三鄉家止一人人役三日番無過十夫而亦與之庸省督工程無苟簡怠惰之患謹視給散無稽畱腴削之弊民之與官爲市爲役者若私家然故役大而不擾蓋經始于丁酉之冬而落成於己亥之秋問其所以久則曰不敢倉卒而趣辦也作於農隙而弗奪其時休其力而弗盡其用慰諭其勤而策其不勉民咸勸趨故功力而不勞夫聚財有方用民有節舉事有漸顧何往而不濟哉予嘗謂今之士莫難於爲邑弱者不足以有爲而健者

或以病民幸而得強弱之中則積負困之姦民撓之欲興事造業
有其志而不克成者多矣又幸而不爲積負之所困姦民之所撓
而在上者或不察不得自展其才者亦多矣當君之始至賦亂政
庖隱戶移稅弗可究詰乃考質劑而正疆理逋租匿役披露首服
吏姦民瘼檢柅濟理田野歡呼訟日以簡故能不困於積負不撓
於姦民不抑於當路而興舊起廢不擾而集非庶幾於古之所謂
循吏者乎夫哀聚羸羨於單乏之餘可以觀儉謹用民力於偏仄
之中可以觀仁積累工役於遲久之後可以觀智是皆足以爲吏
法而不可使之無傳予旣嘉彭君之有成而因其請故遂著其實
使後之人得以考而法之非以諭彭君也

節愛堂記

過靜鎮堂之左少南爲方池並池而南牆壁障礙敗屋傾敝公廚
以積醪醴問諸故老曰此昔之燕豫堂也池舊有橋橫縱齊度其
東爲草堂今皆毀撤後人因基築臺以望月其下枕池爲小閣名

曰清平臺庫且隘不快登覽人跡罕至亦漸頽圯余旣徙臺於參
雲亭之後榜曰匿峰以望北山平夷舊基更作堂曰樂山以望西
山之秀而池光山色且蔽於閣而不得見也迺徙閣於池之南因
燕豫堂之基別爲堂曰節愛取節用愛人之義旁爲夾廊而上與
樂山堂通池之北石崖盤踞土壤所壅疏剔理脈發露呈顯如枕
股膊如覆困廩如鼃之背負土而出西望連岡疊嶂閒厠隱顯
如擁鬢髻如展旌旆如風檣陣馬排闥而入其南則怡嶺二峰角
立朋秀若偉丈夫冠劍而坐雙塔亭亭影插天半於是仰山俯池
遠樹近石環列先後若相拱揖煙消日出層樓飛閣浮虛跨空如
展圖畫如望蓬萊之雲氣也夫昔人經始莫不相山川之宜度面
勢之便其所建立如紀綱法度井井然悉有條理一定而不可易
後人見其敝而不能復也始出己意變更之易其東則西廢撤其
左而右病遂使昔之勝概日就湮沒今余非能有所增創也大抵
無改前規無廢後觀便覺天宇開明巖壑增秀林木水鳥皆有喜

色而後知昔人之規模可因而不可變也爰刻諸石以識顛末尙告來者嗣有葺焉始欲跨池爲橋仍其舊池上有老梅惜不忍伐遂不復作

霞起堂記

雙巖堂踞兩崖之間獨得地勝其下面牆廣不尋丈擁蔽心目不快人意予首闢之牆之外糞壤所滯乃墾乃夷爲舊址焉撤廢亭於射圃移植其上榜曰凝思取孫興公賦所謂凝思幽巖者也亭之前有敗屋數椽東向西上椽棟撓折隅奧庫仄乃改創爲堂三楹南鄉與靜鎮堂相直因名曰霞起由雙巖而望靜鎮直若引繩其外繞以迴廊上連參雲以爲風雨游觀之備爰植美竹以經緯之於是堂成而勝益奇前所未睹披豁呈露天若開而明地若廣而敞景物若增益而富晨煙夕霏萬化千變近峰遠嶺閒見層出皆可不出簷廡而盡得之噫是亦足以廣心志蕩塵垢而非苟以爲娛也惟此邦靈山所宅昔號勝處自經大旱遂成陋邦而山川

之秀不異今昔或謂予當單乏之際顧爲此不急之務然取材於舊課工於卒不市一木不役一民而使隘者敞窒者通弊者新則亦何害於政哉第廢材不足以支久尙能十稔若其革而鼎之以俟後之君子始役於淳熙三年正月己未成於二月壬午

玉霄亭柱記

台州南西北三面逼山獨東望諸峰差遠雲煙空濛外際溟海蓬萊方丈想見其處舊有小亭在子城之上紹興丁卯南豐曾使君欲父創建更名玉霄距今三十年推敗傾圮岌業欲壓其下昔有茂林脩竹今皆翦伐錯爲居民溷圍羅列污穢喧囂游者歎息余乃披荆蠲疏載芟載除四爲繚牆以限外塗下建石柱上跨飛閣出亭之外又有六尺凡楹棟榱桷之朽撓疊瓴級甃之缺折丹黃粉漆之侈剝皆易而新之方連周陡可倚可眺晨揖灑氣夕延素月山川城郭盡在几席之下凭闌四望巒嶂環繞手揮絲桐目送飛鴻飄飄乎如乘雲御風身在物表州之宴游於是爲勝乃刻亭

柱以紀歲月云

報恩光孝寺僧堂記

淳熙三年秋九月故參政觀文錢公施其私財於台州報恩光孝禪寺復建僧堂明年九月十二日經始後十五日而公薨又明年六月二日堂成中爲大屋七間高七尋其廣四十有二尺其深十尋前列脩廊後布廣廡其楹高與廣皆如其堂之數而崇深殺之貫三挾廊爲二井區凡爲屋之楹大小二十有四規樞雄壯悉倍於舊公之孫承議郎前知處州軍州事象祖題其榜曰選佛台道俗以落之又明年長老惟禪命其徒了性持書求之於錫山尤袤而記之曰天台爲邦仙聖所游佛法之盛冠于東州有大叢林舊名景德衆妙莊嚴近在城域政和之初賜額天寧紹興之閒始易今名是爲祐陵邀福之地列屋千楹有衆萬指乾道癸巳鬱攸扇災佛壁穹堂化爲飛灰時大比丘德光長老立志堅忍誓必再造乃汎扁舟浮海而南持鉢于泉半載乃還憔悴辛勤寸累銖積乃

建衆寮乃營丈室規創後壁架虛鑿空商工度材施者景從惟光之名進于帝聽有詔自天命主靈隱表時假守睹是勝因求繼光後實難其人萬口一詞曰有權可乃屈致之權不拒我於煨燼中啟大法筵遠近皈依輻輳駢闐寶壑迄成於從空墮權未嘗爲不起于坐有大檀施觀文公錢與是比丘有大因緣私自念言安聚衲子以有伽藍爲一大事尊師所在龍象駿奔四方學徒其來如雲而此僧堂獨未建立起寺之廢莫此爲急我當布施爲衆萬先捐三百萬於指顧閒公之視財如視壤土我無所施隨取而予權之受施如谷遇風我無所受有來則容權謂其徒監寺了性汝敏而勤命總其政性亦受令犇走後先陶瓦成山伐木蔽川權來權藏四衆嗟惜予邀惟禪嗣其法席禪之始來衆曰難哉禪來一年衆志允諧巧者獻伎壯者出力涓日充徒並舉百役乃立斯堂其大七楹高廣深邃寒溫暑清前榮後廡兩倍其數寢食有位宴息有所偉哉斯堂肇自錢公不逮其成而公已終惟公有孫銜訓嗣

事爰飾几榻至于塗墍齋鼓粥魚隱隱隆隆攝齊升堂肅肅雍雍
舊觀復還百廢具舉如贖得聽若瞽而睹數有成壞時有廢興法
力願力爲無不成惟三比丘與二居士往昔靈山並受佛記作此
勝事刹那頃中化瓦礫場爲梵帝宮咨汝大衆享此安逸云何脩
行報此恩德當念作者法力宏深勇猛精進無起退心當念施者
願力堅重量彼來處無妄受用惟上祖師穴處巖居今汝不然夏
屋渠渠惟上祖師行乞取足今汝不然飽飯果腹廣席連牀窗戶
明虛心境洞然萬法一如臥具巾單隨用無乏困歇飢餐莫非妙
法汝若一念證常寂光華嚴境界卽是此堂汝若不斷五欲三毒
當知此堂卽是地獄巾山崇崇與堂無窮我爲斯文相其鼓鐘

見陳耆卿
赤城志

雪巢記

吳興林君景思寓居天台城西之蕭寺破屋數椽不庇風雨榜其
燕坐之室曰雪巢日哦詩於其閒客有問君所以名巢之意君曰

天下四時之佳景宜莫如雪而幻化變滅之速亦無甚於雪者方
其凝寒立水夜氣鬩扇紛紛皓皓萬里一色瑤臺銀闕亦見於俄
頃閒然朝陽暎暎則向之所睹蕩然滅沒而不留矣自吾來居天
台時王公貴人比里而相望朱門甲第擊鐘而鼎食童顏穉齒羣
聚而嬉戲今未二十年其昔之貴者則已死向之富者或已貧而
往之少者悉已耄回視二十年直俄頃爾其幻化變滅之速不猶
愈於雪乎知其非堅實也於其俄頃起滅之中乃復顛冥於利害
交戰於寵辱汨汨至於老死而不自知非惑歟今吾以是名吾巢
且將視其虛以存吾心視其白以見吾性視其清以勵吾節視其
幻以觀吾生則知少壯之不足恃富貴之不足慕貧與賤者不足
以爲戚非特以此自警而且以警夫世之人使凡游吾之巢者躁
者可使靜險者可使平而污者可使之潔不亦休乎余聞而歎曰
浩哉斯巢雖方丈之地其視廣廈萬閒而不與易也夫樂莫樂於
富貴憂莫憂於貧賤然有馬千駟不如西山之餓夫紆朱懷金不

如陋巷之瓢飲孰知乎匹夫之樂有賢於王公大人之憂畏也哉
世之附炎之徒方思炙手權門焦頭爛額而不悔求而不得則躁
得而患失則戚戚與躁相乘則心火內焚日夜焦灼聞君之風亦
可少愧矣君少嘗從高僧問祖師西來意又於方士得養生術其
清玉潔其真行烈其窮不堪忍而其樂侃侃然余來天台始識君
一見如平生歡時方困郡事卒卒無須臾閒每從君語輒爽然自
失顧視鞭扑滿前牒訴盈几便欲捨去今得歸休林泉之下每一
思君發於夢想則雪巢之境恍然在吾目圍中矣因述君之說使
書于其壁以爲之記

雪巢小集序

余友林憲景思吳興人年少時卓犖有大志賀參政子忱奇其才
以孫女妻之臨終復與米數百斛謝不取賀既亡挈其孥居蕭寺
屢瀕于餒而不悔讀書著文不改其樂頃嘗隨賀使虜同行中後
有鼎貴者會赴大比試來都城因游西湖上新貴人于馬上覘識

之使人傳言請見亟遁去其操守如此獨喜哦詩初不鍛鍊而落
筆立就渾然天成無一語蹈襲如柔櫓晚潮上寒鐙深樹中汲水
延晚花推窗數新竹中夜鶯鶯喧誰家海船上唐人之精于詩者
不是過一時名流皆願交之若徐敦立芮國器莫子及毛平仲相
與爲莫逆其後諸公彫喪略盡君亦連蹇不偶至無屋可居無田
可耕其貧益甚其節益固而其詩益工嗚呼士患無才而有才者
困窮類若此豈發造化之祕天殆惡此耶抑嘗謂富與貴人之所
可得而才者天之所甚靳景思取天之所甚靳者多則不能兼人
之所可得固宜然則才者實致窮之具人何用有此而天亦何用
靳此此未易以理曉也君所居室名曰雪巢嘗屬余記之故其詩
若干篇自號雪巢小集云

思賢堂三贊

畢文簡公

故大丞相畢文簡公於太平興國三年以選知台州淳熙丁酉

梁集二
表假守是邦嘗立公之祠于郡學獨訪遺像未獲後三年表來
江東而公之六代孫希文爲安仁宰乃知公自台移饒饒人嘗
繪像于廟遂摹得之以寄今沈使君揭示祠宇俾邦人歲歲得
蒸嘗云

瀕海出日聲教初暨勞來拊循寄乎共理勝求惟良得此君子賢
哉若人玉音嘉喟二百餘年遺風髣髴勸相我家流澤未已再拜
德容尙息貪鄙煌煌文簡照映青史

元章簡公

大參政章簡元公於慶曆六年來守是邦有功在民後一百三
十四年得其畫像於裔孫康曾繪置學宮以慰邦人歲時之思
云

玉堂之仙卒老東府燧如文章海內咸覩方其未逢出守茲土拯
民昏墊寘之安堵完城浚隍植我棟宇百六十春尙芘風雨躋彼
參雲人渺今古天空地迥遙接公語

章郇公

昭陵命相率用厚德顯允郇公其儀不忒持循法度恪守繩墨規
彼更張無異跳擲執久不行自觸牆壁使用公言治無今昔臨海

舊邦杳渺音澤厥令甘棠二五詩蹟

以上見林逢吉赤城集

刑部郎官題名記

合天下訟獄之成律令章程之事悉總於尙書刑部其輕重出入
之際人之死生繫焉責任爲不輕矣唐制刑部郎分四司曰刑部
曰都官曰比部曰司門本朝因之然止以爲階官不釐本務凡四
方以具獄來上則獻於審刑院別命朝官一員判院事至于元豐
始以審刑歸刑部官制行二十四司各正其職於是刑部始得專
其官而任益重中興以來遵承不改聖天子哀矜庶獄郎官必采
時望非明習法令更治民者弗除所以選任之意甚厚士之當是
選者可不思所以稱明指哉夫法者一成而不可變者也民僞日
滋法不能勝奇請佗比紛然雜陳于前居其任者苟非明有以察

之仁有以守之公有以行之則姦吏並緣舞文巧詆人受其害故
居官稱職每難其人而在上者尤以擇賢任職爲意歲月既久除
授不一前人名氏漫不可考淳熙十一年陳公倚錢公冲之之爲
是官也慨然興歎謀欲序次而書之石會錢公移漕畿甸乃伐石
庀工祝陳公緒成之繇紹興末得七十人屬表記其事且曰視其
名而考其歲月則其人之功行善最皆可枚數使後之居於斯者
有所警而不敢忽也乃述其大略且使知刑部之有題名自二公
始云九月望

見潛說友
臨安志

跋蘭亭八首

唐文皇既得脩禊敘命趙模諸葛貞輩臨寫當時在廷之臣競相
傳摹故流傳于世者皆可寶蘇大令自言家有五本今不知此是
第幾本也梁谿尤袤

司業汪達家藏禊敘至多內一軸首跋乃康伯可是轉摹失真爾
此本良是定武古本但定武世以斷損帶流右天四字爲真而此

獨完好然精采乃與唐人鈎摹本不異殆是定武以前未斷損者
耶乾道壬辰中秋日錫山尤袤跋

唐文皇初得此序命歐楮趙模馮承素韓道政諸葛貞等搨本以
賜羣臣故傳于世數本歐陽公集古不錄定武本謂與王沂公家
所刻不異自山谷嘉定武本以爲肥不贅肉瘦不露骨於是士大
夫爭寶之其實或肥或瘦皆有佳處此本差肥而最有精神號唐
古本或云在永興年若定武自有三本獨民間李氏本爲勝其餘
用李本再刻益瘦細矣尤袤

蘭亭舊刻此本最勝而世貴定武本特因山谷之論爾余在中祕
見唐人臨本皆肥以楊榿所藏薛道祖所題本驗之實唐古本也
而近世以此爲定武則誤矣余凡見前輩所跋定武本悉有依據
不敢臆斷其湍流帶右天五字皆損後有見余所嘗見者當自識
之難以筆舌辨也尤袤

定武蘭亭舊本在承平時已不易得薛師正之子紹彭刻他本易

去而於舊石斲損數字以惑人後以石龕置宣和殿壁渡江以來士大夫家凡得此本悉指爲定武本不但肥瘦不同而精采頓異其竹字託字宛轉處與夫字人字末筆意態橫生非他本可及比斲去本自不多見況未經薛氏所斲之本乎此本舊所拓大可貴余見蘭亭序多矣此特一二見爾淳熙丙午季夏望日尤袤延之

題王順伯第一本

唐文皇旣得脩禊序命趙模韓道政諸葛貞馮承素搨賜諸王近臣虞褚歐陽各有臨迹至今不知幾本而獨貴定武刻順伯諸本皆佳顧以字肥而不利者爲定武則與余所見特異楊稹伯時有薛道祖親籤題一本正肥云是唐古本平生所見前輩所跋定武本皆有依據一畢少董家賜本一蔣丞相家米元章諸人跋本一張文潛家王岐公跋本最後見澄江呂氏舒王所跋與此本無毫髮異其利缺處正同益信山谷所謂肥不贅肉瘦不露骨者後有識者當賞余之言淳熙四年仲春望日尤袤題順伯第二本

蘭亭敘肥不贅肉瘦不露骨如山谷語頗似定武但以越紙拓故多疑之今觀王仲言所聞殆幾是耶尤袤觀

此本有晁美叔宋次道跋爲可寶宋所書蘇公詩乃參政易簡題其家所藏唐人摹本絹素上書今藏太常博士汪遠季路家余嘗見之第二本與楊稹伯時所藏薛道祖親題正同以爲唐古本云

尤袤題

以上見桑世昌蘭亭考

朱逢年詩集序

英偉豪傑之士生亦有所自來故其亡也決不泯泯與草木同腐觀玉瀾先生之集顧不異哉夫得則喜失則悲有所不平則怨刺此詩人之情也惟深於道者不然無人而不自得先生近之先生少有軼材自負其長不肯隨俗俯仰厄窮蹇踣有人所難堪而其節愈勵其氣愈高其詩閒暇略不見悲傷憔悴之態其視富貴利達直糠粃土苴爾春風一篇雍容廣大有聖門舞雩氣象感事三篇慨然見經世之志自作挽歌詞齊得喪一死生直欲友淵明于

千載至所謂自我識興廢於天無怨尤非深于道者能如是乎嗚呼以先生之才使其作于聲詩薦之郊廟發其所蘊措諸事業何愧古人百不一售使後世所以知公者獨此數十詩而已悲夫先生有兄曰韋齋白首郎潛不究大用人以為恨其詩凌厲高古有建安七子之風韋齋之子南康使君今又以道學倡其詩源遠而流長信矣哉淳熙辛丑仲春望日

見朱棨玉瀾集

與吳斗南書

頃得呂東萊所定古易一編朱元晦為之跋當以板行乃與左右所刊呂汲公古經無毫髮異而東萊不及微仲嘗編此書豈偶然

同邪

見吳人傑周易古經

米敷文瀟湘跋

蔡天啟作米襄陽墓志言元符初進其子所畫萬里長江圖時元暉年尚少其小筆已知名當世矣方此老無恙時諸公貴人求索者日填門不勝厭苦往往多令門下士倣作而親識元暉二字于

後嘗自言遇合作處渾然天成薦為之不復相似此卷寂寞簡短不過數筆而淺深濃淡姿態橫生使人應接不暇蓋是其得意筆自其云亡畫益難得矧題識皆一時名勝之士終日把翫不能去手也淳熙辛丑二月中休梁谿尤表題

□□□□

梁谿遺藁卷二

梁谿遺藁補遺
淮民謠

東府買舟船西府買器械問儂欲何爲團結山水寨寨長過我廬
意氣甚雄麤青衫兩承局暮夜連句呼句呼且未已椎剝到雞豕
供應稍不如向前受笞箠驅東復驅西棄卻鉏與犁無錢買刀劔
典盡渾家衣去年江南荒趁熟過江北江北不可往江南歸未得
父母生我時教我學耕桑不識官府嚴安能事戎行執槍不解刺
執弓不能射團結我何爲徒勞定無益流離重流離忍凍復忍飢
誰謂天地寬一身無所依淮南喪亂後安集亦未久死者積如麻
生者能幾口荒村日西斜破屋兩三家撫摩力不給將奈此擾何

三朝北盟會編紹興三十一年金主亮傾國入寇嘗以淮南置山水寨擾民泰興令尤袤竊哀之作淮民謠

台州郡圃雜詠五首

參雲亭

昔賢已跨鶴故迹餘參雲舊德慨云遠干霄氣仍存青山宿霧卷

喬木蒼煙昏尙想來游處笙簫中夜聞

雙巖堂

兩巖鬱青蒼中有堂突兀回廊外環繞修竹布行列懸崖上幽徑
窺壁見餘碣面牆誰所築除去礙膺物

玉霄亭

青山圍郡城東望獨空遠蒼茫溟海近想像蓬萊淺朝光上遺堞
雲氣接虛巘羨門與安期鸞鶴若在眼

清平閣

舉世溷濁中誰當清見底崎嶇太行道誰貴平如砥安得□□美
如此一池水悠悠小閣□視水如此理

霞起堂

□□赤城山霞色起夜半建標自古□□□羨吟翫僊人□□□
招手若可喚彤光射胸臆三咽骨自換

台州四詩

三日霖霖已渺漫未晴三日又言乾從來說道天難做天到台州
分外難

百病瘡痍費撫摩官洪仍愧拙催科自憐鞅掌成何事贏得霜毛
一倍多

多病多愁老使君不憂風雨不憂貧三年不識東湖面枉與東湖
作主人

兩載終更過七旬今朝方始是閒身細看壁上題名記六十年閒
只五人

寄林景思

臨海睽離七度春都城想見話悲辛蒼顏白髮渾非舊短句長篇
卻有神一第蹉跎真可歎半生奔走坐長貧老懷先自難爲別相

識如君更幾人

以上天台別編

寄友人

胸中襞積千般事到得相逢一語無

台州秩滿歸

送客漸稀人漸遠歸途應減兩三程

以上後村詩話

昭明文選跋

貴池在蕭梁時實爲昭明太子封邑血食千載威靈赫然水旱疾疫無禱不應廟有文選閣宏麗壯偉而獨無是書之板蓋缺典也往歲邦人嘗欲募衆力爲之不成今是書流傳於世皆是五臣注本五臣特訓釋旨意多不原用事所出獨李善淹貫該洽號爲精詳雖四明贛上各嘗刊勒往往裁節語句可恨表因以俸餘錢募會池陽袁使君助其費郡文學周之綱督其役踰年乃克成既摹本藏之閣上以其板實之學宮以慰邦人所以尊事昭明之意云淳熙辛丑上巳日晉陵尤袤題

梁谿遺藁補遺

梁谿遺藁附錄

宋史本傳

尤袤字延之常州無錫人少穎異蔣偕施垌呼爲奇童入太學以詞賦冠多士尋冠南宮紹興十八年擢進士第嘗爲泰興令問民疾苦皆曰邵伯鎮置頓爲金使經行也使率不受而空厲民漕司輸藁桔致一束數十金二弊久莫之去乃力請臺閩奏免之縣舊有外城屢殘於寇頽毀甚袤卽修築已而金渝盟陷揚州獨泰興以有城得全後因事至舊治吏民羅拜曰此吾父母也爲立生祠注江陰學官需次七年爲讀書計從臣以靖退薦召除將作監簿大宗正闕丞人爭求之陳俊卿曰當予不求者遂除袤虞允文以史事過三館問誰可爲祕書丞者僉以袤對亟授之張栻曰眞祕書也兼國史院編修官實錄院檢討官遷著作郎兼太子侍讀先是張說自閤門入西府士論鼎沸從臣因執奏而去者數十人袤率三館上書諫且不往見後說畱身密奏於是梁克家罷相袤與

祕書少監陳駸各與郡表得台州五縣有丁無產者輸二年丁稅凡萬有三千家前守趙汝愚修郡城工纔什三屬表成之表按行前築殊鹵莽亟命更築加高厚數月而畢明年大水更築之埔正值水衝城賴以不沒會有毀表者上疑之使人密察民誦其善政不絕口乃錄其東湖四詩歸奏上讀而歎賞遂以文字受知除淮東提舉常平改江東江東旱單車行部覈一路常平米通融有無以之振貸朱熹知南康講荒政下五等戶租五斗以下悉蠲之表推行於諸郡民無荒殍進直祕閣遷江西漕兼知隆興府屢請祠進直敷文閣改江東提刑梁克家薦表及鄭僑以言事去國久于外當召上可之召對言水旱之備惟常平義倉願預飭有司隨市價禁科抑則人自樂輸必易集事除吏部郎官太子侍講累遷樞密院正兼左諭德輪對又申言民貧兵怨者甚切夏旱詔求闕失表上封事大略言天地之氣宣通則和壅遏則乖人心舒暢則說抑鬱則憤催科峻急而農民怨關征苛察而商旅怨差注畱滯

而士大夫有失職之怨廩給朘削而士卒有不足之怨奏讞不時報而久繫囚者怨幽枉不獲伸而負累者怨強暴殺人多特貸命使已死者怨有司買納不卽酬價負販者怨人心抑鬱所以感傷天和者豈特一事而已方今救荒之策莫急于勸分輸納既多朝廷吝于推賞乞詔有司檢舉行之高宗崩前一日除太常少卿自南渡來典禮散失事出倉卒上下罔措每有討論悉付之表斟酌損益便于今而不戾于古當定廟號表與禮官定號高宗洪邁獨請號世祖表率禮官顏師魯鄭僑奏曰宗廟之制祖有功宗有德藝祖規創大業爲宋太祖太宗混一區夏爲宋太宗自眞宗至欽宗聖聖相傳廟制一定萬世不易在禮子爲父屈示有尊也太上親爲徽宗子子爲祖父爲宗失昭穆之序議者不過以漢光武爲比光武以長沙王後布衣崛起不與哀平相繼其稱無嫌太上中興雖同光武然實繼徽宗正統以子繼父非光武比將來祔廟在徽宗下而稱祖恐在天之靈有所不安詔羣臣集議表上議如初

邁論遂屈詔從禮官議衆論紛然會禮部太常寺亦同主高宗謂本朝創業中興皆在商邱取商高宗實爲有證始詔從初議建議事堂令皇太子參決庶務表時兼侍讀乃獻書以爲儲副之位止於侍膳問安不交外事撫軍監國自漢至今多出權宜乞便懇辭以彰殿下之令德臺臣乞定喪制表奏釋老之教矯誣褻瀆非所以嚴宮禁崇几筵宜一切禁止靈駕將發引忽定配享之議洪邁請用呂頤浩韓世忠趙鼎張浚表言祖宗典故旣耐然後議配享今忽定於靈駕發引一日前不集衆論懼無以厭服勳臣子孫之心宜反覆熟議以俟論定奏入詔未預議官詳議以聞繼寢之卒用四人者時楊萬里亦謂張浚當配食爭之不從補外進表權禮部侍郎兼同修國史侍講又兼直學士院力辭上聽免直學士淳熙十四年將有事於明堂詔議升配表主紹興孫近陳公輔之說謂方在几筵不可配帝且歷舉郊歲在喪服中者凡四維元祐明堂用呂大防請升配神考時去大祥止百餘日且祖宗悉用以日

易月之制故升侑無嫌今陛下三年之喪高宗雖已耐廟百官猶未吉服詎可近違紹興而遠法元祐升侑之禮請俟喪畢議之詔可孝宗嘗論人才表奏曰近召趙汝愚中外皆喜如王藺亦望收召上曰然一日論事久上曰如卿才識近世罕有次日語宰執曰尤袤甚好前此無一人言之何也兼權中書舍人復詔兼直學士院力辭且薦陸游自代上不許時內禪議已定猶未諭大臣也是日諭表曰旦夕制冊甚多非卿孰能爲者故處卿以文字之職表乃拜命內禪一時制冊人服其雅正光宗卽位甫兩旬開講筵表奏願謹初戒始孜孜興念越數日講筵又奏天下萬事失之於初則後不可救書曰慎厥終惟其始又歷舉唐太宗不私秦府舊人爲戒又五日講筵復論官制謂武臣諸司使八階六階爲貴品祖宗待邊境立功者近年舊法頓壞使披堅執銳者積功累勞僅得一階權要貴近之臣優游而歷華要舉行舊法姜特立以爲議已言者因以爲周必大黨遂與祠紹熙元年起知婺州改太平州

除煥章閣待制召除給事中既就職卽昌言曰老矣無所補報凡
貴近營求內除小礙法制者雖特旨令書請有去而已必不奉詔
甫數日中貴四人希賞欲自正使轉橫行表繳奏者三竟格不下
兼侍講入對言願上謹天戒下畏物情內正一心外正五事澄神
寡欲保毓太和虛己任賢酬酢庶務不在於勞精神耗思慮屑屑
事爲之末也陳源除在京宮觀耶律适嘿除承宣使陸安轉遙郡
王成特補官謝淵李孝友賞轉官吳元允夏永壽遷秩皆論駁之
上並聽納韓侂胄以武功大夫和州防禦使用應辦賞直轉橫行
表繳奏謂正使有止法可回授不可直轉侂胄勳賢之後不宜首
壞國法開攀援之門奏入手詔令書行表復奏侂胄四年間已轉
二十七年合轉之官今又欲超授四階復轉二十年之官是朝廷
官爵專徇侂胄之求非所以爲摩厲之具也命遂格上以疾一再
不省重華宮表上封事曰壽皇事高宗歷二十八年如一日陛下
所親見今不待倦勤以宗社付陛下當思所以不負其託望勿憚

一日之勤以解都人之惑後數日駕卽過重華宮侍御史林大中
以論事左遷表率左史樓鑰論奏疏入不報皆封駁不書黃耶律
适嘿復以手詔除承宣使一再繳奏輒奉內批特與書行表言天
下者祖宗之天下爵祿者祖宗之爵祿壽皇以祖宗之天下傳陛
下安可私用祖宗爵祿而加於公議不允之人哉疏入上震怒裂
去後奏付前二奏出表以後奏不報使吏收閣命遂不行中宮謁
家廟官吏推賞者百七十有二人表力言其濫乞痛裁節上從之
嘗因登對專論廢法用例之弊至是復申言之除禮部尙書駕當
詣重華宮復以疾不出率同列奏言壽皇有免到宮之命願力請
而往庶幾可以慰釋羣疑增光孝治後三日駕隨出中外歡呼兼
侍讀上封事曰近年以來給舍臺諫論事往往不行如黃裳鄭汝
楷事遷延一月如陳源者奉祠人情固已驚愕至姜特立召尤爲
駭聞向特立得志之時昌言臺諫皆其門人竊弄威福一旦斥去
莫不誦陛下英斷今遽召之自古去小人甚難譬除蔓草猶且復

生況加封植乎若以源特立有勞優以外任或加錫賚無所不可
彼其閒廢已久含憤蓄怨待此而發儻復呼之必將潛引黨類力
排異己朝廷無由安靜時上已屬疾國事多舛表積憂成疾請告
不報疾篤乞致仕又不報遂卒年七十遺奏大略勸上以孝事兩
宮以勤康庶政察邪佞護善類又口占遺書別政府明年轉正奉
大夫致仕贈金紫光祿大夫表少從喻樗汪應辰游樗學於楊時
時程頤高弟也方乾道淳熙間程氏學稍振忌之者目爲道學將
攻之表在掖垣首言夫道學者堯舜所以帝禹湯武所以王周公
孔孟所以設教近立此名詆訾士君子故臨財不苟得所謂廉介
安貧守分所謂恬退擇言願行所謂踐履行己有恥所謂名節皆
目之爲道學此名一立賢人君子欲自見於世一舉足且入其中
俱無得免此豈盛世所宜有願徇名必責其實聽言必觀其行人
才庶不壞於疑似孝宗曰道學豈不美之名正恐假託爲姦使眞
僞相亂爾待付出戒敕之表死數年侂冑擅國於是禁錮道學賢

士大夫皆受其禍識者以表爲知言嘗取孫綽遂初賦以自號光
宗書扁賜之有遂初小彙六十卷內外制三十卷嘉定五年諡文
簡子棐槩孫焞禮部尙書

論曰尤袤學本程頤可謂老成典刑者立朝抗論與人主爭是非
不允不已而能令終完節難矣

家譜本傳

文簡公諱表字延之五歲能詩十歲以神童薦二十二歲禮部試
第一廷擬狀元以不呈卷秦檜易之登紹興十八年進士與朱文
公同榜楊文公同官館中有尤楊之目太上崩公定號高宗洪邁
請易世祖公執奏太上親爲徽宗子子爲祖父爲宗失昭穆之序
邁論遂屈光宗以疾不省壽皇公上封事千言卽日駕過重華宮
韓侂冑以應辦超授四階公論罷之又奏汰中宮謁廟濫賞官吏
百七十二人張說入西府公率三館上書忤旨補外陳源姜特立
召用公抗疏極言二人之惡不聽遂乞歸自號遂初居士光宗書

遂初二字賜之起家泰興令仕至煥章閣待制禮部尙書少師贈太師金紫光祿大夫予今諡公少從喻玉泉游得楊龜山之學門人李祥蔣重珍皆公造就爲大儒吳人推理學者必曰喻尤李蔣今郡五賢祠邑崇正書院並祀云公平居無事日取古人書錄之家入女穉莫不識字共錄三千餘部建萬卷藏書樓又闢書堂于錫山之麓久之樓火書焚其半僅存書目所著有梁谿集遂初稿若干卷與楊廷秀范德機陸放翁相倡和時號四詩翁公生靖康丁未卒紹熙甲寅享年六十有八史稱七十舉全數耳按譜公始祖待制諱叔保公自晉江遷長洲西禧里再遷無錫白石里生二子在錫者諱大成在蘇者諱大公大成生申申生時亨時亨生袁爲文簡公大公生元卽觀文殿大學士文獻公也方文簡公喪父廬墓三年一慟累日卜葬吳塘始葬十日見萬鎗滿湖叱聲震地公懼隱喬松之下聞空中語曰此地發福三百年彼人子何德而畀之速令發去又聞空中應曰尤時亨累世積德袁又純孝子也

空中又曰世德純孝可當此地矣其善護之紹興十四年秋事也公夫人唐氏生二子長斐以蔭生累官工部侍郎次槩淳熙進士官太常博士人稱眞書櫛子以其肖文簡也斐子焞爲莊定公嘉定進士官至端明殿大學士度宗嘗幸其第題柱間曰五世三登宰輔奕朝累掌絲綸謂合文獻文簡而三也厥後子孫簪纓不絕具載述祖詩中

家譜之作始于贈魏郡侯交繼修者蒼梧知縣弼順天府丞魯江西參政瑛文學璿刑部主事際昌俱有傳今翰林院檢討裔孫侗百拜補述

梁谿遺藁附錄

南宋詩家首推尤楊范陸號中興四將益比之張韓劉岳云顧其時習尙爭學唐風由元訖明鮮有齒及宋詩者洎乎 昭代然後大行蘇黃而下劔南爲盛石湖次之誠齋雖拙于用多亦篇什斐然矣獨吾祖文簡公有梁谿集遂初藁二刻度置萬卷樓中間厄于兵燹浸尋散失歷今五百餘年靡有子遺勝國之末錫山顧先輩有宋文鑑之選徧覓文簡著作了不可得僅傳其落梅詞一首而已海內藏書家縹緲不乏何獨靳于吾祖百無一存咄咄怪事子孫不肖未能奉守典章致先賢手澤委諸草莽更可痛也今歲庚辰秀水朱竹垞檢討偶過西堂追話及此自言家有載籍略見一斑遂歸搜篋衍得古今詩四十七首雜文二十六首彙成二卷手鈔示予予捧持趯躍如獲異寶其拜賜我友多矣隨命梓人授之剞劂既考詩文所出如赤城臨安茅山志朝野雜記瀛奎律髓等類亦非希有之書但世閒讀書者少闡幽索隱不暇以爲儻有閱覽博物君子漁獵所及拾遺補闕惠而教我庶使延津之劔離

而復合合浦之珠去而復還此後生小子所禱祠而求也先是文簡公賜塋在西孔山十世久矣無何爲夫己氏盜葬其旁不辨阡陌予因祭掃一見蹙然走訴中丞遂而遷之旋加修葺于是穹碑巋然封樹如故今重鋟遺槩焚告墓門亦足慰吾祖于九京矣校訂之餘僭跋卷尾以志歲月時康熙三十九年中秋既望第十八世孫侗百拜謹書是年八十有三矣


吾祖文簡公著梁谿集五十卷遭兵火失傳幸竹垞老人家猶存百一從祖西堂先生網羅得之欣然授梓閱百餘年後人罔知慎守板又散亡可慨也豈公之學行動業炳耀青史不藉詩文傳世耶抑公之名重于南宋天故欲晦而彌章耶第後之論宋四家詩者知公之爲人末由見公之全集并是區區百一之存而仍不復存子孫之忝厥祖甚矣余學詩三十年今忽忽老矣先澤就湮盡然心傷爰亟重鐫以貽久遠諗後人勿再失守墜緒余之願也道光元年辛巳之秋七月既望二十三世孫興詩百拜謹跋時年六

十又二

右梁谿遺藁二卷宋尤袤撰按延之所著有遂初小藁六十卷內
外制三十卷見宋史本傳有梁谿集五十卷見陳振孫書錄解題
明文淵閣書目卽未著錄可見明初已佚其十八世孫長洲尤西
堂先生得秀水朱竹垞本存詩四十七首文二十六首釐爲兩卷
康熙庚辰付梓竹垞爲之序止存百分之一卽所收大行太上皇
帝廟號兩疏論賀正使不當卻疏文均未全碎璧零珠彌增寶惜
道光辛巳其廿三世孫興詩再刻之而傳本亦罕見今爲重梓以
廣其傳復搜得三朝北盟會編載淮民謠一首天台別編載詩十
首文選跋一首以益之光緒丁酉清明節武進盛宣懷跋

Table with 15 columns and 10 rows. The text is extremely faint and illegible.

Small vertical text on the right edge of the table, possibly a page number or reference mark.



十	端
叢	愚
	鑿

馬

彭	氏	卷
叢	用	緒
輯	影	丙
補	宋	昌
遺	鈔	卷
一	本	正
卷	開	逢
		盛

欽定四庫全書簡明目錄卷十六

歸愚集十卷

宋葛立方撰原集二十卷此本蓋掇拾重編謹案今所存者附以歸愚詞為十卷故詩但有近體無古體文如何桌轉官制之類亦誤收北宋人作也何桌當從舊鈔本作吳桌並非誤收北宋人制語秋論詩惟取風旨不計其詞之工拙故所作亦罕逢佳句儷體流麗清婉多有可采

欽定四庫全書總目卷一百四十八

歸愚詞一卷

宋葛立方撰立方有歸愚集已著錄謹案據此文知總目未收乃誤遺也宋人之中父子以填詞名家者為晏殊晏幾道後則立方與其父勝仲為最著其詞多平實鋪敘少清新宛轉之思然大致不失宋人規格流傳既久存之亦可備一家卷末毛晉跋稱集內雨中花眼兒媚兩調俱不合譜未敢妄為更定今參考諸

家詞集其眼兒媚乃朝中措之譌歐陽修平山欄檻倚晴空
一闋可以互證至雨中花調立方兩詞疊韻初無舛誤以音
律反覆勘之實題中脫一慢字京鏗辛棄疾皆有此調立方
詞起三句可依辛詞讀第四第五句京辛兩作皆作上五下
四立方則作上六下三雖微有不同而同是九字其餘則不
獨字數相符平仄亦毫無相戾其爲雨中花慢亦可無疑晉
蓋考之未審他如滿庭芳一調連成十闋凡後半換頭二字
有用韻者亦有不用韻而直作五字句者考宋人此調此二
字本無定式山谷詞用韻書舟詞不用韻立方兩存其體亦
非傳寫有譌也

歸愚集序

據江陰志補人

輝觀近代文章之盛莫若本朝其閒名公卿材大夫以文世其家
者代不乏人或父子相繼或兄弟同時然不過一再傳而聲采不
接其至於自祖及孫奕世相望愈出愈新如吏部侍郎葛公之家
學者亦鮮哉葛氏自通議起家清孝繼之而官猶未達也文康公
始以文章大厥聲爲天子近臣於鋪張太平之時至吏部又以文
章掌制於南渡中興之後吏部之子正言邲今復以文接踵臺閣
言論風旨爲時聞人蓋葛氏之家學通議清孝培其本文康發其
華吏部擷其英而正言又將以潤色而振耀之者也其資深力久
哉輝與先兄祭酒同爲紹興十八年進士吏部先生實參掌文衡
今輝復與正言同朝一日出示吏部文集謂之歸愚且謂輝曰子
爲序之輝於吏部爲門下士其敢以不敏辭嘗謂古之爲文者本
於學今之爲文者空文而已文乎文乎豈辭藻之謂乎學乎學乎
豈章句之謂乎實大聲宏夫豈偶然吏部之文務去陳言而不露

斧鑿痕自出機杼而不襲他人後行字著語皆有來處非讀書博者不見其工至其閱肆馳騁而不失程度紆餘清麗而歸於雅正又不可以一體觀也蓋葛氏之文至此而自成一家矣此師友淵然有自而吏部又從而增殖之也然則空文而已不本之學安得至此哉吏部立朝大節終始無瑕雖未盡見於設施是不負所學者嗚呼豐其所積而嗇其所享不可以理詰也移忠委質益大其門其在後之人乎豈徒其文而已輝老矣尚及見之芮輝撰

侍郎葛公歸愚集目錄

○卷之一

詩

避地傷春六絕句

和盧叔才食蠅二首

天寶三絕

攜家避地二首

避地復歸故鄉

沿檄省親復還書呈叔能同官

鹽倉作呈叔能同官

直孺叔用韻見贈再和爲謝

次韻陳文仲二首

張千里惠詩次韻三首

大人游千金訪張仲宗以守舍不得侍行用仲宗韻二首

和叔才餉酒

次韻蔡仲平察院中秋二首

次韻仲平病閒齋祠二首

次韻林海卿吏部游湖

周元舉侍郎梅花次韻三首

次韻洪慶善同飲道祖家賞梅四首

游衢州烏巨山乾明寺

次韻劉卿任飲散感秋之作二首

小酌以詩招道祖分茶

九日慶善示詩次韻

比訪叔才旋蒙賜詩以貧不能畱客爲媿次韻

和道祖韻

大人築室將畢道祖亦作宅基治園作四詩示道祖

風起

十月十四夜三鼓壺天月色甚佳以詩招道祖

次韻道祖書懷

次韻法觀送紅梅栽

胡樞橫山堂五首

連日灌畦蒔菜廢作詩

送李元孟赴湖南漕屬

疏慵

○卷之二

詩

題臥屏十八花

不飲

月蝕

十一月十日酒散已二鼓與千里步月因至水堂三首

冬至小雨蹋泥出謁

聞歌二首

有感三首

操葉舟凌巨浪訪道祖二首

春日野飲

余赴官宮庠與道祖通判久聚乍散每有懷想作詩五十韻道二十餘年出處寄呈

宮庠旅泊

奉祠太乙

次韻陳廷藻戶部西湖快目堂之集

周元舉待制挽歌詞二首

次韻周少隱梅花三絕

試院和陳蕃仲醑醺兩絕

送胡汝明待制赴鎮桂林

冬至後雪

○卷之三

詩

次韻陳元述見寄謝茶三首

次韻程天游敘舊

天游以前韻賦雪走筆和

章氏園小集荷池上二首

次韻伯父工部見慶塵忝之什

接伴賀天申節北使至闕

送伴回至平江舟中與元覽試茶

正月十日小園瑞香盛開

子直近日畫筆稍進而棋似倒長作詩戲之

比賦棋畫詩蒙子直次韻復和

園中新疊假山

禮部尙書洪公皓挽歌詞三首

江陰新阡松柏爲大浸所壞累夕見於夢寐
所居二室號書癡禪說各成一詩

聞琵琶方響成二絕

己卯歲四月二十七日自湖州赴宜春郡餘杭出陸至富陽

觀插秧

和新城旅店壁間韻

新城道中

桐廬牛嶺

入壽昌縣界

壽昌道中壁間有烏石寺詩和其韻

早行二絕

晚泊二絕

將至玉山

過九坡

寄睦之

贈褚明遠

四絕贈馬浩然法師

子直畫屏索題四絕

罷職還家漢卿叔賜詩和韻

致政宣義王公挽詞

贈施堯年老人三絕

題曲屏牡丹桃花二絕

蒙恩除吏部侍郎子姪以詩相慶

○卷之四

詩

蒙才孺伯惠詩頗及參問

句祠將離雲間崔申之以詩爲別次韻

崔申之以詩爲別蘇明父郭逢叔各有和章謹復用韻二首

次韻施于善謝茶

具上人以詩相別復和之

朱丞相赴宣州四十韻

不寐

聞我師大捷虜騎宵遁上時宰五十韻

張千里以詩送邵姪銓試用其韻

旅次二首

綴景亭

踊山閣

滄浪亭

華藏庵

錦薰閣

洪慶善郎中興祖挽詩四首

響應山

朝隱病瘧作譴鬼文而差示佳句次韻

金鐙花

建國劉夫人挽歌詞二首

築室以乏金小輟

春日移舟章園二首

大雄寺陳朝檜

○卷之五

樂府

滿庭芳

又和

又探梅

又賞梅

又汎梅

又簪梅

又 評梅

又 五姪將赴當塗自金陵來別

又 胡汝明罷帥歸坐間次韻作

錦堂春

水龍吟 遊釣臺作

菩薩蠻 待酒賞黃花

風流子

又

多麗 賞梅

又 七夕遊蓮蕩作

沙塞子

詠梅

春光好 立道生日作

又 寒日將過淮作

西江月

開鑪

蝶戀花 冬至席上作

清平樂

子直過省生日候殿試席間作

減字木蘭花

四姪過省候廷試作

又 章生作池相望作

水調歌頭

玉漏遲

行香子

玉樓春 雪中擁爐聞琵琶作

鷓鴣天

小孫周醉席上作

浪淘沙

子直新第落成席上作

卜算子

賞荷以蓮葉勸酒作

又 席間再作

夜行船

章甥婚席間作

雨中花

睢陽道中見桃李盛開作

又和

好事近

歸有期作

又和子直惜春

眼兒媚

回至汴京喜而成長短句

○卷之六

賦

餘慶堂賦

憶菁山賦

曠齋賦

騷

喜聞

雲仙

九效并序

橫山草堂三章

銘

象戲

蛛硯銘

文

小樓上梁文

○卷之七

外制

刑部郎官吳棨除右司員外郎

權戶部侍郎李椿年落權字

武功大夫張言降一官

忠翊郎趙澤降一官

沈廓降官

王鎡兼侍講

湯允恭殿中侍御史

趙子厚吳棗中興聖統轉官

蕭師雄降官

程敦厚復官

趙良傑降官

傅青降官

潘真降官

王庭淨父倚迪功郎

孫汝翼降官

陳橐父毅馮檝父昌期贈官

向子固知揚州

米友仁贈官

方滋知廣州陳疇知靜江府

張微降官

劉貴陳進贈官

錢雋之降官

趙士彰兩浙運判賈直清江東提刑

徐榘太府寺丞

權戶部侍郎宋貺落權字

曹紹先趙公懋降官

沈虛中吏部郎官林機禮部郎官

封周降官

張官致仕

賈堯民降官

李嗣慶降官

張昶降官

陳誠之權禮部侍郎落權字

韓仲通權刑部侍郎落權字

湯思退除起居舍人兼直學士院

王葆除司封郎官

王曦除禮部侍郎

錢炳降官

趙述團練使

趙彥璧取應合格承節郎

○卷之八

外制

潘瑞卿降官

李如岡磨勘轉官

張曦大理寺正

吳國大長主孫潘昌期等補官

莫冲宏詞轉官

章燾大理少卿

陳相樞密院檢詳諸房文字

晁謙之轉官

巫山神封妙用真人

威惠善濟廣祐王加封

靖懿夫人加封

趙達左承事郎簽書劔南東川節度判官廳公事

王貴父琳王彥父成贈官

蕭振磨勘轉官

曹筠集英殿修撰

陳全降官

王繼善醫有勞轉官

杜繼忠陳亡□□補官

張忠元磨勘轉大中大夫

曹筠除敷文閣待制知成都府

吳垞成都府路轉運副使

范生降官

沈調提點諸路坑冶鑄錢公事

梁汝嘉知鼎州

不微式武

不羈直祕閣

王述降官

周綰成都路提刑劉長源湖南路提刑馮忠恕夔路提刑

喬士立降官

韓世忠除太師致仕

韓世忠贈通義郡王

劉全母陳氏封號

吳近降官

士樽嫡母王氏吳國夫人

故妻李氏夫人

趙伯耆等轉官

謝邦彥大理正

士遜贈觀察使

○卷之九

表

謝賜戒石銘表

謝喜雪御筵表

賀正旦表

四月日蝕陰雲不見表

日蝕不及分表

賀太陽當虧不虧表

謝賜衣表

賀雪表

代人謝賜生日禮物表

謝春衣表

賀冬至表

代人辭免樞密表

謝吏部侍郎表

謝袁州到任表

賀皇帝登寶位表

○卷之十

啟

謝改官啟

謝及第啟

答嚴公舉解元啟

謝宮教啟

謝正字啟

謝校書郎啟

又謝校書郎啟

謝洪郎中啟

謝先人賜諡文康啟

答宏詞周學士啟

代賀万俟中丞啟

謝考功郎官啟

答張柎上舍啟

謝葉偉上舍啟

答趙達狀元啟

答余松第三人啟

答特奏狀元昌先輩啟

光緒丙申武進盛氏思惠齋刊臨桂況周儀陽湖吳文郁丹徒陳慶年全校

侍郎葛公歸愚集卷一

宋本卷五

江陰葛立方常之

詩

避地傷春六絕句

一年春事又闌珊可惜芳菲愁裏看慎勿掃花供喂馬惱人秀色

自堪餐

洛陽宮闕半成灰草草花枝濺淚開國色天香消息斷妝臺誰奉

紫金杯

枯藤六尺步長阡客裏韶光絕可憐好著春楓重試火西陽三日

突無煙

碧羅天宇亂花稠搔首光陰只重愁頭上無貂堪換酒開箱賴有

驪驪裘

石門連日動征輦花柳無情自繞溪回首故園今好在杜鵑花落

子規啼

菖葉青青杏葉新牛耕白水一犁勻袴裙窺愛疏籬晚不是沈香

倚太真

和盧叔才食蝻二首

綠柘林中聽晚繅聞將煮蝻當持螯何須有繭大如囊救得妻兒
唬與號

開箔團團雪滿牀桃漿灑盡煮蘭湯微軀分合葬君腹報答君家

三畝桑

天寶三絕

凝碧池頭絃管聲秋槐落葉若爲情王維空詠朝天句誰似當年

雷海青

翠輦重登勤政樓桃紅依舊唱涼州但知玉笛傳佳曲不記鈴聲

動客愁

綵絲黃裙墮遊水爛斑錦韞委鬼山臂環留得知何用羞殺新豐

謝阿蠻

攜家避地二首

菟裘真可老飄寓失初心去去家山遠行行澤國深光陰三翼過
情緒二毛侵何日干戈定鷗盟得再尋

生身恨晚晚喪亂適吾遭百歲大槐過三年空谷逃平羌無上策

醫國付羣豪年大傷蓬轉愁城破濁醪

避地復歸故鄉

二老堂邊花作林不愁酒竭貰貂金宗人避世散還聚才子哦詩

絕復尋莫話衣冠一酸鼻回思戎虜幾寒心半墩仙隱吾廬在人

認桃源雞犬音

沿檄省親復還書呈叔能同官

雲間霄水往來航風雨幾番騰客裝子職廢供一旬劣官事不了

三春強去時園花初放白歸日江梅如許黃少復須之又西指薰

風一舸在迴塘

鹽倉作呈叔能同官

平生懶作子公書俛首銓曹一紀餘第有神馳招隱館久無夢到

承明廬文字真宜覆醬瓿技能只合服鹽車清才弗悟亦塵役早晚促君登石渠

直孺叔用韻見贈再和爲謝

異時鬢舍共翻書黃卷相從樂有餘十載乖離馳別夢半生飄蕩失吾廬飲江偶脫胡人馬並海欣逢長者車輒語蟬聯相勞苦羈遊無緒領勤渠

次韻陳文仲二首

小園邈在古城陰爲愛寒葩杖履尋卻笑含章簷下客對花熟睡亦何心

低枝垂藥逗疏陰不學髯龍幹百尋此去江南知幾驛只今誰動故人心

張千里惠詩次韻三首

十年風攪海波翻未報穹廬氣湧山且把毛錐覩天巧異時方叔要威蠻

筆端玉筍更銀鈎胸次三墳復九邱兒輩政憂書種斷靈膠忽至

鳳麟洲千里許與兒輩受業

芝蘭楚楚蒔庭階不集尋常村裏來新蔡門前說甘露也應入細視庭槐

大人遊千金訪張仲宗以守舍不得侍行用仲宗韻二首

古寺依煙艇一篙春水深石壇幡轉影玉殿磬流音客有張公子僧皆支道林行行雲水窟幽夢渺難尋

聞道千金好幽人已奠居森森松遶寺瀲灩水循渠旅泊未妨酒長飢猶著書謫仙詩酒地今尚指匡廬

和叔才餉酒

百事不挂眼一尊難暫忘伴來頌酒聖客至引杯長桑落開新甕崑崙接舊觴鵝兒黃液重象鼻碧筩香銀海俄增量金罍可配漿蟻浮甘澱澁石飲見溫良世事紛忘去詩情合得嘗醉來庭宇眩醒後竹陰涼釀鄙平原縣鄰防吏部郎糟邱誠可老不用爾殺將

次韻蔡仲平察院中秋二首

素魄經秋分外明
桂枝濃傍葉淵清
人寰散影千山白
愁絕村村砧杵鳴

不是銀河隱半輪
滿天散彩絕埃塵
幽懷想得如羅隱
耿耿相看似故人

次韻仲平病間齋祠二首

居士彈一指森羅萬象皆
聊須三味酒不奉入關齋
雨罷簾初卷山迎闥自排
蕭然忘世慮心境兩相諧

病間百念屏寒窗無與皆
吾公那窟室學士且高齋
今日明棗徹詰朝閭闔排

仲平祠事之明
日輪當左對

猶尋淡生活泚筆當俳諧

次韻林海卿吏部遊湖

竟日關心朱墨間
西湖好在且偷閒
光凌萬頃搖銀海
興愜千鍾倒玉山
未辦綵毫書側理
只愁赤壁下烏蠻
客兒忽墮池塘句
格律都高漢以還

周元舉侍郎梅花次韻三首

不隨羣卉豔陽天
幾樹孤芳玉砌前
陸凱何妨餉范曄
綠華端合伴羊權
憂虞莫問兵戈滿
賞玩要須酒盞先
雖是廣平心似鐵
也應作賦詠蕃鮮

山村疑有散花天
五出瓊瑤忽滿前
閨女傳香得韓壽
宮娥濡蠟照公權
賞心共付尊中美
索笑誰為席上先
他日成陰子如豆
不堪對酒割芳鮮

怪底窮冬凜冽天
一枝香豔媚尊前
未應黑帝專司殺
誰道春陽獨幹權
冷伴素蟾斜弄影
輕飛么鳳欲相先
坐中人是王夷甫
幽韻清標兩鬪鮮

次韻洪慶善同飲道祖家賞梅四首

未上風光驚老眼
斬新香韻惱騷人
霜清日淡虛庭裏
玉骨幽貞不嫁春

麝臍飄馥來疏葉
霜女將寒墮瘦枝
數朵臘前舒冷豔
催花羯鼓

未應知
寒葩脈脈畫堂新同是巡簷索笑人獨把幽姿伴冰雪舒花結蘂
不關春

立盡黃昏賞玉肌月華無語上疏枝絕憐熟睡含章畔無限花飛
總不知

遊衢州烏巨山乾明寺

烏巨山前談實諦江郎巖畔逗真機白虹示滅知何處去采山桃
又不歸

次韻劉卿任飲散感秋之作二首

雲子登場賽鼓譙村南村北盡黃冠幾聲乾葉下碧螿數尺瘦山
浮畫闌水落野橋漁網挂月懸煙浦鵲枝寒新秋愁絕他鄉客衣
帶年來似沈寬

華堂不料著野客菲履底同章甫冠鷗外翠光清醉眼尊前爽氣
動危闌霜沈紫苜玉匳闊風脫丹林煙髻寒百榼香醪消萬斛酒

中跌宕賴君寬

小酌以詩招道祖分茶

寶勝開緗葉香塵墮柘羅湯鳴簷雨細盞占隴雲多連日伊蒲塞
今朝熱落河春風入詩腹五字與君哦

九日慶善示詩次韻

眼明逢九日習氣自多生官冷有閒趣花開無世情玄暮何許是
素滄第存名百歲風狂似東籬且掇英

比訪叔才旋蒙賜詩以貧不能畱客爲媿次韻

一舸風帆放晚秋訪君幽巷卜淹畱綠搖岸柳容如舞碧蘸溪毛
美可羞喜見林宗鑿爲輟久欽阿大語難休士貧雞黍無勞具謀
食何如道可謀

和道祖韻

未落天狼未止戈誰能頻擊唾壺歌奕棋聊欲消憂耳飲酒無如
作病何孫紹那憂卿太少退之莫歎日無多菟裘已向青山卜從

此棲遲刊髮歸

大人築室將畢道祖亦作宅基治園作四詩示道祖

習隱肯回駕求榮難著鞭有心營綠野無夢到凌煙盞罍花開裏

簷楹雁落邊冰清仍玉潤共此一山川

蓬轉欣小定汎金非我鄉買田無好時共宅有清漳菱罷水天接

□□草香邗溝風月地怙悵隔參商

兩第屹相向幽園卑辟疆君方林上鳴聞移梅栽於上我亦沼橫

洋鑿翠闢窗戶入天棲棟梁東屯寒月夜老杜只茅堂

世事只如許幽居誠樂哉報安知楚竹索笑得江梅岸放平湖入

窗邀遠岫來兩家車馬地莫遣築蒼苔

風起

炎蒸因鉗欽虎嘯漏天機樹杪忽垂髻榴邊今汚衣草鳴溪水立

帆飽客船飛更設琉璃簞瓜茶遲落暉

十月十四夜三鼓壺天月色佳甚以詩招道祖

壺天有勝事玉宇淨纖埃有意囑復囑今宵來不來山公須酩酊

令史莫哈臺明月隔溪共只今腸九迴

次瀕道祖書懷

白雲深處縛柴荆一壑灣環似有情志氣蕭娘并呂姥年華張丈

與殷兄濁賢清聖時同酌上尾平頭得共評莫問鶴翎由啄菹此

心久與白鷗盟

次韻法觀送紅梅栽

羅幘初淩一水間霜深應怯夜來寒含章簷下渾冰雪卻要騷人

帶醉看

胡樞橫山堂五首

鬱蔥佳氣龜食墨霧閣雲窗丹雘新玉盃金杯有微玷瑤林瓊樹

無纖塵枕溪飽度國山日橫海小乘胸水春上古乾坤隨處有素

琴濁酒且關身

雲夢胸中吞八九了無官事苦相關廟堂曾引五星縷巖壑今疏

八節灘鳥織白雲機杼闊溪喧蒼石杵砧寒東山難戀山中相梅
子枝頭正著酸

朱薨碧瓦市塵遠遶舍泉唳山復橫勝處爭長渾僕妾亂來有此
幾公卿已公茅屋實父子裴氏午橋真弟兄竟日倚闌天外眼世
間軒冕一毫輕

春過木濃山轉翠早餘湍減石添痕主人正自笏拄頰客子底容
裙撇門好鳥傍人窺野核亂雲釋嶠落芳尊真成命駕輕千里李
杜文章得細論

天然平遠染百幅泚筆底須東絹傳窗戶吐吞新日月風波出沒
舊山川白公築室地三一揚子草玄文五千筋力尚堪驅使在異
時重汎白蘋船

連日灌畦蒔菜廢作詩

莫問新來額插犀了無魂夢到金閨平頭上尾慵搜句重後輕前
且灌畦正自無人嘗鼎臠不如客辦萍齋庾郎三九同芻豢野

薺從教施五溪

送李元孟赴湖南漕屬

君忽湘潭去斜陽催馬銜將無催白髮正坐此青衫暑雨驅魚婢
薰風人鬣帆南來衡嶽雁引領望書函

疏慵

閒處著疏慵鮮鮮幽桂叢讀書聊竈北避世且牆東市駿卑蘇代
求徵謝子公丹心阻閭闔欲付小心風

侍郎葛公歸愚集卷一

侍郎葛公歸愚集卷一

宋本卷六

詩

題臥屏十八花

抗旌汾浦根移白豎箔藍關花染紅欲識龍媒空萬馬宮袍黃挾

御鑪風姚黃

瑤林瓊樹非人世種得仙花雪作團后土祠邊還寂寞只今空對

畫圖看八仙

琴軫含房風未吹盈盈脈脈度炎暉怪來一夜丹鬚折杯酒新翻

阿醋衣榴花

香風細細入東榮嫩刺柔條疊絳英飛下神霞緣底事翦來曾倩

董雙成薔薇

雲昏水暖草萋萋空谷無人獨杖藜卻憶西江石樓老送春花下

子規啼杜鵑

北廊東院滿畦栽嫩紫輕紅次第開直與戎葵較多少二千里外

一枝來牡丹

十月幽園鬪曉風層層絳葉豔芳叢江南只慣收鷹爪誰顧山前

鶴頂紅山茶

含章英落佳人睡卻月香殘水部詩何似江南覓春信和香先得

最南枝梅花

傾心小圃陽初照束火中庭雨不霑裏娜腰枝渾欲舞好令韓偓

賦香奩蜀葵

賴鄉仙種手親栽春鬧枝頭滿意開正拂文君酒壚上莫教蜂蝶

等閒來杏花

玉骨檀心不肯妝牽絲引蔓過東牆政須把酒酬清豔莫待幽香

闕枕囊醉醺

濯錦江邊雨露勻杜鵑嗁血染香繒自緣佳處詩難貌可是無花

開杜陵海棠

秋入重陽氣倍清東籬采菊眼徧明杯中要作茱萸伴不是湘纍

餐落英黃菊

沈水飄香透藥塵紅鐙爍爍一枝春鼠姑倚檻雖無賴未肯降為

侍近臣芍藥

細看裂錦又蒸霞黃師塔前江上花折得一枝明老眼與兒洗面

作容華桃花

密葉高叢傲歲寒殷紅膩綠映江干沈香亭畔無消息賴有霜前

秋牡丹拒霜

高節本為青女伴牽牛弗悟配龍孫孔融天下無雙士並坐尊前

對虎賁牽牛竹

天上新栽琪樹枝拖雲帶月下瑤墀須知正自真仙種豈是金鈿

未染時白菊

不飲蒲團藜杖屋三間世故真成觸與蠻但有雲山供送目儻無尊酒

亦開顏吳宮雪紉鶴翎散歷社風荷象鼻彎老子何曾持入夢百

年鼎鼎鬢毛斑

月蝕

六月炎歊氣鬱蒸緣空寶鏡沒埃塵長歌不見徘徊影並出初無
齟齬輪麟鬪何因識星度鵲飛誰復見天心春秋不著誠非異毋
惑東家號素臣

十一月十日酒散已二鼓與千里步月因至水堂三首

雪後泥方凍酒闌寒少威傍雲生夜月喚客出柴扉籬敗犬聲合
街閒人影稀石闌山幾尺暝靄只依依

夢入千家枕寒聲薄水堂溪山渾著月梅竹半封霜夜榜響葭浦
寒魚跳石塘可憐清絕景夜夜屬漁郎

杖策蹋霜月滿空煙霧浮蒼顏醜蟻酒黑帝避貂裘太液池臺晚
廣寒宮殿秋歸來情耿耿未省喘吳牛

冬至小雨蹋泥出謁

葭灰動玉管絲雨慘良辰幽巷未通屐高人猶墊巾底忙持爵里

衝冷候比鄰猶勝邯鄲驛燈前影伴身

聞歌二首

初唱城闌雁影寒玉喉窸窣繡雲簪小叢底處傳歌樣供奉梨園
人姓南

月明如鏡酒如空響谷清聲出漢宮怪得中庭紅葉墮琉璃帳底
唱迴風

有感三首

將軍塞上誇三箭學士堂中記八磚正眼觀來都是幻月明羣蟻
在花甍

莫將橫笛銜柯亭豈解穿雲裂石聲湘水老翁那復見世間誰數
呂筠卿

但知鬼目爲芝草誰信羚羊破佛牙娘子阿夷何處辨時人識賣
假金家

操葉舟凌巨浪訪道祖二首

一牛鳴處是君家乘興煙蓬蹴浪花銀浦流雲新得路人驚仙客
在浮槎

一頃煙波渺太空獨操蓮葉破青銅炊煙不動無銅甌底處求僧

與二童

春日野飲

是日聞東朝入界

十載干戈僅脫身殘年重作太平民杯鎗有趣於中好花柳無情
分外春不遠上元新甲子肯將短筆怨庚寅從教蕙帳驚猿鶴卻
欲重彈冠上塵

余赴官宮庠與道祖通判久聚乍散每有懷想作詩五十韻道二
十餘年出處寄呈

初拜清揚日菰城荻始芽家聲璜出渭駿氣馬生洼博識該三篋
宏才記五車高明挈日月文彩炫雲霞結友方傾蓋連姻復附葭
鳳駟銀燭映鸞扇彩雲遮去作南陽別俄成澤國賒浚都先玉轡
漣水會僊槎我止邗溝第君歸霄水涯枌關方弛擔毳幕忽鳴笳

茂苑依城蝶菁山隱祐徂林巒迷霧豹鼓吹只池蛙宇宙焦先室
廚庖蔡搏茄旋聞翦蛇豕卻共注魚蝦經筭精藍肄辭鋒試席誇
棘闥排勝陣楓殿趣朝赧聯籍攀丹桂連名掇墨網枕郊同擇勝
築室共崇窻許邁通懸雷何君住若耶奇疆爭磊砢嘉卉鬪紛葩
風入黃蘆浦煙橫白鷺沙鷓舟行權短蟻酒酌尊汗覓句文詞競
枰棋笑語譁山深陪杖屨林僻預瓜茶歌放卑王豹琴閒鄙瓠巴
朝遊趁奔鹿暮宴起棲鴉溪上方霏屑山陰遽及瓜殿訶紛候吏
磬折擁晨衙踴躍良朋賀睚野老呀銅章輕擲置銀紱嗣榮加
還與牛同阜盃嗟鳳在效歸來齊靖節隱去類祁嘉鳩堇功名會
膏梁釋梵家果因流菜葉倏爾認桃花杜口傷鳴雁持鉤出睡蛇
少多臨濟棒生死祕魔叉蔬食期羹芋蓬心正倚麻一朝牽吏鞅
瑣質濫京華宮邸便清佚官曹懼過差學無裨稚駮儒或變淫奢
仰德勞心胥陳情費齒牙幸蒙魚網細數寄雁行斜凝望千巖阻
何因兩槩孳身修誰琢切詩病孰疵瑕縮地今無費移山第覓夸

願憐魚蓄榭莫惜馬頻槌驥尾終期附牛鳴幸不遐清標如會觀
羈旅失悲嗟悃悃煩青鏤淒涼倦絳紗聊須哦短句緘印錦谿砂
宮庠旅泊

客裏絕經營清心推五兵功名兩蝸角田舍一牛鳴行止成阿唯
榮枯略弟兄欲攄今日意聊仗五言城

奉祠太乙

瑟瑟鼓不勤民幻出琳宮遠世塵風咽唄聲金殿邃日移幡影
石壇新雲輶搖曳來三境霧帳淒迷妥十神堪笑茂陵成左計虛

將棗脯候秋春穆思欲以春秋祭太一所

次韻陳廷藻戶部西湖快目堂之集

冰壺影裏集朋從三雅同傾共一中相與文楸看飛雹不須舞袖
覓驚鴻雲邊鳥道古來寺煙際漁舟何處翁竟日追歡難十夜只

緣身在省牆東

周元舉待制挽歌詞二首

平生器業負經綸誰謂公才不秉鈞讜論十年持紫橐仁聲三郡
駕朱輪龜文豈是背無甲駒隙俄驚歲在辰宅夾清漳親義重佳
城引脰涕霑巾

手開榛棘啟雲扃淳古胸懷到大庭坐脫老龐那問日自銘小杜
不占星牛頭吉兆空形夢馬鬣新封遽妥靈警欬從今成永訣欲
瞻遺象只丹青

次韻周少隱梅花三絕

蠅館先生心若灰猶憐梅蕊傍牆栽瀛洲快觀春風面卻笑江南
苦未開

聞說青腰夜雨霜水沈山翳洩寒香西湖處士多標榜端的包羞

是海棠林逋詩云海棠

化工巧綴一枝斜點玉凝酥碎疊紗待得春來開滿樹何如忍凍

兩三花

試院和陳蕃仲醑醺兩絕

芳心玉面出蠶叢骨醉先生酒醜中白髮病翁新止酒枕囊猶覲
夢魂通

幽姿不分小山叢合在江梅季孟中香破鶴林真窠語肯教七七
擅神通

送胡汝明待制赴鎮桂林

今代人中傑據忠久贊襄摛文揮鏤管積學儷青箱體道經爲笥
臨機智作囊威名知草木義勇震戎羌玄女傳符舊黃公授略長
投壺祭征虜納策蔡中郎暫解淮西印來浮雪水航求田多好時
卜宅類清漳寄與紅塵外追歡錦瑟傍醉酣容偃鼠吟詠許寒蠶
邂逅升徐榻黃綠上孔堂周旋略名分眇昧沐謙光細札俄頒命
真儒起幹方地寬連五嶺權重聳三梁油戟明朝日銛戈耿夜霜
桂林飄黝粒荔浦劈瓊房來暮歌廉袴遄歸覲舜裳謀謨多妙簡
夢想獨難忘烏府思忠蓋丹墀渴對揚一言蘇品類三接屈皇王
沙水猶含凍江梅漸放香行行攜部曲去去背雲鄉劈箭飛征櫂

牽繩黼別腸平居膺刻畫祖送倍淒涼睿意與邦急人材敵國強
竝觀揚煥號爰立上巖廊談笑妖氛靜經綸寶祚昌小人簪履舊
枯卉俟春陽

冬至後雪

客寐失通宵寒聲動沆寥雲容頽玉宇雪陣攬層霄點點稽灰落
亭亭柳絮飄文窗斜擊紙老樹巧裝條墮嶺飾寒髻凌波灑碧綃
風狂初索索雨細漸瀟瀟入酒應愁凍當鑪覺易消蕭森聲勢密
飄瞥路歧遙蓑冷翁仍釣山迷客罷樵裁紈鋪縞素修月屑琨瑤
市小瓊樓合時和玉燭調三章歌睿製五板賀寒朝吠犬驚南嶺
騎驢憶灞橋終南憂壓腦少室街齊腰嗟我星霜老經時鬢髮凋
摘蔬和凍煮收葉帶蘇燒路滑難求馬衣單悔貰貂煖寒誰掃徑
莫負紫金蕉

侍郎葛公歸愚集卷二

侍郎葛公歸愚集卷三

宋本卷七

詩

次韻陳元述見寄謝茶三首

年來直欲配茶神石鼎山泉日日親竹裏烹煎嗤左計舌端絲味
認前塵書林坐攪枯腸讀酒所渾消玉頰春曾飲日邊甘露枕沙
溪難遣亂吾真

露窠那畏主林神小摘筠籃手自親旋轉注湯雲作腳繽紛出磨

麴爲塵麴塵見白樂天茶詩睡魔已戰三竿日詩社聊嘗一信春不把膏油

塗首面要須色裏認天真

青縷宜嬰石穴神薑鹽菽橘豈容親湯鳴鼎甌颺颺響末下刀圭

瑟瑟塵火裏槍旗俱發妙胸中梨棗不妨春柳州佳句誠堪誦滌

慮還源更發真柳子厚茶詩云滌慮發真照還源蕩昏斜

次韻程天遊敘舊

大學齋鹽滄語離半周甲子定何之霜空過雁我冥坐雲路看鴻

君賦詩公新作雲鄙吝正憂陳仲舉談諧喜值庾元規東鄰更有

程居士鼎足論文妙一時

天遊以前韻賦雪走筆和

翦水飛花下玉墀馳裘忍凍一窺之寒侵鑿落豪呼酒冰合陶泓
懶賦詩嵩嶺齊腰緣个事剡溪鼓棹欲何規唯欣嗣歲千倉積玉

燭調和運四時

章氏園小集荷池上二首

一金營雅集荷溼露香濃鳥起驚歌扇雲移落酒鍾碧甯彎象鼻
翠釜出駝峰百歲狂風似無因繫六龍

鉗欽困殘暑杯鐳方興濃歌舞趁晨板歡呼從暮鍾風聲回立鵲

雲影墮奇峰行酒有佳麗未須煩八龍

次韻伯父工部見慶塵忝之什

江夏無雙舊姓黃末科容我出寒鄉人間學子垂垂老天上丹枝
恰恰芳避地本安元結洞擁書猶記贊公房某嘗於鹿苑寺
宜公房肄業豈知

今世持衡者不聽更籌聽織芒

接伴賀天申節北使至闕

流虹壽節慶昇平嵩嶽遙呼萬歲聲毳幕奉琛充日闕綵船卷旆
息雲程九天鎬宴歡魚藻重譯賓筵詠鹿茸聞有芝泥還餞客淮

山佳處擬班荆

送伴回至平江舟中與元覽試茶

壑源春色起雲阿拂拂輕塵動柘羅騎火已驚官焙早注湯還鬪
乳花多清風兩腋添詩興紅日三竿戰睡魔燕領未能飛食肉腹

中藜莧且摩挲

正月十日小園瑞香盛開

天上新春破奇花照野塘靈苞洩蘭麝仙骨傲風霜未放攢丹粒
初開散粉囊亭亭敲寶檻戢戢動春房廬阜移僧鉢平泉出相堂

藥枝識嘉種桐葉認真香左紫空西洛辛夷謾楚湘邀賓須醉賞

莫訴引杯長

子直近日畫筆稍進而棋似倒長作詩戲之

沈郎終日掩柴扉遊藝雖多道日肥東絹丹青真得髓文楸黑白
要知機筆添龍眼防頽壁陣合魚麗孰解圍暇日杖藜須過子一
枰贏取畫圖歸

比賦棋畫詩蒙子直次韻復和

東牀高韻畫兼棋不比尋常似瓠肥莫向謝安爭別墅自同劉子
得天機翻成小窟乖三捷規出神光詫一圍二事相從真可樂籃
輿訪子殆忘歸

園中新疊假山

萬花爭放辟疆園九仞功成對竹軒螯負崇基凌象緯虎蹲深逕
列兒孫闌雕結綠籠芳砌樹翦琉璃破綠痕水遞畦丁飛瀑墮煙
吹童子亂雲屯日晞絕頂金莖露雨漲虛坳玉女盆只欠五城樓
十二便應人指是崑崙

禮部尚書洪公皓挽歌詞三首

沙場握節仗時髦說舌縱橫小六弢委質肯輕從晉鼓摛文空見
泣秦牢冷山韻語名如斗蓮灤危言命若毛豈料歸朝纔十稔白
楊聲裏壽原高

守節冰天十五霜歸來飛語又災方正欣射雁還幽窖旋復飛鳶
墮瘴鄉位不當材僅喉舌壽難酬德遽膏肓八龍共侈荀門慶雖
厄龍蛇殆不亡

高材博識服簪紳玉樹瑤林絕點塵氏族源流推肉譜春秋褒貶
藉調人膝間韻磬傳山水枰上枯棋戰楚秦妙處不傳今已矣遙
瞻遺像淚沾巾

江陰新阡松柏爲大浸所壞累夕見於夢寐

新阡松檟已交柯狂潦侵凌一尺過擬欲移根易嘉本正須抔土
捍層波傷心半夜飛胡蝶觸眼何人是橐駝火迫歸歟親在視定
教枯枿再婆娑

所居二室號書癡禪說各成一詩

枕溪曲室巧涵虛黃卷旁羅恣卷舒單族未應慙四姓寸陰端合
競三餘麟毛不具羞文虎狸骨空傳尚墨豬坐穴藜牀撻掖事那
知新有鶴頭書是日聞有袁州之命

右書癡

多生業果種情田鷲嶺宗風好著鞭要使野狐驚鐵杖莫令黃葉
認金錢傳衣雖落慧能後成佛應居靈運前趺坐蒲團成冷淡比
從人役竟誰賢

右禪說

聞琵琶方響成二絕

赤烏寶女眩新妝九醞霞漿肯見觴但聽琵琶喧啄木誰知捍撥
是龍香

十六寒金犀作槌舊人謾說馬仙期荷間縱有麩賓鐵喚取廉郊
始得知

己卯歲四月二十七日自湖州赴宜春郡餘杭出陸至富陽

發軔出江津晴薰綠野勻泉聲漱沙石嵐翠溼衣巾天近雲衝馬
林深鳥喚人將身入圖畫誰復羨麒麟

觀插秧

秧把東西畦東畦翠芻齊甘心鶴俛啄不用馬行泥井井塍千曲
泱泱水半犁黃雲他日事歡喜舞韶覩

和新城旅店壁間韻

我本臞山澤冠裳絆此身平生只黃卷晚歲誤朱輪妓舞山禽怪
騶呼曩穎暝會當還此笏不愧葛天民

新城道中

已去日邊遠宜春程尚賒呼童秣征馬帶月趁曉鴉橋斷復揭水
路窮還渡沙誰能飾廚傳裹飯野人家

桐廬牛嶺

輿曳入崔嵬連天霧不開驚波掀過雨細路滑蒼苔瞰下憂魚葬
凌高被鳥猜垂堂千古戒底急為名來

入壽昌縣界

一躡壽昌境山深溪水蒼編柴作籬落囊石當橋梁野店炊煙接

官途松吹長石田能幾稔底用穀人忙

姓种人作

壽昌道中壁間有烏石寺詩和其韻

鍾情翠巘倚峻嶒付與芒鞋與瘦藤君賜一麾方作吏天融萬壑

卻輸僧擬將矩矱追廉杜未許機鋒嗣秀能投憤他年應未晚與

君曲室話三乘

早行二絕

屈指雲程路尚賒脂車秣馬鬧栖鴉夢魂正入無何有誰看長鈎

惱睡蛇

二十五聲更漏短那將殘漏費征途鈴齋擬欲尋胡蝶朱墨還應

許我無

晚泊二絕

晚泊牛羊已下來清泉爲我洗塵埃解顏客裏無卮酒壁上尋詩

笑幾回

曲突無煙驛吏忙恩恩弛擔旋春糧統如五鼓還應起早趁南窗

一枕涼

將至玉山

蓐食轉前峰梅黃細雨中濤翻疑鷺翮泉急認松風山合秧畦窄

林深屐路通怪來人語別一置便江東

過九坡

在臨江軍道中

行盡千山與萬山鍾情偏在此煙嵐海波神闕今饒六仙女巫峰

尚欠三雨潤蒙條生翠滴雲封疊穎瑩脂涵卻思九坂修梁第空

使斯人命不堪

寄睦之

室如懸磬眾推賢著草占來命尚遭不耐屢屢愁婦室且歌欵乃

上漁船殺青聊卒檀溪業破白難耕好時田外日同歸羈尚暖依

然清夢遶茗川

贈褚明遠

今歲難衣食知聞莫若君衣裳顛紫鳳隴畝槁黃雲主饋婦求去承家子出分清才豈長窶奇相有龜文

四絕贈馬浩然法師

餐霞吸溼炯方瞳時著青裙拜木公玉女投壺天為笑卻來繡嶺伴仙翁木公

丹成誰羨

伯陽

仙白犬騰空恐浪傳未似尊師得丹訣火耗吞吐

葛山前

魏伯陽

靈桃入手亦艱勤正一門中僅策勳未似趙昇王長在鵠鳴衣鉢已輸君張道陵

舊得陰符

虎口巖

素書漆軸玉函緘君方濡筆書靈篆已有飛來

青鳥銜

李笙

吳真君

子直畫屏索題四絕

一從黃檗逗真機瞥地回光更不疑著腳洞房猶乞食那知羅刹

是歌姬

裴休乞食歌姬院

翬飛華屋浸漣漪曼衍魚龍看水嬉自是翻階戀紅藥哦詩莫恨

十年遲

杜牧之水嬉

人間鐘鼎與山林出處由來異此心既是東山成雅趣底須捉鼻

更微吟

謝安東山

談經難並綺羅邊先聖微言可浪傳四海儒生知敗績後堂何怯

一彭宣

張禹授經

罷職還家漢卿叔賜詩和韻

爝火疇能補大明謾陪朝請趁晨興雖叨荷橐簪纓舊頗愧銓衡

水鏡激夜帳歸來驚怨鶴曉窗穴處縱癡蠅自知浮食辜君賜卻

擬扶犁換斗升

致政宣義王公挽辭

平生志趣漫無求螻屈鄉關七十秋不把楞伽堆案上每將周易

寘牀頭

公不觀佛書而性理自悟手鈔易傳終始如一

天庭綸告榮初命子舍安車互兩

州雲水俄驚遺寶劍幽扉欲啟涕橫流

贈施堯年老人三絕

何須石室祕仙書家有雲英尚藥鑪奕世大年緣底事知君華胄

出肩吾

從今九夏卽期頤小楷猶搜賀雨詩未得雨時曾過我見君憂色

上龐眉

謁叟搯筇步後吳茅簷枳落水平鋪大兒侍側霜飄領猶著荆衣

弄學烏

題曲屏牡丹桃花二絕

不與春風別有因香苞長好四時新曲屏忽見西明種疑有藍關

豎箔人

一枝穠豔欲燒空誰畏門前人姓封豈有落英飄曲檻與兒洗面

作華容

蒙恩除吏部侍郎子姪以詩相慶

雞窗不夢筆頭花分合扶犁雪水涯禁掖俄膺九芝檢仙達許從

五香車厚陵從部尊荷橐

曾伯祖嘉祐中為兵部侍郎

徽廟司成踵棣華伯父

宣和間

任大司成無似鵬梁譏不稱且欣紱冕粗承家

侍郎葛公歸愚集卷三

侍郎葛公歸愚集卷四

宋本卷八

詩

蒙才孺伯惠詩頗及參問

鶴篔蒲團養粹和冥心十地六波羅宦情微似庵摩勒佛行高于
窳堵波海裏泥牛端解笑庵前石鏡不須磨擬詢一句合頭語只
恐新羅燕子過

句祠將離雲間崔申之以詩爲別次韻

荆蘭戲綵關情切朱墨爲官與願違夜鶴帳空周子去秋鱸風動
季鷹歸忍看妙句金聲振行阻清談木屑飛引領吳興何許是碧
雲深處暮山微

崔申之以詩爲別蘇明父郭逢叔各有和章謹復用韻二首

露章瀝血上彤墀螻蟻雖微願弗違韞跡正慙高士傳離羣卻恐
小人歸身同玄豹霧中隱目送孤鴻天際飛丹竈素書今好在臨
風憶子話精微

見遠亭邊送落暉菁山挽我作睽違連年走俗爲貧仕一日投閒
恐富歸谷水爲官輕似紙茗溪轉權疾于飛羽觴捧劍無人問悵
望如今東廣微

次韻施于善謝茶

緗匳香葉裏新英分與騷人取次烹盃裏定疑甘露薦腋邊應覺
午風生色方蒙嶺雖微勝品帶沙溪未苦精客好窗晴聊小試跳
珠急雨看泉清

具上人以詩相別復和之

鉢囊已解何山夏千頃堂前又飽參仙裏未須求七七禪中聊共
說三三遠師今日宜同社彌勒他年可共龕不見生公講經處至
今花雨落麩麩

朱丞相赴宣州四十韻

天祐于皇宋時生柱石賢餘光承祖禰秀氣稟山川應物心如水
臨機直似絃孔書窮竹簡義易翫韋編記問諸儒竦聲華六合傳

虎闈書考異蟾窟姓名先文卷驚嚴助經師拜鄭虔刊讎飽黃卷
遷擢冠青錢稠疊膺神旨澄清出使旌陪都佐畱鑰東道握兵權
慘淡胡塵暗低回漢節堅肅陳鵝鶴列坐困犬羊羶潛拔淮陰幟
爭加祖逖鞭力遮江國路坐沮朔陞煙氣概青雲上忠誠紫蓋邊
龍飛逢履位蛇輔喜差肩遭際風雲會黃緣雨露偏紫荷躋法從
碧落耀卿聯揆事符中辰論文動細氈北扉鄰浴殿夜直履花磚
將略驚頗牧綸言粲許燕覆袍分蜀錦歸燭爛金蓮左轄精搜選
中原付幹旋鳳池邦本正虎帳國威全七校兵屯壯三吳節制專
金甌升揆席玉鉉煥台躔治欲追三五時方會半千蟲臣驚內變
象闕倏妖纏智洗虞淵日忠扶杞國天朝廷終不改宗社復安然
宰路連三入官榮笑九遷和戎頻魏絳遣使屢張騫功紀旂常外
忠居令甲前兩儀歸燮理萬化入陶甄少戇卑周勃傷苛小薛宣
暫迷商野夢來汎霄溪船偃息聊三輔蕃宣表十連敬亭青巖巖
涇水碧漣漣袞繡看于邁鋒車式遄黃麻重拜相又見中興年

不寐

年來百念如灰冷何物關心攪睡眠奠枕不容安丙夜乘輶端復
類丁年曲中誰辨齟齬趣夢裏難成栩栩然只恐睡蛇鉤已盡髦
蠻難到曲屏邊

聞我師大捷虜騎宵遁上時宰五十韻

憬彼金微虜游魂擅一隅筋驚殂老革乳臭立遺雛毒螫鍾蛇豕
虔劉肆狡獪請和包誦詐歸地反膏腴尚爾載書溼俄然信誓渝
不庭時寇境匪茹自干誅作噩新年換青陽室月踰違天輒非覲
掃國敢長驅峒強提凶器飛揚起逆徒酋渠連渤海部曲雜單于
區脫宵成寨兜牟曉援桴刺船窺采石擐甲逼濡須烽火來何急
囊書報不虞山河依睿主社稷倚真儒自昔經綸手惟公器業殊
保江卑謝傅圖霸小夷吾端揆開黃閣中權正紫樞邦基資翊戴
賢路闢崎嶇傳說推良弼周公孫碩膚時危材愈見位重德相符
勇決拔裴度遲迴鄙蔡謨艱難初議在慷慨赤心輸餉道通流馬

疲兵斥濫竽機能乘眇忽謀不失錙銖李郭遵成算韓彭聽指呼
驍師馳建業突騎出皇都疾視冠衝髮先登膽滿軀貔貅人買勇
鵝鵠陣標圖象弭彎繁弱霜鋒運屬鏤捨生如棄吐殲敵甚摧枯
感忽驚飛將神明服大巫羊腸開道路熊耳積頭顱川絳居巢血
原膏下谷俘據鞍來馬援燒艦得周瑜肥水奔餘燼烏江復舊郭
采薇因遣戍破竹遂來鋪折筓盜勞漢箭輪不反胡愷歌旋魏闕
京觀築淮區妖祲西消楚祥星東照吳百蠻應震懾十載謾含糊
公昔居中憲純誠著託孤神扶脫沙漠帝賚陟台衢國勢今安堵
民編靖覆孟百嘉同壽域一氣轉洪鑪行賞頒金印禋宗薦玉瑚
鼎彝刊閎閱簡策記規模國棟從今定邊塵自此無雷霆先帽服
雨露繼涵濡北極羣星拱明堂一柱扶家家鬻釵釧賀酒約同斟
張千里以詩送邵姪銓試用其韻
明堂一柱已扶顛下詔猶求相與椽言並玉卮宜閣筆鑒同金鏡
正持銓驪珠魚目難齊價嫫母西施孰是妍勉矣一鳴驚眾彥莫

將柁蠟誤長鞭

旅次二首

山行确犖趁雲程食寢無多但有名作夢方成雞喚起加餐未竟
馬催行鼓風飛益渾無際歎日吹炎似有聲埃息火流知不晚依
然六幕自澄清

視印宜春一月過寧知平地起風波未成黔突真如傳俄復脂車
去似梭雖快徵君還北牖卻思太守類南柯流行坎止何須問似
覺閒中所得多

綴景亭

以下五詩為章道
祖作頰及葛藤

煙溪雲巘映朱扉聲色叢中入定時十萬丈夫森鐵甲三千宮女
醉瑤池纍纍珠帳露滋顆點點金衣霜著枝心境消融無一物景
從何處綴為誰

踊山閣

橫空複閣面嵯峨影墮前溪瑟瑟波九阪端疑築梁第二山應恐

負夸娥凌雲北固俗塵遠采菊東籬真意多會取祖師端的意此

間萬象正森羅

滄浪亭

滄浪亭下水連溪影倒虛簷鳳翅齊白小牽風動晨鏡碧圓著雨
響秋鰲魚舟點點依蘋渚雁齒依依跨柳隄舊日滄浪元不變何
妨居士為全提

華藏庵

鮮健龐翁今罷參拄杖挂壁雲迷庵開花聊幻仙七七逗機更說
禪三三未辨浮邱招挹袖且邀彌勒與同龕庵中認得華嚴界何
用宗風談北南

錦薰閣

窈窕軒窗小閣深種花十得半晴陰眼根忽墮錦繡谷鼻觀如游
蒼蘂林莫問花枝有開落須知法性勿來今色香塵裏回光照只
者凡心是佛心

洪慶善郎中興祖挽詩四首

登名蟾窟值休辰中外掀騰寵數頻錦帳握蘭榮帝所繡衣持斧
耀江濱兩州民社施張在四水門牆上築新豈料生還杳無日冢
邊唯臥石麒麟

筆下翻翻注九河腹中空洞五車多麟經旨妙傳洙泗公嘗為春
秋解士人
傳騷學詞明尉汨羅公注楚詞
行於世六度有為超梵業一心無累證禪

那龍蛇歲惡賢人逝心折風前蕪露歌
平生氣概凜冰霜聖讀潛心德愈光賞善每能頻擊節避人寧復
解移牀第知中壘序論語誰謫詩仙流夜郎有道固應黃髮壽何
期竟不念長桑

閣茂之年拜伏犀雞豚同社記金溪情深縞紵論交契謹切蓬麻
荷品題花底醉春同挈楫雲中歷妙共扶藜豈知生死今殊路杖
淚佳城憶慘悽

響應山

一派寒灘度白雲幾重危磴遠紅塵奇疆煙合松筠古紺殿香浮
棟宇新玉響碧潭鳴地籟瀑垂蒼嶺挂天紳潛虬未用升雲去乞
取晴天界散人

朝隱病瘧作譴鬼文而差示佳句次韻
挾旬移病臥荒村冰炭交攻水帝魂句詠髑髏詩老在舌飛霹靂
詛師存從居何事四方館譴鬼宜歸白石門壯士高人今藥喜鮮
妝隙地不須論

金燈花

小圃金燈滿意芳苞舒絳采照煌煌珠璣小滴今朝雨縞紵難禁
昨夜霜拂秉麟鬚蛾欲避枝銜螭口蠟猶香列錢都是銀釭影莫
遣狂風入土囊

建國劉夫人挽歌詞二首

變彼閨房秀魚軒後大家鳩巢奠蘋藻翟茀絢笄珈覺海聊依筏
言筌謝算沙平生功用在無疾問毘耶

四德推賢範流芳在管彤植蘭門戶秀嚼蠟世緣空荷橐夫官重
萱堂母道崇相孫仍相婦寂寞闕幽宮

築室以乏金小輟
萍蹤畱異縣小隱卜清茗囊罄欲質史官卑難貫貂揮斤停匠手
伐木斷江湖未有王司馬攜錢過野橋

春日移舟章園二首

冰壺徹骨無纖塵新來結屋茗溪濱傾銀注瓦叟泥飲披錦裂繡
天行春沙平印篆烏浴羽浪暖破綃魚躍鱗一邱一壑志願畢肯
待人招邢孔賓

腰懸六印不用求勝處引人著滄洲波平草輭鷗鳥下花明柳暗
池亭幽兩園牛鳴一舟了三春駟隙千觴酬肯將僕射易此樂瀚

海飛狐雲正愁

大雄寺陳朝檜

俗謂倒植檜

老檜盤擎古殿春空庭坐閱幾朝隤根株橫裂可尋蟻枝葉倒垂

猶拂雲求福端同木居士寺僧云村民祈禱頗驗出靈那效柳將軍黃奴已
斃韓擒虎獨有茲材貸斧斤

侍郎葛公歸愚集卷四

侍郎葛公歸愚集卷五

宋本無此卷

樂府

滿庭芳

催梅

霜葉停飛冰魚初躍梅花猶闕芳叢翦酥裝玉應爲費天工爭奈
江南驛使征鞍待一朵香濃憑誰報冰肌仙子聞早駕飛龍溶
溶春意動寒姿未展終愧羣紅與斬新來上開伴長松要看黃昏
庭院橫斜映霜月朦朧蘭堂畔巡簷索笑誰羨杜陵翁

又和

未許蜂知難教雀啅芳叢猶是寒叢東風解凍春仗做春工何事
仙葩未放寒苞秘冰麝香濃應須是驚聞羯鼓誰敢噴髯龍吳梅
花君自看丁香已白桃臉將紅結歲寒三友久遲筠松要看含章
簷下閒妝靚春睡朦朧知音是凍雲影裏鐵面葛仙翁

又探梅

狂吹鳴籬祥霽翦水分明欺壓寒梅冰威初斂曦影上池臺應有

一番和氣南枝上恐有春來須勤探呼吾筇杖屐齒上蒼苔春
風渾未到徘徊香逕巡遶千回見瓊英一點小占條枚且看先鋒
□豔看看便繁蕾齊開香浮動微熏詩夢須更著詩催
又賞梅

臘雪方疑春曦俄漏畫堂小秩芳筵玉臺仙藥簾外霽瑤煙莫話
青山萬樹聊頻對一段孤妍杯行處香參鼻觀百濯未爲賢吾
廬何處好繡香竹畔偶挂溪邊且爲渠珍重滿汎金船已拌春醒
一枕如今且醉倒花前花飛後歡呼一笑又是說明年

又汎梅

庾信何愁休文何瘦范叔一見何寒梅花酷似索笑畫簷看便肯
嫣然一笑疏籬上玉臉冰顏須勤賞莫教青子半著樹頭酸朱
闌聊掩映崑崙頂上琪樹團欒命兒曹班坐草草杯盤旋折溪邊
數朵瑤蕤汎蕉葉杯寬從教□尊前有客拍手笑頽山
又簪梅

弄月黃昏封雲清曉數枝影墮溪濱化工老手幻出一番新片片
雕酥碾玉寒苞似已洩香塵聊相對畸人投分尊酒認荀陳吾
年今老矣佳人薄相笑插林中愧蒼顏白髮回拔烏雲玉鏡臺邊
試看相宜是淺笑輕顰君知否壽陽額上不是鬢邊春

又評梅

一陣清香不知來處元來梅已舒英出籬含笑芳意爲人傾細看
高標孤韻誰家有別得花人應須是魏徵嫵媚夷甫太鮮明北
枝方半吐水邊疏影約綽娉婷問橫空皎月匝地寒翼何似此花
清絕憑君爲子細推評幽奇處素娥青女著意爲橫陳

又

扉映琉璃窗搖雲母水堂新發雲灣際天波面玉鏡寶匳寬闌外
青山幾疊瑤煙斂影落千鬟寒汀晚蘆花飛雪風定白鷗閒塵
寰何處有方壺圓嶠弱水波翻問何如藜杖此地躋攀種竹今逾
萬个風枝靜日報平安他年事蒼雲屯處千畝看棲鸞

又五姪將赴當塗自金壇來別

栗里田園烏衣門巷別來幾換星霜華陽仙窟翠桁綵衣香夢墮
當塗風月披絳帳欲指鱸堂浮鷗外來尋老子特汎雪溪航相
逢春正好梨舒香白柳曳官黃且相將一笑樂未渠央須念離多
會少難輕負百榼霞漿深深觀舞回飛雪樂奏小宮商

又胡汝明罷帥歸坐問次韻作

江國麾幢邊城鼓角溢川幾報嚴更笑談油幕英傑為時生腹貯
六韜三略新詩就矛槩頻橫功名事他年未晚一筇落櫂槍歸
來何早計白蘋洲畔老穫深耕又何如竹帛彝鼎垂名犀節徵還
伊趁春風外文鵠催行巖廊上談兵齒頰讜論佐休明

錦堂春

氣應三陽氛澄六幕翔鳥初上雲端問朝來何事喜動門闌田父
占來好歲星翁說道宜官擬更憑高望遠春在煙波春在晴巒
歌筦雕堂宴喜任重簾不卷交護春寒況金釵整整玉樹團團柏

葉輕浮重醕梅枝巧綴新幡共祝年年如願壽過松椿壽過彭聃
水龍吟 遊釣臺作

九州雄傑溪山遂安自古稱佳處雲迷半嶺風號淺瀨輕舟斜渡
朱閣橫飛漁磯無恙鳥唳林鳴弔高人陳迹空瞻遺像知節烈垂
千古憶昔龍飛光武懷當年故人何許羊裘自貴龍章難換不
如歸去七里溪邊鷓鴣源畔一簑煙雨歎如今蕩子翻將釣手遮
日向西秦路

菩薩蠻 待酒賞黃花

井梧葉葉秋風晚東籬點點金錢滿開急為重陽日烘深院香
幽姿無眾草莫恨生非早嚼蘂倚池臺壽公桑落杯

風流子

夜半春陽啟東風峭猶帶去年寒歎榆塞戰塵玉關煙燧壯心耿
耿青鬢斑斑又還是一年頭上到日月信跳丸看門帖繪雞曆頒
金鳳酒浮柏葉人頌椒盤幽園春信近簾櫳靜小宴取次追歡

聊□水沈煙裏清唱聲闌况良辰漸有梅舒瓊葉柳搖金縷巧綴
新旛莫惜醉吟親側衣曳荆蘭

又

細草芳南苑東風裏贏得一身閒見花朵繡田柳絲絡岸沼冰方
泮山雪初殘又還是隴頭春信動梅藥入征鞍□月裏暗香水邊
疏影淡妝宜瘦玉骨禁寒 汎金溪上好開幽戶聊面翠麓雲灣
知道醉吟堪老名利難關算書惟意懶宦途遊倦舊時習氣惟有
躋攀擬待杖藜花底直到春闌

多麗賞梅

冷雲收小園一段瑤芳乍春來未回窮臘幾枝開犯嚴霜傍黃昏
暗香浮動照清淺疏影低昂卻月幽姿含章媚態姮娥姑射下仙
鄉倚闌看殷勤持酒色笑也何妨堪憐處東君不管獨自淒涼
算何人爲伊銷斷古今才子篇章有西湖賦詩處士□東閣年少
臺郎驛使來時吳王醉處幾番牽動廣平腸賸宴賞微酸如豆又

是隔年長高樓外莫教羌笛吹墮寒香

又七夕遊蓮蕩作

破波光如鏡三翼輕舟對雨餘重巖疊嶂何妨影墮清流望夫渠
渺然如海張雲錦掩映汀洲出水奇婆凌波豔態眼看□葉弄新
秋恍疑是金沙池內玉井認峰頭花深處田田葉底魚戲龜遊
正微涼西風初度一灣斜月如鉤想天津鵲橋將駕看寶匳蛛網
初抽曬腹何堪穿鍼無緒不如溪上少淹畱競笑語追尋惟有沈
醉可忘憂憑清唱一聲檀板驚起沙鷗

沙塞子詠梅

天生玉骨冰肌瘦損也知他爲誰寒口底傲霜凌雪不教春知
高樓橫笛試輕吹要一片花飛酒卮拌沈醉帽簷斜插折取南枝
春光好立道生日作

去年曾壽生朝正黃菊初舒翠翹今歲雕堂重預宴梨雪香飄
明年應傍丹霄看寶胯重重在腰鵲尾吹香籠繡段且醉金蕉

又寒食將過淮作

禁煙卻釀春愁正繫馬清淮渡頭後日清明催疊鼓應在揚州
歸時上巳臨流要綺陌芳郊恣遊三月羈懷當一洗莫放觥籌

西江月 開鑑

風送丹楓卷地霜乾枯葦鳴溪獸爐重展向深閨紅入麒麟方熾
翠箔低垂銀蒜羅幃小釘金泥笙歌送我玉東西誰管瑤花舞

砌

蜨戀花 冬至席上作

緹室羣陰清曉散灰動葭苧漸覺微陽扇日永繡工才一綫挈壺
已報添銀箭 六幕無塵開碧漢非霧非煙彷彿登臺見梅萼飄

香縈小宴霞漿莫放琉璃瓊

清平樂

子直過省生日候殿試席間作

文章驚世半挹南宮第蟾窟澄輝天似洗折得宵窳丹桂 當□
蓬矢生賢流霞滿祝長年更願巨鰲連釣楓宸第一臚傳

減字木蘭花

四姪過省候廷試作

搖毫鑄藻縱有微之應壓倒萬里鵬程南省今書淡墨名 臚傳
丹陛月裏桂花先著袂雁塔高題王李魏科尚覺低

又章甥築池相望作

張南周北漫說清漳搖紺碧何似幽棲甥舅相望共一溪 璇題
沙版不用買鄰縻百萬餘戶增輝庭列芝蘭戶戟枝

水調歌頭

睡鴨凝香縷白酒瀉無聲郊墟不辨羊酪照筓紫絲蓐此去青山
深處邀得白雲為伴絕意請長纓一舸背君去幾幅布帆輕 帝
恩重容祿隱吏洞庭膝間文度安親得計是揚名珍重金蘭交契
共惜恩恩別去送我幾煙林異日懷君去凝睇亂層岑

玉漏遲

窗戶門環堵山容黛染水光銷暑荷蓋擎煙花映步波神女嫩臉
鉛華掩素無語向薰風疑此晴又雨征鞞隱隱雲洲沙渚 須臾

風卷還晴看香洩丹囊乍飄沈炷魚鮑荷衣珠顆亂傾無數休話
金沙玉井爭似我神龜□處觴爲舉何人解歌金縷

行香子

風透紗窗葉落銀牀夾纈林吹下嚴霜新篔浮蟻班坐飛觴有巖
中秀籬中豔洛中香 金鈿放藥玉粒爭芳慣年年來趁清商不
應素節還有花王看正封詩龜年調太真狂

玉樓春

雪中擁爐聞琵琶作

青女飛花濃翦水寒氣霏微度窗紙人間那得骨爲簾爐有麒麟
尊有蟻 笙簧凍澀間纖指香霧暖薰羅裏底卻教試作忽雷聲
往往驚開桃與李

鷓鴣天

小孫周昨席上作

榴花庭院戲氍毹水翦雙眸畫不如莫恨未能通瑟僖只今先已
辨之無 虎睛淺綴新花帽龍腦濃薰小繡襦乃祖未須貽厥力
及時須讀五車書

浪淘沙

子直新第落成席上作

休看輞川圖未是幽居何如雲水遶儲胥新溼青紅開棟宇霧拱
風疏 小圃秀郊墟花破平蕪五峰列影水平鋪只欠五城樓十
二便是蓬壺

卜算子

賞荷以蓮葉勸酒作

明鏡蓋紅蕖軒戶臨煙渚窈窕珠簾淡淡風香裏開尊俎 莫把
碧筒彎恐帶荷心苦喚我溪邊太乙舟瀲灩盛芳醕

又席間再作

裊裊水芝紅脈脈蒹葭浦析析西風淡淡煙幾點疏疏雨 草草
展杯觴對此盈盈女葉葉紅衣當酒船細細流霞舉

夜行船

章甥婚席間作

百尺雕堂懸蜀繡珠簾外玉闌瓊鬢調鼎名家吹簫賢冑新卜鳳
皇佳繇 銀葉添香香滿袖金杯壽君芳酒喜動蟾宮祥生熊帳
應在細君歸後

雨中花

睢陽途中見桃李盛開作

歸集五

以下奉使時作

壯歲嬉遊樂事幾經青門紫陌芳春未見廉纖膏雨浥花塵濯錦
寶絲增豔洗妝玉頰尤新向韶光濃處點染芳菲總是東君蘇
州老子經雨南園爲誰一掃花林誰信道佳聲著處肌潤香勻曉
試何郎湯餅暮留巫女行雲寄言遊子也須畱盼小駐蹏輪

又和

寄徑睢陽陌上忽看天桃穠李爭春又見楚宮行雨洗芳塵紅豔
霞光夕照素華瓊樹朝新爲奇姿芳潤擬倩遊絲畱住東君拾
遺杜老猶愛南塘寄情蘿薜山林爭似此花如姝麗懶隨輕勻不
數紅稜秋玉一作江陵玉杖休誇花裏紅雲少須澄霽一番清影更待冰

輪

好事近

歸有期作

幾騎漢旌回喜動滿川花木遙睇清淮古岸散離愁千斛煙籠
沙嘴定連艘鵲腳蘸波綠歸語隔年心事秉夜闌紅燭

又

和子直惜春

歸日指清明肯把話言輕食已是飛花時候賴東風無力青帘
沾酒送春歸莫惜萬金擲屈指明年春事有江梅消息

眼兒媚

回至汴京喜而成長短句

暫持英蕩出燕然冰柱凍層簷時節馬蹏歸路楊花亂撲征鞵
如今歸去銀鐙宜見七寶牀邊侍得退朝花底人家爭卷珠簾

侍郎葛公歸愚集卷五

侍郎葛公歸愚集卷六

宋本卷九

餘慶堂賦

歸愚居士汎金溪上有居焉其堂三楹眾戶發樞四阿垂平砌甃
礪潔窗綃耀明陋不至於斧木侈無羨於雕甍其東偏之寢室也
翠被翻波香篝吐穗狀衲僧之夜禪類鰓魚之弗寐西偏之書幌
也下綆汲古捉鼻哦詩風散滿牀之書葉雨溼臨案之墨池有客
過余而言曰凡物之設惟人所處脫逆曳而倒施是冬絺而夏絮
今君之堂其高三十尺其廣四十步而乃障以沙版緹以籓籬是
何異反衣狐白之裘以白地光明錦裁爲販婦之袴也哉余乃徹
雙柱架兩梁載清夢於別宇移蠹簡於前廂於是房櫳疏散心意
舒張室虛而自然生白泰定而發乎天光是謂摧藩籬於大方之
家散羣漚於滄海之洋豈不甚快矣哉爾其戚會賓從時移節換
雕闌煒兮羣葩散錦玉璫平兮月華鋪練或遇結褵之夕或壽懸

孤之且莫不哀詒燕之簪纓粲歸寧之掃瑱倒壺觴於夜永響絲
竹於天半御茲閑達之居則豈復有勃磈之歎既落成客請名曰
餘慶余因謂曰予所謂慶者豈非三聘幣加一札書細焚芟製於
駒谷絢龜章於鴛綴者耶彼以其貴吾知居易而已又豈非充費
疊綵積蚪儲胎峙鈞石於金穴斂億秭於雲堆者耶彼以其富吾
知節財而已苗英裔俊學優身奮舉仙桂於月窟奪錦標於文陣
以是爲慶乎彼得失有數吾知義訓而已鮪背鶴髮熊經鳥申悟
三一於涓子邁甲子於絳人以是爲慶乎彼壽夭在天吾知修真
而已大抵可必者在性而不可必者繫乎時命儻能躬行其可必
而召其不可必者則又何愧於黃卷中賢聖乎在易有之積善之
家必有餘慶

憶菁山賦

已酉之秋羯胡入寇飲馬於江衣冠震聳奔遁僻壤我乃流巖越
佚孤蓬夜馳辭山墩之衡茅棲景山之招提遠兵戈之騷屑翳林

巒之幽奇方且倚沼哇瀛飲酒賦詩豈謂突不黔而又轉而他之
也於是西陽含山東林射里傷去權之怱怱悼郊墟之徧徙方兵
躔於紫微諒繹騷之未已蒼崖翠嶂鬱乎在望怨山人之不來吟
夜鶴於空帳招羽翰之難傳第神馳而心嚮徒想夫蓮宮琳館藻
繡編連紅壁紗板彫當綺筵紫霄西竺之像設絢映乎金碧而緇
衣黃冠飛錫控鶴往往躡虛以冲天而曾未遂於周旋榛荆蒼蔚
之場響泉下灑觸巖舐隈紆餘逶迤怪石涵淵而崩濤搜疏有客
刻戈鋌而激矢而吾又未得洗耳而礪齒瑞草新英羃曆青春雀
舌鷹爪原隰昫昫千夫噉山若筐若筥采擷如雲製騎火而飛翹
塵則蒙頂鷓山日注雙井殆埒美而並珍而吾未得滄以娛賓環
山之麓園屋齊啟玄微沖漠之儔蔑彼名級棲心蘿薜鹿冠芒屨
容與於雲阿者常數十計而吾又未得於草堂而竊吹是皆有憾
焉客有告予者曰子獨不知夫山椒幾楹仙翁所營上設丹竈下
種黃菁雖其人已蟬蛻於埃壒之外而風月之夕猶聞金策之鈴

鈴子益歸尋鼻祖之局乎玄語真銓或以私其孫則可以相從於
椒庭尚何惴惴於斯世之兵余曰唯唯

曠齋賦

山橫雲臥波渺天接鷗沙雁浦清入目睫吾將陳雷乎明秀之絕
景而研桑乎閒中之日月乃吸塵象結小棟宇蘭棖藥房皆中規
矩碧絹耀櫺玄箔垂戶是爲山人處士之廬又何殊豹隱於煙霧
也哉於以琴牛盜維木之聲清也於以棋兔宮蛇穴之勢立也觴
焉而瓶罍罄詠焉而鬼神泣誠可以薄軒冕而謝維繫矣噫行藏
成虧處順安時一絲不挂孰拂天倪吾道重於九鼎世事輕於毫
釐吾不能以所重易所輕也冥鴻罷弋天馬不羈一乍佞賢作牛
黠癡又奚愧乎北山之移

騷

喜閒

白蘋花發兮水晶宮捨此地兮余將曷從斧斤丁丁兮爲余之棲

藥作房兮梁則辛夷朝迎山雲兮暮送雲歸伏臘粗給兮朝市奚
爲薑畦兮芋疇瓜瓠蔓長兮女桑始柔高田兮壤沃麥芒如簪兮
黍如粟下田兮若稜穰稜從兮碧泉亂水不淫旱火不光神之
德兮疇敢忘拜金鋪兮奠椒漿賽鼓坎坎兮錦傘悠颺傾銀兮注
瓦立鯽霜芹兮父老同社鳥勸飲兮風爲啟關宇宙之間誰如我
閒熱官雖好兮寧守菟裘彼有危機兮余差無憂鷹綵縹兮金作
環搏狐兔兮供我之餐馬玉勒兮金作障檀溪深兮躍必五丈爲
人吠兮乃可以佩人之銜爲人鳴兮乃可以食人之粟所貴兮寂
寂而矯矯所鄙兮赫赫而碌碌吾寧爲鴻兮取食於江湖吾寧爲
龜兮曳尾於泥塗

雲仙

木葉蕭蕭兮雨冥冥山鬼呼風兮猿夜鳴巫假神兮驚愚髮假巫
兮乞靈雲仙來兮瑤席啟坎坎擊鼓兮拜寒水雲仙去兮閃倏不
聞錦傘搖兮望莫雲紛姣服兮走朝與暮煮蒿淫昏兮使君怒青

螭白蚪兮不須款帝居請發鏃兮何必天弧沈主兮焚屋正人伸
氣兮淫神夜哭妖止兮俗醇請傾百川兮壽使君鼻亭兮不記營
道蘇侯兮已屏堯廟憤王去去兮響莫出狄梁公兮方草檄
九效并序

王者熄迹風雅寢聲楚屈原作離騷之文頓挫而深華瓌詭而
惠巧驚采絕豔爭光日月惜乎非其時不得以斯文鳴太平之
盛徒鬱伊忿怨傷時憫志卒以身從彭咸之居某也生於昭代
又幸預縉紳後塵則楚人之詞毋作可也然而邇者上天悔禍
將還長樂之轅而固陵梓宮椒房題湊亦復遠至某既喜中興
有期又喜無前之勳成於我公之手而感今懷昔又不能無悲
者是以輒效屈原九章九歌體作爲九效非敢仰追湘纍之逸
步聊欲因瑣瑣之文少見其志云爾

陰陽寒暑兮運無積天之成歲兮顧豈一日羲和敲日兮聲作玻
璃桂魄迎宵兮忽挂之流沙兮揚土簷涔涔兮又夜雨嚴霜苦寒

兮萬木不花葉底兮俄出其芽星鳥星火兮四時有令慘舒閭闔
兮斟酌斗柄三百六旬兮歲功始成細人蠢蠢兮又豈知夫天運

天運

天龍兮負圖地龜兮負書后皇兮純孝格天台袞兮祕畫無前薛
荔兮出之水中芙蓉兮舉之木末碧玉上兮煙霄遠彤霞爛兮秋
水闊重翟兮順動長御兮啟引交鼓兮經瑟簫鐘兮瑤篥御玉衣
兮珠步搖赭黃奉觴兮臣妾入朝建中天子兮百偽紛錯我宋中
興兮天返長樂四海爲養兮子職供千秋萬歲兮慈寧宮

慈寧

珠邱峩峩兮蒼梧遠弓劍杳隔兮九土魂斷邊聲起兮春草深木
鐸無聲兮歲月換上天悔禍兮誘天驕黃腸素紉兮歸路迢迢撫
櫬循題兮愁霧重江河傾淚兮雷霆聲慟行妥靈兮金粟堆白楊
蕭蕭兮風送哀匣主兮肖貌穆將愉兮清廟對越兮在天永蒸嘗
兮千萬年

永固

堅木兮不可爲圈鍊鐵兮不可爲鉤圈不成兮何箕之得鉤不成
兮何魚之求委吳以筦鑰兮復越事狄以皮幣兮興周故曰拯亂
兮不如圖治銳進兮不如觀勢以弱爲強兮以予爲取邊庭無犬
吠兮息旗與鼓

強弱

破紐絕絡兮民不支不了蘭藏兮舉世無醫病在膝兮廢湯熨未
至血脈兮乃施鍼石布指於位兮息至不知陰陽倒置兮寒涼逆
施內實兮餌之桂附中乾兮反投消以蠱天生盧扁兮投術上池
躋民壽兮至期頤

醫國

虎嘯兮風生龍舉兮雲從彈角兮應角鼓宮兮應宮有熊兮重華
風后兮皋繇世卓兮渺渺矩矱兮可尋申椒兮杜蘅揭車兮畱夷
將芽兮擷條芳菲兮滿堂梓人兮善工赤籙兮重昌

君臣

苗芘芘兮防莠桂鬱鬱兮防蠹欲苗實兮桂榮必莠除而蠹去吾
有少陵之鏡兮莠必藉吾有尉佗之器兮蠹將奚逃發嘉穎兮崑
崙繚繚枝兮招搖粒米狼戾兮樂復樂長塗炎日兮又庇之以垂
天之幄

奸萌

歲名名其欲頽兮久棲身於幽仄慮修名之不立兮聊廣遂於前
畫攀玉英以自修兮結榮萑以佩之服芟製而荷衣兮又飾之以
江籬望閩風之板桐兮弱水瀾以見隔造旬始而覲清都兮求仙
梯而未得沐咸池兮晞髮陽阿鑿井耕田兮姑擊壤以歌

自修

吾有車兮山之阿吾有舟兮江之沚任重兮致遠欲行兮誰止車
欲行兮山路槎牙舟欲行兮底著平沙吾不能移王屋之山兮通
襄斜之阪此舟車兮孰推孰挽將豨膏棘軸而強挽兮畏顛泚兮

力疲將編蒲結草而強挽兮憚褰裳而汨其泥欲行石兮乘流吾
當求之梓人之與陽侯

鳴窮

橫山堂三章

陽羨之山兮領地靈鴻洞歛吸兮九疊爲屏青蘿層層兮深巖絕
壁一鳥不鳴兮山更寂橫山老人兮蟬脫埃塵倚石梁兮手攬白
雲眼中萬仞兮胸中萬頃泰華山林兮秋毫鐘鼎東山妓女兮北
山猿鶴西山拄笏兮亦復奚樂節彼南山兮山巖巖突鯨額兮霄
堦間民具瞻兮傾百川以爲壽鴻毋遵陸兮公歸錦繡

陽羨之水兮湍流喧豗砒崖轉石兮萬壑殷雷瀨淺淺兮忽如瀉
哇碧繡兮溪罨畫橫山老人兮樂天無憂聊臨睨兮夷猶擊芳莖
兮大薄拳杜若兮汀洲摹寫兮寶唾傳悲壯兮又雙瑣沐髮兮何
必咸池濯吾纓兮水之湄乘月兮何必牛渚繫吾舟兮水之浦吾
之舟兮萬斛有餘凌陽侯兮狎靈胥百尺揭兮颿席舉撇旋捎瀆

兮無險阻傳說騎箕兮不可攀留此舟兮橫山

陽羨之居兮宅森芒辛夷闥兮薜荔牆建芳馨兮庶門爛昭昭兮
未央橫山老人兮獨處廓十七地兮三一屋龍馳兮冲天花鳥水
竹兮聊爾平泉公有豫章榭枏兮聳萬仞公有瑛玦立厲兮磨而
不磷棟梁兮媿媿柱之石兮不傾以支此棟此石兮非斤非斧盍
以併幪兮寰宇

銘

象戲

余得官宮庠無簿書朱墨之冗於慵者固幸而講投希闕於蒙且
拙者又大幸季夏家食終日蕭然無一事與幼女象戲勝負更迭
乍喜乍憤洎斂子收局勝負迹泯喜憤之氣因隨以息乃作文自
警其詞曰

東平河間挺宗英兮汲古嗜學輕羸金兮倥侗效官謬宮鬢兮南
箕北斗眞虛名兮風轉槐龍夏日清兮枯棋四人稚女并兮摧車

伏馬襲勁兵兮河壩夜渡竟斫營兮喧呶詔呼性命輕兮初無髮
髮出四瀛兮又無額黃分智瓊兮胡爲彼此殫智爭兮勝者抃手
笑絕纓兮不勝蹙額顏爲頰兮斂子收局孰虧盈兮因悟世間枯
與榮兮人曰霄壤我弟兄兮百年一瞬尋香城兮聊從四老從龍
征兮

蛛硯銘

紹興戊午五月余與妹夫章道祖待省試於臨安之資國同舍郎
王叔容言其父大觀間與親黨在都城同待上舍試各有蛛窠罨
其硯眾咸以爲登科之祥已而果然次日道祖所用硯遂結蛛網
越翼日余硯池亦有之眾有聘胎且爲賀語口未幾余與道祖偶
皆預賜第之未越五年癸亥六月二十六日寓居寶谿復有蛛成
余硯三垂披離而蛛巋然其中因作蛛硯銘銘曰
紹興敦牂臯月律變南章北葛書共賓薦摻管南宮差日鑿戰有
斐其几同醉經傳朱墨紛錯詞騁黃絹丙夜忘寢枕弗及奠章子

晨興覩蛛網硯葛曰異哉兆已前見雨雪霏霏先集維霰將步廣
寒樹樹陰轉章曰嘉哉蛛至必荐同登有徵吾寧敢擅翌日丙辰
扶桑未曉葛子墨池絲窠復冒張網置圍幕絡幾徧異事有此舉
子驚羨異時棘場揮灑文卷輔車排陣楊葉穿箭捷書鼎來奏名
金殿癸亥六月薰風晨扇有蛛如粟跂脈閒院陶泓星懸網開三
面文字之祥層出逖見于嗟蚤蛛勞爾眷眷我視世閒窮通貴賤
如泡如影如露如電得之何喜失之何悵進則有爲退亦奚戀月
墓墮寢天虹垂醮補闕噪鵲封侯領燕所享幾何政復一晌聊作
硯銘以警狂狷

文

小樓上梁文

兒郎偉考成版屋何慙南嶽先生未辨石樓終愧香山居士歸愚
老人上韓愈宜春之印歸肩吾雪水之廬芟薙北隅經營後圃將
使樾蔭几席花豔壺觴雖無佛國之優曇尚欠仙家之旌節然鉢

孟傳杜鵑之種羯鼓開繁杏之柯牡丹送婺女之星芍藥醉楚狂
之子漁郎漾舟於桃花之側孺人戛瑟於辛夷之前亦足以暢敘
幽情淹畱歡緒爰興眉屋下視綺原裏裏露梢蒸綵霞而拂檻重
重煙葉展翠幄以承榱有是賞心何辭屬役既謀龜策用舉虹梁
兒郎偉拋梁東曲港飛橋一葦通鹿苑寺前魚酒市趁墟時有杖
藜翁

兒郎偉拋梁西倒景千峰落畫溪一望滄浪芳薄裏幾番驪裏綠
楊嘶

兒郎偉拋梁南鐵鳳華鯨響淨藍飛錫何方來白足爲人時演後

三三

兒郎偉拋梁北蒼卞峩峩生翠滴山人莫遣曉猿驚驛路須防德
璋勒

兒郎偉拋梁上醮幄翻空蔽作帳凭闌細細翫花梢要看春工雕
刻相

兒郎偉拋梁下閒裏光陰買無價蒼苔繡地長鋤痕晉井汲泉生
石罅

伏願上梁之後享衛武之百年朋魯僖之三壽一百九十策榮及
孫曾三萬六千場醉同賓友絲茲福算波及里閭

侍郎葛公歸愚集卷六

侍郎葛公歸愚集卷七

宋本卷十

外制

刑部郎官吳棨除右司員外郎

朕惟郡縣之務釐正於六官六官之務取決於中臺方其萬機投前枉直利病叢見錯出而參稽訂正都公實任其責其選可謂重矣爾久遊庠序號稱文雅洎官於朝用以緣飾吏事綽有可觀庀職憲部績用尤著是用命爾文昌之屬尚勉之哉毋使彌綸省闈之譽專美前世則朕爲得人

權戶部侍郎李椿年落權字

勅古者均九式以節財則三壤而成賦是以調度充而經界正朕恍惕惟厲宏濟中興謂足國裕民無若是急敷求賢傑使二職併舉又無若我已試之舊具官某視身種德剛方不撓發爲文詞典雅純麗有聲於時朕俾爾攝民曹之貳亦旣累年幹邦計正地均咸底成績肆加眞拜僉以爲宜益懋遠圖嗣有褒寵

武功大夫張言降一官

勅武功大夫張言尺籍伍符入募出軍之法有自來矣其入也不可倖得其出也不容苟免而況銓選定格如規矩設而方圓不可欺爾深蒞軍門乃私逸去而欲詭求優調愚亦甚矣揆之三尺當褫一官往服寬恩無忘循省

忠翊郎趙澤降一官

勅具官部使者沓墨無顧藉汝爲權筦之吏輒敢以征之羸薦賄而中其欲朕設官分職如汝輩將安賴乎奪官正罰聊從輕典祇服予訓無忘省循

沈廓降官

殺人致斃詣曹非細事也斃者所遭已酷矣斃之者當如何耶爾爲獄掾閹塞且懦以甲爲乙漫不加省鑄秩一等尚爲寬恩

王鎡兼侍講

伏羲而上易道未嘗不明商瞿以來古義或幾乎隱是以先天之

旨後世罕傳肆求講貫之英我得譽髦之士具官某文詞敏妙記問精醇早歷要津備膺殊眷持橐著論思之益演綸推潤色之工尤工三絕之勤盡得十翼之祕是用不改詞闡之舊俾陪經幄之嚴日侍讌閒密承顧問廣大配天地朕有資於發揮緝熙於光明爾無忘於啟沃往祇明命嗣有褒嘉

湯允恭殿中侍御史

勅具官某蘭臺寺天下之要處也凡官其閒者號登龍門而殿中之任實亞橫榻朕尤遴選其人爾以高明剛果之資輔之以師友淵源之業馳辭對策嘗中甲科及位於朝溫恭恪慎無擇言之闕職於監祀亦涉三時是用序遷夫持危扶顛以迄康乂厥惟艱哉邦灼邦誣何世不有爾其爲朕明目張膽側陞毘筆以須之則爾爲稱職

趙子厚吳棗中興聖統轉官

朕口上穹之命嗣守丕圖裁中興之書襲藏祕殿凡涉編纂咸賁

寵靈以爾子厚文雅疏通懋宗英之美以爾卓高明肅給著時髦之稱或嘗糾正於金枝或預刊脩於瑤牒眷我服勞之舊俾偕進秩之榮惟此褒嘉無忘稱塞

蕭師雄降官

古者定箠令懼笞刑之濫也爾職巡警威信素不格下撻吏弗服致其號呶勃顛顧淫刑以逞而速其斃一何忍哉褫官一等聊示薄懲

程敦厚復官

朕操予奪之柄既不敢屈法以惠人又欲俾麗法者有自新之路故於甄敘必於肆眚之時所以公天下也爾早以時名寢更廡仕自鐫官秩亦克省循爰示渥恩俾復其舊尚勉之哉

趙良傑降官

吏二千石朕賴以牧養元元脫畔法自恣必有受其病者具官某本無長技假守遐方乃敢移經費以益公帑肆其下以剝吾民外

臺併案士官當法不輕尚賴恩減姑褫官一列其務省循以蓋前

傅青降官

推任子之恩以仁其族者法所或許挾罔上之私以濟其欲者罪在不容具官某初乏寸長濫居橫列屬逢大需當尚所親迺以他人冒為猶子究其詭迹難追常刑既準法於一成當鐫官於二等宜念厥咎益務自新

潘真降官

保任之法所以防民偽也傅青之上其親敢以他人冒為己族爾染牘保之曾不以為疑知而保之是同為欺不知而保之亦懵甚矣削官一列是為寬科

王庭淨父倚迪功郎

古者天子問百年而就見之所以欽老也爾之生六百五十四甲子矣享茲耄齒其必有以致之錫以官稱用華其老

孫汝翼降官

仁與義君子所當存心然嫉惡之義勝則有不克全其仁者爾之攝福唐也雖果於嫉惡而疏於審訂有辭丹筆一誤刑遂及於無辜朕方以至仁理天下不可置弗問也削官一等以爲濫刑之戒陳橐父毅馮檝父昌期贈官

朕報天而成郊之祭既逆三神之釐推恩而及人之親爰錫九泉之贈具官某性資明雋文藝精深顯爵弗洎其身餘慶乃壽其後挺生令息實吾侍從之良究所從來繫爾義方之訓俾階華秩申賁閱書尚覲英魂歆此寵命

向子固知揚州

廣陵星紀之墟控帶江淮一大都會也朕念師帥之重每慎所付而爾幹力强濟資稟雋明嘗鎮是邦習其風俗去官三載豈弟之思在於人心是用申命昔黃霸再臨潁川寇恂再臨長社咸有嘉政播在青史至今以爲美談爾其勉之毋使治聲減於前日

米友仁贈官

方抱微疴已許垂車之適遽淪長夜徒興過隙之傷眷時在橐之英申賁密章之贈具官某生自名闕揚於要津材久擅於剽煩智每優於博古辨魯宮之科斗識蜀地之罅于方倚盡規俄聞易簣宜峻升於品秩仍俾祿其後人諒惟英魂歆我寵命

方滋知廣州陳璫知靜江府

朕撫四海之封每軫得人之念重十連之寄益知謀帥之難矧惟二廣之區密控五嶺之阻蠻獠荒忽風俗剽輕宜得幹方之賢以專分閫之任以爾滋性資通敏智術精深其升延閣之華往鎮番禺之壤以爾璫蚤繇材諳備著聲猷輟持節於漕臺俾剖符於桂筦若其兼威懷以服遠孚豈弟以宜民各所優爲奚俟多訓

張微降官

上以奉公而下以恤民者縣令職也益陽月輸緡錢汝剝民而取之公則濟矣其如民何削官示懲務往循省

劉貴陳進贈官

寇攘囊橐巨浸擾吾赤子女能奮身搏戰以至持忠入地朕心惻焉兩官裒贈且恤其孤魂而有知歆我休寵

錢雋之降官

昔齊宣王以羊易牛孟子謂當推是心以愛人今汝錄解牛者繫之而剝其財至瘼死獄中則是人命反不若牛之重汝何用心逆人道也褫官一列以爲殘忍少恩者之戒

趙士彰兩浙運判賈直清江東提刑

環江浙以置州孰匪股肱之郡分漕刑而命使是資耳目之司惟經理之勤則不匱於輸將惟服念之明則罔差於關決式頒新命允屬通才以爾士彰發策決科風推賢於肺腑以爾直清蒞官行法每馳譽於簪紳並膺側席之求各昇觀風之任惟吳會密連於帝所而江壖實奠於畱都悉旣乃心以佐予治

徐棟太府寺丞

受貨財之入頒於受藏之府者大府職也爾生於名閥素嫻文藝薄正鉤檢又孰見聞其陟於丞以佐而長

權戶部侍郎宋貺落權字

天下之事萃於文昌臺而地官爲尤劇異時天官司會地官司民所掌今又總之矧少常伯爲侍從高選非弘才碩望朕弗輕畀具官某持心行己敦厚而肅括以素所蘊施之於政恢恢乎有餘也攝承滋久非特善於其職而論思啟沃實簡朕心爰錫贊書俾加真拜爾其知取知予足國足民無爽貨泉之柄則予汝嘉

曹紹先趙公懋降官

婢雖賤役憫井臼之服勤汝實忍人迺鞭笞而致斃亦人之子也何爲至是哉聊褫武階尉其幽魄

沈虛中吏部郎官林機禮部郎官

董正三銓位獨先於選部參稽五禮職尤重於儀曹敷求望郎我得髦士以爾虛中宏材經遠術業兼貫於九流以爾機厚德鎮浮

文藝嘗魁於四海攝承滋久譽處彌休念二廳存省眼之稱而南宮有舍人之號肆加真拜實副僉諧益懋爾猷以祇予訓

封周降官

剖千里之符非仁不足以惠下非明不足以察姦汝之爲敘州也興譙門之役而斂及齊民其屬市馬指駝爲鶩恬不加察安在其爲仁與明也鑄官一列以爲汝懲

張官致仕

持紫荷之橐久資造膝之忠從赤松之遊遽有垂車之請重違雅志爰錫命書具官某厚德鎮浮至誠格物孝友賦秉彝之美文詞推振藻之工內貳銓曹眾仰提衡之譽外臨藩服民多臥轍之畱方爾奉祠何期歸政其進中臺之秩用侈西清之華勉專精神永綏壽祉

賈堯民降官

人以戰死而官其所親欲以勸忠義也若乃死者被其酷而官者

非所親則必有爲之奸計者爾爲帥屬乃敢比奸共爲欺冒理官蔽法當禡兩階宜自省循服我寬坐

李嗣慶降官

漢兒寬以負租課殿當免民恐失之輸租不絕課更以最初未聞恃刑以辦也汝政拙追科乃掠民致斃一何酷哉貶官一列以謝其冤

張昶降官

均田畫疇則肥瘠以成賦詎可容私意也爾不能察豪吏戶中沃田更爲斥鹵有害稼政其可不懲姑從禡官尚思省循

陳誠之權禮部侍郎落權字

朕肇開中興以軍旅易俎豆邊陲徹警人文載郁正賴成德之彥講求參訂舉陸典而新之具官某器識高明術業精贍頃奉大對安上治民之旨形於文詞朕固嘉爾知禮取以冠多士矣旋被簡擢攝承春卿之貳又能觀時會通以振矩矱肆加真拜其誰曰不

宜書不云乎夙夜惟寅直哉惟清朕所以望爾者如此可不勉哉
韓仲通權刑部侍郎落權字

倡九牧以阜兆民實重秋卿之寄欽五刑而成三德尤嚴憲部之
官惟予法從之英久掌條章之重俾加真拜庸示眷懷具官某資
稟剛明辨智宏達徧歷司刑之屬藹稱任職之臣降典折民深契
伯夷之旨援經斷獄有同董相之能遂擢居於禁林俾攝承於卿
貳屢更歲籥申錫命書惟緩死者君子之爲而屬極者哲人之事
儻知懋勉是稱寵嘉

湯思退除起居舍人兼直學士院

螭坳載筆職思注於外廷鑾坡代言奉諮諏於中禁皆朝端之妙
選乃儒者之至榮以爾識慮靖夷材資英敏藹多文之譽早中異
科讀未見之書久儀祕府植此淵源之蘊發爲灑噩之文爰卽師
言俾兼華貫右史以記動爲任朕方□一己之修王言以尚要爲
工爾其聳四方之聽

王葆除司封郎官

晉之執秩齊之主爵蓋今日之封曹也事省而選高非一時英偉
之士朕不輕屬焉以爾德盛而牧謙記博而守約性樂易而強於
爲政可謂賢矣封曹之選爾嘗攝承肆命爲真毋忘報塞

王曦除禮部侍郎

虞朝典禮爰命秩宗漢代絳儀時推稷嗣朕適圖純治蒐舉彌文
敷求朝著之賢貴以春官之貳具官某持身肅括迪德粹溫詞源
倒三峽之流藝圃洽五車之富兼內外之制久覃思於絲綸交南
北之歡方遄歸於英蕩是用升華法從庀職文昌宜夙夜之惟寅
以旦夕而承辟我知厥若汝永有辭

錢炳降官

罪以赦減者宜知恩罪以首原者宜知過汝之丞鄱陽也公罪以
赦減私罪以首原亦可謂幸矣尚當褫官不可以幸爲常而不戒
也

趙述團練使

爾祖宗獻公佐佑我祖肇開赤籙有大勳績紀於旂常朕念厥後弗昌惻焉興念爰因勞使以寵其裔孫具官某性稟明雋資尚謹孚上閣聯華久儀軒陛比者銜命修好揚旌出疆懋著猷爲當有明陟是用特刊武階正兵團之任非獨獎爾之勞抑欲慰爾祖廟趙彥璧取應合格承節郎汝羣宗室子程式有司而中其選雖不及預集英之游特畀一官於汝寵矣

侍郎葛公歸愚集卷七

侍郎葛公歸愚集卷八

宋本卷十一

外制

潘瑞卿降官

朝旣盈矣敢愆辨色之期書用識哉難廢馭威之典具官某早緣戚晚寢躡華資當益懋於恪恭乃自安於慵放奸此慢朝之禁遂貽貶秩之差聊示薄懲尚宜自訟

李如岡磨勘轉官

周八法治官府官職處其二而以官計終之因材德之懋而任其職因歲月之成而弊其計蓋並行而不可偏廢也具官某行文操履秀於士林絲歷要津榮問休暢朕固嘗授以小宰之職矣今攸司計歲課已闕一閏格當增位朕亦奚愛焉往服恩榮毋忘祗載張曦大理寺正

大理有正下聽於吏而上告於大司寇其責重矣爾甚敏而文丞於棘寺有平允之稱肆以敘升僉議惟穆爾其悉聰明致忠愛察

小大之比庶乎無冤民尚其勉之

吳國大長主孫潘昌期等補官

朕於外戚無私澤至於彝典不敢有廢焉爾等吳國之孫咸知樂善賁以初命尚克欽承

莫冲宏詞轉官

朕設詞藝之科以羅天下英俊蓋將爲異日用也爾妙齡警敏穿古貫今舉芳味腴自鑄奇藻既中有司程度可無勸哉肆加榮級嗣有褒寵

章燾大理少卿

刑一成而不可變故凡隸職於廷殿者必求已試之舊庶幾見聞習而條章審民以無冤爾智能強濟經術該通嘗命爾司直司丞而又俾爲正惟察惟法咸適厥中洎官憲曹持心忠厚惟刑之恤則助朕廣好生之德者莫爾若也今茲理卿虛貳肆命往職誰曰不宜其惟有終則稱朕命

陳相樞密院檢詳諸房文字

朕惟樞廷設檢詳之官非特賴以理閱辭案程督期會而已亦使與聞國論非周密謹乎之士不輕畀也爾文藝精醇風度凝遠曩庀編摩之職承攝於是已著靖慎之稱矣而糾族司輿又藹華問是用命爾易不云乎幾事不密則害成可不戒哉

晁謙之轉官

三載考績六計弊治虞周之懿典也朕規矩往制允釐百工檢結吏勞三閱歲攷儻文無爽俾以序升具官某持身端亮稟德粹溫好古而文弗畔家法人持從橐出典方面藹言語政事之聲比者銓曹上聞已應會課爰加品秩是日彝章其克欽承嗣有褒寵巫山神封妙用真人

朕撫四海之封秩百神之祀儻介惠民之福宜膺錫命之榮以爾道格兩儀神周八表聰明正直有嘉肝鬻之通祈禳禱祠屢協豐登之應爰頒懿號以侈仙游其大庇於我民庶克承於朕命

威惠善濟廣祐王加封

冬無愆陽而夏無伏陰雖繇於天相風不鳴條而雨不破塊亦係於神功爰錫寵靈以彰休應具官某肖儀霄極血食上饒每介福於民編屢升華於王爵不違瑞祝克協豐年屬者南畝未秋西郊不雨方傳芭而代舞遽霈澤以隨車會邦人之有言騰奏書而來上爰加廣祐之號用光孚惠之祠永福此方庶安命祀

靖懿夫人加封

帝子降神第興歌於湘渚瑤姬立廟徒幻迹於巫山苟利澤之有聞在衷封而敢後具位作配威惠備著炳靈丕應祈年屢諧豐歲魚軒象服爰錫號於小君桂酒椒漿永奉祠於支邑

趙逵左承事郎簽書劍南東川節度判官廳公事

朕遵二歲大比之制集多士於廷操觚濡毫競奮英藻有居首選錫命惟優爾來自遐方入承大對議論文采卓爾不羣丙夜以觀當冠諸彥肆授京秩賓介於梓潼以便爾父母之邦恩則隆矣宜

厚自涵養務植德立行則朕寧久遺爾於諸侯哉

王貴父琳王彥父成贈官

朕裸鬯大室燎煙圜丘祖宗祇歡天地並貺宜有惠澤溥及臣工具官某執禮以檢其身種德以燾其後克生令子爲時幹臣茲因銓曹之上聞迺錫憫書而衷贈尙期冥漠歆我寵靈

蕭振磨勘轉官

寓西清之寶儲寢更時序校中銓之吏考爰錫贊書具官某挺敏政之材藹洽聞之望蚤緣際遇徧歷清華蒼弁天鄰尚芟甘棠之蔭赤城霞蔚今聞秀麥之謠會年庸已應於彝章肆爵秩誕頒於新命往祗寵渥無怠欽承

曹筠集英殿修撰

朕惟集英論議之聯位亞甘泉侍從之列載疇壽俊特賁恩章以爾德茂才宏行修言道橫經槐市士每服於精醇執憲柏臺眾共推於端亮眷茲末里密拱行都千里允賴於承流三月遽聞於報

政爰疏榮於書殿庶增重於侯藩其務欽承無忘稱塞
陳全降官

國朝制祿視秩之崇卑而爲豐殺汝敢羨格羸取匿不自言沓貪
甚矣褫官一列聊爲汝懲

王繼善醫有勞轉官

岐黃之祕素問粗傳和扁以來妙義滋闡汝克知究復號稱良醫
給事東朝頗著忠恪升官一列用顯汝勞

杜繼忠陳亡□□補官

汝父素號驍勇邊場搏戰遠殞元身朕傷忠義之魂而喜存者之
可與嗣也初官命汝往其欽哉

張忠元磨勘轉大中大夫

大中之秩漢制比千石而國朝號四品庶僚雖侈庸歷不得輒授
至侍從之臣則聽焉其官可謂重矣具官某德行文才藹然譽處
畫諾長樂蒙福於屬城桴鼓不鳴坐以無事今者攷閱計年當升

厥官朕不敢愛所重也勉稱恩榮嗣有褒寵

曹筠除敷文閣待制知成都府

緣雲飛閣襲窳考之圖書濯錦名城宅蠶叢之壤地特頒明命併
授眞賢具官某道直氣平文高行整奮霜稜於烏府有嘉糾正之
能振風力於龜峰直著蕃宣之效會坤維之謀帥寵從橐以戒途
旣專外閫之權實倚長城之託往祇予訓益懋爾猷

吳垞成都府路轉運副使

井絡之隅素稱富盛比年以來官無浮征民享豐歲用益以饒而
爾疏通敏明裕於心計委積輸將宜非難事是用付汝漕寄欽哉
理財思乎義裕國志乎民人或以爲難而君子以爲易也可不勉
哉

范生降官

事魔習妖具存三尺假神疑眾實預四誅汝職字民所宜致察暨
茲爲幻乃罔聞知其削榮階庶知訟過

沈調提點諸路坑冶鑄錢公事

非人物地必資厲禁之嚴泉府受藏宜察流行之濫邦財所繫使
命匪輕而爾識度靚夷材資明雋薦更任使蔚著聲猷輟從漕輓
之司式副權儲之寄往虔中詔期訖外庸

梁汝嘉知鼎州

朕眷禮臣工初無中外之間簡求師帥曾何遐邇之殊爰錫贊書
用寵賢喆具官某忠誠許國肅括禔躬聯喉舌之司坐致版圖之
理牧股肱之郡眾推屏翰之良眷茲武陵今爲重地溪湖制險民
獠錯居思得共理之良以重分憂之寄其起祠官之逸往臨民社
之優欲慰遠人勉圖寬政

不微式武

設官有文武之殊用人無輕重之間儻從所便奚憚改圖爾前襲
儒冠嘗寓東觀之直今還武弁歸服南班之聯仍授兵團以光宗
籍

不羈直祕閣

朕廣天下圖書實之祕閣寓直之選宜惟艱哉爾宗正之子秀於
士林特頒異恩以慰而父

王述降官

國家則壤成賦計畝受田輸粢於公吏當存察乃容私屬以麤爲
精失職若斯其可佚罰

周綰成都路提刑劉長源湖南路提刑馮忠恕夔路提刑

朕慮四方典獄罔察於獄之麗民有受病者分遣使指每難其人
以爾綰忠恕器博識明持心近厚其往分按二蜀長源強濟疏通
仁而能斷其按湘南朕自以爲得人矣各懋厥職使所部無冤民
是爲報朕

喬士立降官

取齎於民非所宜取以其所取而予已之隸非所宜予汝何足以
知此然法之所在不可不懲也

韓世忠除太師致仕

盡瘁於國久輸衛社之忠諫疾於朝忽露奉身之請禮宜從欲恩特疏榮曷爲進退之光用輯始終之眷具官某性資英果知略沈雄素馳玉塞之名肅稟金方之氣六奇制勝坐攄帷幄之謀七萃宣威屢奏邊疆之捷馴致征輦之戢益堅帶礪之誠苴茅異姓之王受鉞三方之鎮何期謝事遽抗封章其峻陟於帝師用增崇於勳閱噫趙營平之就第豈徒四馬之恩李固始之乞骸加賁三公之位往祗休寵益介壽康

韓世忠贈通義郡王

吉祝無憑莫起河魚之疾遺占來上俄興隙駟之傷眷予心膂之臣久寄爪牙之任宜頒密贈用侈泉局具官某烈概凌霜純誠貫日氣稟山西之銳書傳濟北之奇際雲龍千載之時居貔虎萬夫之長行軍用將理無探簡之難陷陣摧堅勢有建瓴之易威揚紫塞功紀青編胡不永年遽淪長夜乃度峨眉之壤追封通義之邦

易受王章錫茲帝祉噫克遵廟算坐消赤白之囊遐想朝儀惟有丹青之像尚期冥漠歆我寵靈

劉全母陳氏封號

身登耆耄之籍子預簪紳之聯而朕徹奠瘞之享其可無澤哉

吳近降官

君子以義制欲小人以欲忘義至於忘義亦何所不至哉汝所爲至此殊駭聽聞聊褫一官毋蹈後害

士樽嫡母王氏吳國夫人

禮行於郊既秩升柴之祀母貴以子宜加告第之恩眷茲女士之賢媿予屬籍之近肆頒一札用詔九泉具官某淑慎柔嘉溫恭婉婉克懋鵲巢之德夙著鳴鳩之仁胡不永年蚤淪長夜雖小君錫號已荒定武之封然大國未加爰賁東吳之壤懿靈如在寵命其歆

故妻李氏夫人

男子之願有室蚤與匱鑑之悲婦人之爵從夫特賁笄珈之贈具
位言行昭乎壺則慈儉足爲母儀進饋嗣王媿德宗正克敦賢操
綽有大家之風胡不永年宜錫小君之號翟茀雖榮於身後鼎鐘
無憾於生前尚覲營魂歆我恩渥

趙伯耆等轉官

肺腑枝葉之屬能捐驕汰之習已足嘉尚汝乃能以文藝自奮試
進士中其科可無獎乎升秩二等以爲吾宗之勸

謝邦彥大理正

魏晉之間以正監平爲廷尉三官而正尤爲要任爾仁明審克藹
儒雅之稱官於理寺亦淹歲時肆用序升無忘報效

士遜贈觀察使

華簣沈繇謂當勿藥逝波遷謝忽上遺占歧宗邸以興嗟錫閱書
而褒贈具官某持身飭愿臨事敏明久聯環列之優已畀兵團之
重載疇崇級俾加位於廉車仍侈新封肆疏榮於侯社英靈未泯

寵渥惟歆

侍郎葛公歸愚集卷八

侍郎葛公歸愚集卷九

宋本卷十一

表

謝賜戒石銘表

臣某言天語丁寧誕傳寰宇雲章黼黻俯逮私門祇奉匪頒惟知
欽佩中謝竊以太宗皇帝憂國若渴視民如傷虞郡縣之吏洵食
以瘞官慮姦貪之臣瘠人而豐己親紆寶思申勅庶邦立爲戒石
之銘光動奎躔之次庶乎委質之吏咸有奉公之心而乃睿訓弗
昭攸司尚闕雖知惇史所載固磊落而畢陳然非邇臣再書殆洪
汨而難見恭惟皇帝陛下勵精庶政聿圖康功以孝奉先故宣布
前朝之美以仁利物故發揮永世之規以謂德宗嘗製台衡之銘
明皇大頒令長之戒猶傳琬琰顯示臣鄰矧惟昭代之彝章實作
萬方之藥石儻稽遐布曷示深慈爰錫輔政之臣俾奉如絲之旨
臣敢不丕承德意上體格言孫子襲藏永作視中之寶晨昏警戒
揭爲座右之規

謝喜雪御筵表

以下權禮部郎官日南宮表此篇邵氏西山集所載誤也

燭龍照山優渥已彰於天瑞游魚在藻燕胥曲荷於君仁命出九
闈慶均百辟恭惟皇帝陛下躬持慈寶默運道樞時調玉燭之和
氣協瑤花之應三靈孚祐九扈兆豐肆頒湛露之恩大作需雲之
宴帝觴有衍朝弁無譁移方丈之仙山奏鈞天之廣樂賞同梁苑
凝眸悉預於奇觀享類鈞臺鼓腹盡沾於飫賜臣濫叨燮理實預
榮懷秩秩初筵已敦崇於禮貌悽悽丹悃誓歸報於忠嘉

賀正旦表

氣肇青陽誕布始和之令春回丹禁聿修首祚之儀慶錫三元歡
騰萬宇恭惟皇帝陛下疑神昭曠受命溥將并鉞參旗戢師干而
弗用箕風畢雨霈解澤以旁流何福不除有室大競臣等獲叨慶
賴久冒慈憐鴛綴充庭共仰瞻於北極椒觴薦壽敢虔頌於南山
四月日蝕陰雲不見表

辰弗集房謹靈臺之前告月離於畢彌天宇以垂陰弗彰薄蝕之

容潛護照臨之體喜先中禁歡動四方恭惟皇帝陛下知天所爲
順帝之則曲盡彌綸之妙靡愆賓餞之宜惟茲內壤之輝適肯正
陽之月側身退省降鑒孔昭臣職在弼諧事關燮理望璇霄之縹
緲已收有滄之功拜金殿之峇堯願祝無疆之壽

日蝕不及分表

官占常度前知陽照之當虧德動蒼昊俄見蝕分之不旣清臺襲
吉薄海騰歡恭惟皇帝陛下道契乾元功參離照撫寢明寢昌之
運得寅賓寅餞之宜惟圍月適屆於正陽而靈曜乃侵於內壤聖
躬修行天鑒儲休如月之初光尚全於半壁自天申貺福永固於
丕圖

賀太陽當虧不虧表

日官推筭前知薄蝕之期天子當陽默運彌綸之妙氣屏羣陰之
沴祥開五色之華中賀竊以日月之行有疾遲躔度之及則交會
先事慮事象預察於璇璣當虧不虧時遂和於玉燭照臨所逮踴

躍惟均恭惟皇帝陛下寅畏享天欽聰稽古體商高之正事邁周
宣之側身內壤韜光初共虞於愆忒太清騰照今全仰於昭明妖
氛消廓於邇遐蒼雲承戴於上下顧茲休應實祚丕圖臣等庀職
近司蒙休熙旦慶浮天幕曷施救日之弓歡動宸旒願祝後天之
算

謝賜衣表

寒律肇開已屆始裘之候皇恩下逮猥頒在笥之珍拜舞以還曳
婁增愧中謝竊以遺賚絲褚漢文獨賜於藩臣解錫襜褕光武第
加於驍將未若霈寶慈於列位錯文篚於周行均戴龍光共深雀
躍恭惟皇帝陛下謙光遇下晉晝接人布明明之德而衣被四方
昭燦燦之儀而粉飾百度致茲臣竊冒玷恩華臣敢不盡瘁王家
協恭公上庶乘軒之鶴少逃竊位之譏而在梁之鵠無復冒恩之
誚

賀雪表

同雲彌望布清灝以垂陰密雪應期協康年而呈瑞載塗流詠薄
海騰歡恭惟皇帝陛下體御至神幹旋元化撫五辰而致順閱眾
甫以咸宜致茲六出之祥來應一陽之候飛花翦水舞青女以縈
空互陌連阡於黃雲之若接臣承休天陛庀職臺司奉萬壽之觴
虔祝延鴻之算引七星之縷敢言燮理之功

代人謝賜生日禮物表

駟使星臨芝封天降曲記始生之旦旅頒多物之儀祇荷慈憐徒
深感惕伏念臣親逢亨會寢躡榮塗職庀金華術業何裨於廣廈
班通黃閣謨謀莫效於嚴宸方懷冒昧之慙翻享便蕃之賜牧分
生餽尊漾香醪珠春穉稷之良玉屑枕椰之美駢茲庶品併賚罔
功此蓋伏遇皇帝陛下禮備養賢仁深接下特存彝制寵示恩私
飫賜所加已拜匪頒之渥素餐是懼敢忘盡瘁之忠

謝春衣表

青春三月時既迫於載陽丹禁九重衣特頒於在笥雖動曳婁之

愧敢忘衣被之仁拜受省循凌兢罔措恭惟皇帝陛下緝熙庶政
藩飾羣工親御弋綈事每聞於克己寵頒束帛禮特厚於優賢粲
然箱篚之儀溥及簪紳之列臣祗膺緡賜銜荷湛恩顧影知榮共
託章身之煥不衷是懼深虞濡味之譏

賀冬至表

伏以葭苧潛動氣騰緹室之和芸荔已萌陽應黃宮之候雲容呈
瑞日馭迎長恭惟皇帝陛下精一執中時幾勅命不役耳目陶萬
寶於化鈞載戢干戈納含生於壽域對初陽之令節藏亞歲之上
儀萬福攸同四方來賀臣叨榮端揆率屬周行春八千而秋八千
共祝延鴻之算躡三百而躍三百徒深忭蹈之誠

代人辭免樞密表

渙號誕敷俾參華於樞筦微情自揣難冒處於王靈再貢忱詞仰
塵淵聽伏念臣才非識變學昧知方晚逢熙洽之朝叨被聖神之
眷徧更三院曾未累年雖夙夜在公粗知竭節而佐佑厥辟實愧

菲才儻膺非據之恩必有疾顛之失伏望皇帝陛下遴選所遇燭
知不能謂假人以名器者徒紊官常而運籌於帷幄者宜歸髦士
收還成命允協師言

謝吏部侍郎表

參宰士之聯愧乏絲毫之補拜天官之貳忽膺綸綍之褒冒寵若
驚撫躬自懼中謝伏念臣昧道懵學力薄才榆枋第窘於小知

瓶罌豈容於大受早年抗志妄伯仲於時髦末路多艱每參辰於
世態貝錦虛織鈞天夢遙甘心麋鹿之羣絕意鴛鴻之綴會聖明
之躬斷招賢哲以彙征誤令鯁腐之蹤獲預官施之列握蘭未久
遽叨省闈之彌綸持節方還俄寵甘泉之侍從昧冒若此報稱謂
何此蓋伏遇皇帝陛下大振宏綱兼收眾智欽識百辟之享灼見
三俊之心謂老馬初能識塗特加銜策而焦桐或爲良木諧以宮
商猥加馭爵之私更賁章身之寵臣敢不益堅素履更詭後圖恩
重如山永佩生成之賜命輕如髮未知糜殞之期

謝袁州到任表

職冒典銓罪當去國籍刊司敗恩許拜州顧寄重而力絀惟感深而涕隕伏念臣涉道尚淺其愚不移會神聖之有爲攬賢豪而無外鶴版蒙招於散地鷓行獲廁於英游旋被眷知誤膺掀擢節韜英蕩冒虜使於鄰疆筆遙荷囊班從臣於禁路方欲效一奇畫半策於黼展之側校三實取四才於銓筦之中略未究於弛張遽自貽於汰免今者皇明洞照聖度無私特紆尺一之書俾曳丈二之組起廢錫命肉骨戴恩茲益伏遇皇帝陛下德懋旁求喜存善貸聽禹韜而樂善談湯網而垂慈致此妄庸猥叨甄敘臣敢不勤農桑之勸課戒獄訟之繁苛宣化承流躬布朝廷寬大之詔興利除害俾無田里愁恨之聲

賀皇帝登寶位表

祇奉慈謨纂承天序聖人作而萬物覩共看愛戴之心元首明而庶事康行迪泰和之治天地並貺夷夏均歡臣某誠懼誠忭稽首復頓首恭惟皇帝陛下遙駿有聲懋昭大德稟成湯之齊聖體帝舜之溫恭太僕奉車已應大橫之兆上卿授策光臨高邑之壇萬福攸同四方來賀臣考槃幽澗浮食真祠莫陪振鷺之庭以覩飛龍之御接千歲之統旣欣曆服之有歸上萬年之觴行慶版圖之盡

侍郎葛公歸愚集卷九

侍郎葛公歸愚集卷十

宋本卷十三

啟

謝改官啟

臨軒引對獲瞻玉色之光書贊疏榮繆廁金闈之籍已則知幸人
誰謂宜竊以本朝體貌輔臣特頒異數每歲鑒按羣彥實有定員
謂中臣徒事君以身而君子則成人之美然被薦者不拘所部非
所部故射進者不揣其可稱無可稱紛如蝟毛得者鱗角一言賜
諾重已過於黃金半字垂褒榮更超於華袞豈特應一時銓曹升
改之格亦將爲後日廟堂獎擢之因不有軼材曷光清舉如某者
地勢甚下天資不高早妄意於世科遂服勤於胄席雖習乎習必
審是而勝非顧辰乎辰每來遲而去速勉從門調得齒仕塗中緣
陟屺以纏哀復以尋戈而避地低回百僚底荏苒兩紀餘未曾作
賦而感已知第數爲文而酬客難昨效官於鹽筴方停於海隅
懇求祠岳之備員歸展親庭之私養在塗輒爲置散無課最之可

書郡太守慰薦所不霑部刺史清議所不及非藉品題於舊弼殆將坎壤以終身不度庸愚勉自奮激幸諸公之過聽抗露版以繼聞黃緣推轂之恩僥冒在庭之數茲蓋伏遇某官天之先覺古之謀人爲庶事之著龜實眾材之衡尺一昨入秉機政仰佐睿明威聲遠愴於蠻夷勲業有光於彝鼎定訃謨於三事暫停傳說之舟發與義於六經今下馬融之帳補展注意韋布宅心顧謬辱於言揚期終歸於器使誓堅素履仰報鴻私

謝及第啟

提無援之孤軍謂當折北奮卑飛之弱羽敢冀圖南忽驚較藝以奏名繼冒臨軒而賜第逢辰特幸揣分奚堪竊以國莫重於人材士要先於器識虞夏商周之際本德義以明揚秦漢隋唐以來用文詞而博舉蓋深於涵養則其歸必至於渾厚而慎於踐履則所到未易以測量惟睿主之作成斯賢才之觀化國家偶中否之運聖上挺勃興之資當用武而尤急於搜賢方在疚而不忘於試士

以賢良籲俊而仍舉三年取士之制以詩賦掄才而兼求六經探道之人既容門子之登場又集宗英而戰藝欲仗髦俊之眾共扶基本之強宜得英能以光拔舉如某者碌碌餘子空空鄙夫早被訓於鯉庭旋摳衣於虎胄大小百戰首末十年抱槩懷鉛屈首短檠之燈火汗顏血指何心長鋏之車魚得齒官聯本緣門調侵尋歲月奔走塵埃念弟兄中第者四人而父祖聯科者三世失壽陵之步恐負初心學裘氏之吟期承素業再鼓餘勇復理舊文旅筆政之千人效鉛刀於一割敢圖精鑿不棄下材矧避旁親之嫌關付別頭之試紛然多士取者五人非夙荷於吹噓豈遽容於叨冒茲蓋伏遇某官中興基杖後學著龜斯文魯國之真儒此道商民之先覺每品題於人物用培植於邦基狂狷不違是亦教誨而已賤微兼取而況親炙者乎實有黃緣致此僥倖某敢不恪遵士檢篤守官常勉所不能鞭其不及龍門杳杳粗逃點額之羞天漢迢迢更假乘槎之便

答嚴公舉解元啟

精藍肄業曾同鑿壁之鐙浙部薦賢並中穿楊之箭君遽罹於大
故我濫預於末科究所從來咸自規磨之賜未遑馳謝敢圖贊喜
之先恭惟某官道先王之法言知古人之大體八吟魁眾昔知賈
誼之升堂六籍授徒今有閔騫之在寢華燧下逮賤跡有光言踰
布帛之溫文有丹青之炳三年素鞞雖少滯於方聞萬里青雲行
卽觀於軒翥

謝宮教啟

侯藩宰邑方虞美錦之傷宗苑橫經遂被絳紗之選已則知幸人
誰謂宜竊以絲玉牒於皇家宅金枝於朱邸顧豪傑特立之士固
亦眾矣然驕淫怙侈之習尚多有之大抵平居之時耽於耳目口
鼻之五餌故其臨事之際乖於禮義廉恥之四維必合族而立之
師故宿道而興於善周公輔政教庶子睦友之方顯宗蒞朝獎東
平樂善之語豈特增重犬牙之衛亦將馴致麟趾之風必得異才

始尸教職如某者碌碌餘子空空鄙夫早被訓於鯉庭旋摳衣於
虎胄濫叨世賞繼竊文科一昔不離親欣酬素志十年不得調固
所甘心俄得邑於銓曹偶接壤於親館蓋窮猿投林奚暇擇木然
餓麟不噬誰爲落毛豈期鑪冶之秋改畀範模之職退慙忝冒徒
切凌兢恭惟某官衡尺眾材著龜庶政忠純爲社稷之衛所守旣
堅篤欽行蠻貊之邦何傷之有共壯子卿之不屈旋聞季友之來
歸果膺黼展之知遂補衮衣之闕而某偶緣知獎獲遇甄收士以
知己不知己而爲屈伸於斯可見臣以所主所爲主而觀遠近幸
審所依惟謹官箴用酬恩紀

謝正字啟

鼇禁試言目眩黃金之闕麟臺庀職身遊羣玉之山拜綸綽之恩
輝知簪紳之榮遇用君才表感極涕零竊以讐書之難昔人所病
披往牒於千古寥廓之下證前謬於羣書紛錯之間以春秋之經
而尚著郭公之疑以尚書之訓而猶有武成之誤認烏爲烏必防

九寫之非真讀魯爲魚宜察三傳之漸謬是以策府東觀天祿石渠預官聯者謂之登瀛洲探書帙者比之遊藏室自非識窮元元本本文高怪怪奇則難使寄蒿目於木天寓蓬心於竹簡矧惟炎籙際中興之會清朝成蓋代之勳修德而來遠人貫革之射已息觀文而化天下稽古之事聿興乃模東壁之輝肇建西崑之府嘗命乘輿之駕屈臨館殿之嚴自顧無庸豈應濫吹如某者碌碌未有奇節斷斷初無他長西序編蒲久耕破硯東堂折桂粗繼青氈方甘墨綬之一同旋冒絳紗之清選遽纏悲於陟岵聊寄命於倚廬燧火再更喘息猶屬豈謂造朝之始兩叨出命之優曲臺俾預於討論芸閣復膺於召試禁鼓頻報給筆不停乾鼠之璞鬻周方慮有胡盧之笑不龜之方破越豈惟收泝澚之功濫申仙省之校讎更寵道山之編定拜恩稠疊揣分凌兢茲蓋伏遇某官吾道權衡眾材冰鑑謂某稍知翰墨俾博究於異書憐某久困泥塗特擢升於清貫卯翼已就敢忘陶冶之恩頂踵可摩誓竭糜捐之報

謝校書郎啟

正字麟臺已愧試言之寵校文金匱復叨因任之功仰鈞播之無垠奉綸言而非據撫躬知愧引脰知歸竊以道家蓬萊之山多存祕錄黑水崑崙之府亦聚古書自昔令王聿隆斯道石渠廣內藏室承明四部籤垂三閣鼎峙暴羽陵之簡時拂蠹魚披汲冢之書尚存科斗至於典校庀職尤爲統署要官以李端之博而猶多循習之儀以韋溫之敏而尚有阿私之誚楊子山忠誠蹇蹇始參白虎之儒元微之文彩翩翩方置紅蘭之署那容猥質濫廁英躔如某者么麼凡材會粹末伎豈識揚雄之奇字未得中郎之異書言豕渡河者三豈無舛誤書馬與尾而五第切兢持曾未效於絲毫愧已班於綸綍茲蓋伏遇某官股肱元聖斧藻大猷欲俊民之用章乃黎獻之時舉恐遺小善竄錄罔功致茲瑣尾之姿亦在吹揚之數某敢不激昂晚節銘鏤丹心聽鼠五伎而窮已羞往躅駕馬十駕亦及尚勉前修

又謝校書郎啟

濫讎奇字早充東觀之員擢校祕文忽預西都之選捧絲綸之甚
渥知埏埴之兼容循分起羞叨榮知感竊惟策府古謂書林遠哀
三皇五帝之書旁列諸子百家之說金匱玉函之要訣緇廬黃宅
之至言客卿拂說之辭章齊諧詭譎之辨論釐爲四部詎止五車
傑閣珍藏粲牙籤而有秩眾儒是正驚藜杖之分光上符東壁之
輝下應西崑之祕至如典校尤難具員自非大雅宏博之才豈預
當亡搜揚之選如某者天鍾冥戇地出單平黃絹古詞雖未閑於
矩矱青緇舊業恐有負於箕裘自充職於蓬山獲畱心於竹簡雖
僅勉銀根之謬亦豈無烏鳥之疑方懼曠瘵敢期哀陟茲蓋伏遇
某官斯文領袖吾道權衡董仲舒之選廷魁大掃賢良之習張燕
公之爲館主實參宰相之名博采材猷上裨器使黍每吹於寒谷
莪或育於中阿肆令孱庸猥被超擢某敢不永肩聖讀恪守官常
乘羊角之風已借吹噓之便依龍門之阪未知報稱之期

謝洪郎中啟

興祖

發揚潛德固宜人子之盡心未喪斯文正賴名賢而傳世啟綿表
而增感覩手澤以興悲痛惟先公奮自冷族鳳皇叶夢祥早發於
萱堂龍虎收科文屢魁於棘省拂說吐春葩之麗聯翩起夕秀之
奇同輩景服則筆至於欲燒後學競傳則紙聞於驟貴蓋殺青繕
寫者既不知其數則銀板畱傳者宜必有其人非遇碩儒曷成茲
事此蓋伏遇某官仁深錫類德厚鎮浮豈惟標榜於前賢蓋欲訓
迪於多士重惟所怙每篤有連傾蓋蚤年喜珪璋特達之美卜鄰
晚歲光草木臭味之同方語離於汎金已興嗟於埋玉猥蒙高誼
特眷遺編於鈴齋嘯諾之時命蓮幕紀綱之吏伐木鄰境惠工四
方雕鏤殆闕於一期讎校盡刊於三豕親著冠篇之序引曲記平
生之話言遠邇爭傳存沒俱耀仰惟恩施未易弭忘何遜之集初
成想文遙之能誦王規之筆再覩在方慶以何心惻楚於中敷宣
難盡

謝先人賜謚文康啟

爵以馭貴既登二品之崇謚以尊名更被兩言之寵藐孤祇命潛
志增輝仰惟標榜之公實有陶鎔之自感深而刻骨矣泣盡而血
繼之伏念先考早以英才寢躋膺仕雕龍擅價摛華國之文章佩
犢流恩布宜民之豈弟三科中青錢之選四郡興五袴之謠膺是
異名固非虛美白公掌制唐朝止著於文稱黔子辭封戰國僅加
於康號獲兼二懿實邁前芳而況神聖撫中興之朝賢傑運上公
之枋操勵世磨鈍之具提循名責實之綱固應實副其華豈俾名
浮於行茲蓋伏遇某官片言寤主一德格天以甚易而成天下之
甚難以至靖而息天下之至擾巨鼇鎮於海翻之後色石鍊於天
缺之時百六之運遂回千一之期立致自非體妙道於在己闡神
化以及民安危究消長之宜文武得弛張之術則何以又皇家如
反掌靜窮廬若發蒙至於禮務旌賢仁存錫類尤軫懷於平日欲
勸善於將來致是醇儒特膺表行恩綸告第詔墨揚幽善者怙焉

已修闔棺之賜逝者已矣應圖結草之酬

答宏詞周學士啟

摘文如披玉藻夙欽黃絹之工收科若摘頷髭載彼青錢之選士
歆稽古之力朝有得賢之榮恭惟宏詞學士性天高明材地敏給
泰初真禮樂之器長輿有梁棟之資奮鵬翼於俊秀之科英聲已
茂屈驥足於東南之尉清議未孚乃奏西掖之篇旋召南宮之試
攄游夏淵源之蘊發卿雲黼黻之詞伏讀可謂正音披翫誠爲孤
技食數千枚之雞跖固知殖學之多探八百里之牛心親見控弦
之效

代賀万俟中丞啟

伏審光膺中詔進長南司杜羣枉之門邦誣遁野職百辟之享眾
俊攢朝王綍誕頒吾黨交賀竊以今昔之所患在於賢否之不分
去佞有拔山之難棄德同轉圜之易欲股肱之戴上在耳目之得
人矧惟中司獨高三院以魏暮之德猶恐素於紀綱以薛宣之明

始不乖於黑白故茲除目必屬偉人恭惟某官庶政著龜百僚冠冕學海造真儒之蘊文鋒高哲匠之華中外踐更險夷無異擢冠七人之列有嘉一德之忠果膺弄印之除入奉專席之寵某流落江海逃違犀貫之顏咫尺門闌阻預龍門之客其爲慶忭難罄敘

陳

謝考功郎官啟

內祕讎書蚤玷麟臺之直中銓校績忽膺鳳詔之頒揣分奚堪叨榮增愧舞新恩而抃手銜厚賜以淪肌竊以粉闈之賢上應列宿青縑之直難使具員矧惟司績之聯實號審官之所於唐則嚴九等之目在漢則爲三公之曹然而第孝秀則分方郡之權掌貢監則紊秩宗之職未專統署稍屬叢拏肆熙朝特命於允釐故此部獨專於總覈計歲時之遠近究功罪之重輕不撓彝章始容增位儻非明允之士難膺選任之公如某者空空鄙夫碌碌餘子才乏囊錐之見文慙鞏悅之工蜩鳩第窘於小知瓶罌豈容於大受獨

以欣逢聖旦頓躡華資橫經而授宗支蒞禮而祠郊廟又使濫陪仙省徧閱九流一百三家豈謂榮遷顯曹俾察四善二十七最欲令增重於省戶且命攝承於掖垣自視缺然何以得此茲蓋伏遇某官道超二八運際半千迪一德以佐王闢至公而招俊若大雲之覆羣品如巨海之納眾流肆令孱庸亦預選擢某敢不修持義操沐浴恩波生也有涯永佩提攜之賜死而後已未知報稱之期

答張柟上舍啟

中宸奏議眾欽黃絹之工上舍揭名榮被青錢之選縉紳知重庠序增光伏惟某人學貫五車詞流三峽深思博究不離仲尼之三百五篇掇要知歸豈假靈恩之二十四卷果擅解頤之譽遂膺穿葉之榮九轉已成將啟靈丹之鼎一枝可折行攀仙桂之宮某廁跡行朝傾心名彥方圖咫尺之書以爲慶遽辱駢儷之文以見貽翔鳳皇於千仞之山固爭先覩享鷄鶩於九韶之奏豈所宜蒙謝葉偉上舍啟

曳裾見臨袖文爲賦鼓六璫於天下已欽寡和之音嘗一嚮於鼎
中可識至珍之味自慚涼薄猥辱眷知謂草木臭味之同忘珠璧
暗投之誚特形裕問仰識冲謙懷琢玉之歡知克勤於佔畢報泥
金之字行卽見於搏扶

答趙達狀元啟

伏審廷對無雙日掃三千之牘臚傳第一天開九萬之程嘉動嚴
宸聲騰薄海恭惟某官學窮聖域文挾天庭蜀郡才豪不數司馬
王褒之輩唐朝魁選未甘李程盧肇之先惟平時抱素蘊之有餘
故一旦當盛名而無歉某效官仙省較藝宸闈探驪龍之珠雖喜
窺於藻致抵金山之玉顧難辱於謙勤

答余松第三人啟

伏審給札奏篇臨軒唱第製高明水文居李觀之先題爛玉山名
處岑公之亞聲傳寰宇喜動帝闈恭惟某官學海淵深文鋒穎脫
已襲簪裳之寵尚偕韋布之游念三世文科不負爲裘之業而四

隨計吏果酬佔畢之勤想深結於睿知卽掀翔於清貫某效官仙
省較藝宸闈自愧菲才獲觀眾作驗威鳳於一羽粗諧鑒賞之公
享爰居以九韶深佩謙勤之眷

答特奏狀元昌先輩啟

射策龍墀榮魁羣彥升名雁塔特昇賢科謹誦臚句之傳歆豔布
衣之列伏惟某官文詞典麗學問深醇器蘊琳瑯夙擅東溪之秀
氣材收杞梓屢應南宮之薦員雖回翔偶跌於壯年然軒翥乃存
於今日某效官芸閣較藝楓宸嘗鼎鬻之珍已知雋永枉驪珠之
賜惟有襲藏感荷之深敷宣罔旣

侍郎葛公歸愚集卷十

歸愚集補遺

賀王提舉啟

伏審顯膺宸命擢領使權見材由厯試之艱被相居選除之重涓
辰視篆闔境傾心仰惟提舉判元氣清而和性明且敏抱璞玉渾
金之器挺碧梧翠竹之材智識遠照于物先風度迥高于塵表摛
紳歸重早有俊聲中外踐揚雅多成績計付久勞于婉畫固成其
將漕之功泥封丞拜于新除就畀以平糴之政豈特一封而乘傳
果馳駟馬以登車衣冠屬意以知歸民吏望風而相慶發藏天地
行上計于甘泉筵羽鵠鴻卽班聯于紫禁某叨承邑政屬隸使封
自憐疏晚之蹤復及依栖之幸同燕雀而賀大廈敢後飛書觀鸞
鳳而冲丹霄固將拭目五百家播芳
大金元德皇后忌辰道場疏

貝葉旁行存誠西竺琅函隱韻歸命叢霄輒憑二教之真筌仰助
一靈之飄馭元德皇后伏願力持法印永苾道林悟鷲嶺之上乘

作龜臺之仙伴佛土三千界親覲世尊玉京十二樓徧游仙境垂
永寰宇錫羨皇圖播芳大
章懷皇后忌辰道場疏全

俛天作合配媯汭以流芳濡露感時供緇黃而追福章懷皇后伏
願圓融根境領悟希夷聞佛音於玉毫之前受法錄於瓊章之上
法航大濟見慈氏於龍華羽駕超升友神人於姑射同

祖父忌辰齋僧疏

業鍾黑白各招果報之殊供及緇黃必獲超生之福仰憑二教追
渺一靈先公特進伏願頓悟上乘長棲道蔭法空五蘊譴罷三官
聞圓音於玉毫之前受祕錄於瓊章之上佛土三千界親禮世雄
玉京十二樓徧游仙境播芳大

祖母忌辰道場疏

朝夕寢門雖不迷事綢繆牖戶燕我後生適當屬續之辰深動降
霜之感敬依梵教延飯眾僧冀此妙因儻為冥助同

祖母忌辰道場疏

昔嘗逮事早纏風樹之悲尙憶分甘莫致水魚之養式逢諱日更
切哀誠爰集芻苢之僧躬設伊蒲之饌冀憑慈力仰助超升伏願
不昧本來承慈施同

又

瓜瓞有初簡在夫人之德風枝不靜實惟先君之恩爰屬諱辰式
追冥福共惟大覺證知同
薦先君設水陸疏

如來觀曠野之歌嘗懷悲濟之念慶喜見面然之士遂開極技之
科三檀之施既泊於廣筵十習之愆必消於幽趣先考特進遽辭
昭代奄畱小祥痛惟罔極之恩爰設無遮之會歸依薩婆若廣誦
脩多羅以伽陀之會而施苾芻多之倫以蘇摩之鐙而燭睽魔羅
之界恩霑有頂法被無邊庶仗薦嚴上資英爽先考特進伏願得
柔順忍具智證通罪垢消除如風中之沙聚性眞明悟若掌上之

菴摩以五根五力之殊因證三耶三菩之如覺上同

薦考君懺大藏經疏

如來四十九年慈每興於五濁大藏五千餘卷法備演於三乘惟

炎漢初譯於摩騰洎大唐廣翻於玄奘道宏震旦教接迦惟釐為

經律論之文大滅貪瞋癡之毒魔軍敗北信士指南皎如暗世之

鏡明濟若巨川之船棧某纏哀陟岵歸命世雄爰親閱於琅函若

面承於金口願憑利口式薦尊靈先考特進伏願絕邪見之稠林

離三有之窟宅蠲除業障報障煩惱障安住業根信根精進根觀

史天中速觀九廊之院安養國內坐臨七寶之池上同

薦考君懺寶積經疏

迦文千百億身雖玉毫之末觀寶積四十九會皆金口之所宣爰

歸命於竺墳肆親披於苔藓冥資法力亟拯幽塗先考待制伏願

斷有漏緣破無明闇滅障如風中沙聚見性如掌上菴摩觀如來

微笑之光滅多生習氣之重為尊為上為妙永依三耶菩提作舍

作救作歸即詣一生補處上同

薦考君懺華嚴經疏

香水海中塵塵盡為佛土摩竭國內句句皆演真乘能依菩薩之

國林坐觀華嚴之境界先考待制伏願被精進之甲冑拔生死之

游泥五根五力五覺支十行十往十迴向普皆證入頓致圓明悟

毗盧之法身不待寶金蓮綻受彌勒之祕記何須樓閣門開上同

薦考君著四大部經疏

竺乾遺教備演三乘寶藏疏文獨先四部爰肅迎於梵侶俾持誦

於真詮恭啟法筵別施僧次設桑門蒲塞之饌焚北岸旃檀之香

綜此殊休虔祈冥福先考待制伏願聞第一義□□□入不二

之路早登涅槃盤之□乘般若之船坐入華嚴之界上同

薦考君懺涅槃經疏

娑婆雙樹迦文顯示於泥洹拘尸大城師利親承於付屬雖金剛

之身豈虧於堅固然玉毫之相稍闕於光明宜憑最後之談用作

將來之眼先考待制伏願會無爲之舍斷有漏之緣苦諦集滅道
諦則無不證知常想我樂靜想則普皆證入百俱該劫常見無邊
之身一刹那門超生不動之國上同

薦先妣忌日親誦維摩楞伽金光明嚴明圓覺法華經疏

稱性宣揚義存貝葉悼先特誦福過河沙而況毗耶談不二之門
楞伽演百八之句百劫衆惡懺悔入金鼓之聲一解六亡縮疊契
華山之喻銷幻翳而顯本性之不動滅化城而知二乘之非貞是
皆法藏之祕文實亦如來之了義處宣梵庋用薦冥塗先妣魏國
夫人伏願絕邪見之稠林離三有之窟宅安養國內坐臨七寶之
池觀史天中速到九廊之院上同

薦妻懺親誦華嚴經疏

依輪圍十萬億刹實顯性宗訪知識一百十城俱談真諦欲追影
福爰效薰持亡妻安人樊氏伏願壞無明鉤破隨眠甲視幻境如
熱燄消業障如風沙莊嚴閣前彈指親聞於彌勒蘇摩國內按頂

常遇於文殊上同

大明祝文

惟神著明垂象實宗衆陽光耀廣輪功烜庶物今成臘屆候百穀
順成上憲伊耆禮有常報播芳大全八十三

神農氏祝文

惟帝神龍感孕瑞火名官斲揉之功垂憲億代今歲將道盡聚物
蒙饗其敢乏先農之祀上同

后稷氏祝文

惟神帝武赫靈覃訏稟質教民粒食民以弗飢月臨嘉平土反其
宅司穡之祀敢效吉蠲上同

歲星祝文

惟神著象圓清騰光下土安靜中度爲時之祥赤皇而沈農扈告
稔國有儲峙繫神之休上同
祭莫彥濟文

鳴呼枯槁三百聊當傾三峽之辨金釵十二不假醉琴瑟之濱濯
月溪之清泚恐西塵之汙人勇挂冠於神武及強仕之青春悟歲
華之電掣凜風雨而雞晨數雖登于大臺官僅綴于朝紳忽蛻骨
而仙去賢竟厄于巳辰嗚呼哀哉惟操修之內美攬蘭茝以自紉
見古人于黃卷擁估畢而微呻忽棄置于糟粕思獨味于玄津既
資深而逢原遂奔逸而絕塵尙復牽于氣習猶吐故而納新鍊華
池以漱液滄丹田以存真戲五禽于衽席養不死之谷神謂當出
綠髓而三洗齋壽量于莊椿豈期窘一杯之土而岌蒼石之麒麟
也嗚呼哀哉惟我公之先世通曾門之外姻公棟宇于雪水我田
園於江濱情雖篤于中外地若隔于胡秦欲見公而不可結肝膽
以輪困泊歲逢于作噩動妖祲于蒼旻紛蛇豕之踐蹂鳴清蹕以
東巡乃攜孥而避地因卜築以依仁望門牆而咫尺航一葦于大
淪破雲程于□溜舞清風于白蘋每登門而侍坐辱誨藥之諄諄
別音徽之幾何驚駛景于羲輪忽計音之在耳愴心膺以酸辛款

總帷而一慟落老淚以沾巾雖伯道之無兒知德音之不泯有令
孫之踴躍與九死之爲鄰始墨面而重研走羣山之嶙峋詢眠牛
之吉兆得佳城于荆榛意公後之必大蔚曾玄之洗洗□何憾于
卽世其永安于窳窳會靈輻之啟行藹愁露于松筠病莫偕于執
紼恐哀情之莫伸致肴蒸而蘭藉酌桂酒之清醇聊作文以侑奠
致楚語于靈均播芳大全九十六

祭沈孟明兵曹文

嗚呼孟明白璧無瑕席上珍兮天球不琢璞以真兮疊疊黃卷味
玄津兮發而爲文錦繡新兮收若捨趨先秀民兮三官連茹萃一
身兮謂當騰趕起渭莘兮如何弗弔厄巳辰兮胸中之奇百不伸
兮嗚呼哀哉惟歲作噩始依仁兮觴酒豆肉迭主賓兮東阡北陌
蹋芳塵兮握手笑榮忘夕晨兮金溪十年又卜鄰兮肯紆華閣合
晉秦兮旣婚且交情益親兮公方病痲殞天倫兮人言公友疾日
臻兮竟坐傷靈殲若人兮嗚呼哀哉妙喜之原宰木春兮將啟泉

臺岌石麟兮有肴伊嘉有酒醇兮呼公不聞泪沾巾兮尚饗同

祭侍郎鄒公文

嗚呼公之處世五十二年以身徇國老而彌堅公議所與孰如公
賢歎公之歿誰則不然公之孝友鄉黨所師移以事君無毫髮欺
國是所繫天子所知胡不少延捨我聖時如公德業可遠可久夷
險皆行過涉亡咎俯仰不忤摧殞何疚死而不忘孰曰非壽公切
志道如坎之流弗舍晝夜至海而休生也有涯數盡莫留壽歿不
貳亦又何求身如虛船觸礙而止動而時行時則可矣載沈載浮
虛也足恃冀或維之終不獲試方其疾革粥藥并廢十日不食清
坐飲水未報君親賚志長逝臨絕之言恨此而已神賚之舟不與
之年窮達修短孰能違天我病且老自作苦緣公乃何為棄我而
先人亦有言既明且哲我危其身駟不及舌吾語在世何身必留
屏迹待盡將與公游尚饗同

祭亡妻大祥文

嗚呼伉儷之愛頓隔泉壤日月逝矣俄及大祥徹几中堂遷神家
廟聊陳薄奠式燕芳魂號呼不聞有泪如雨嗚呼哀哉播芳大全

祭外舅樊寺丞文

嗚呼宣和山陽公始女女不余陋庸甥館見處浹旬別公侍親臨
安有燭其旆公來自楚欲視其息不憚羈旅公官蓬池我舟擊渚
公為歡迎倒蹠延竝闊展杯盤缺不知幾字踵門長號第見縞帷嗚呼
哀哉今者遠日告吉墨食令龜屬茲匏繫又不得臨壙而伸其悲
酒脯之奠遣介致之東望腸絕順涕交揮嗚呼哀哉尚饗同

祭潘賢妃文

惟靈婉孌淵令淑謹慈和誕發蘭儀刑我宮掖春秋鼎盛娥闕瑤
光命之弗融靈傷情素今靈輶慘口霧旒啟途軫痛椒風口纏薤
露寓哀祖饋遺案致儀尚歆寵私安此窀穸嗚呼尚饗播芳大全
祭史丞相母夫人文
惟靈懿範藹乎閭里慶紀緝乎閨門早占夢燕之祥是□□□□

傑踐公槐而擁帥鉞綵服娛親覽帝畿而還家園板輿佚老固一時之罕並實五福之兼全嗟弗弔於上穹歎莫留於長謝某□□自昔守職于茲顧靡逮於升堂敢薄陳於奠尊上同跋臨右軍書

逸少墨蹟如優曇鉢華近世罕見雖古人嚮搨亦乏善本蓋臨書不在於點畫排比之工而在于得筆意脫或昧乎此譬如垂絕人神氣都喪形體雖具奚爲也此本得之于許昌侍其氏其家襲藏無慮百餘年□□□舊物無疑觀其筆跡適潤緊快分明凜凜有生氣若不出乎右軍之手決非趙模韓道政等所爲非虞永興則褚河南筆也深于書者當自知之昔人論宋文帝書謂功夫不及羊欣而天然過之臨書而得天然意必知爲名筆播芳大全一百十一

跋李之儀端叔尺牘

端叔尺牘好事者多喜藏弄如人嗜昌歎羊棗未易詰其所以然豈非韓門籍湜之徒固取重于世邪同上

講易堂記

文學政事吾夫子異其科雖由求游夏不得兼也且事莫移于官學莫遂于易游刃叢劇之地瘠咀奧蹟之境能于一時相兼而不能相廢者夏夏乎難哉福唐陳公逢掖時已覃思潔靜精微之教旣筮仕靡勞弗宣聲大彰白屬擢二千石若部刺史皆名能官天子知之朝廷夙夜之賢知之御付衆大之區而牧焉宜也人之言曰臨安千邑鈺筩調詞不知其幾何狴扉鞠域揣髮關械者不知其幾何庾幣金粟衍耗出納不知其幾何簿書會期不知其幾何而公以一身任之無巨細畢濟其必有一其源者余嘗讀三墳之書曰太始之數一曰太極極者天地之母也天高地博其數則二謂之太易天地之變也又嘗讀乾鑿度之書曰易變而爲一一變爲七七變爲九者氣變之究乃復變而爲一二書所言或自一一而出變或自變而歸一易之道無餘蘊矣脫能執其甚約以攝至煩無惑乎應酬之不匱也意公之所得有在于斯乎下車踰一時教

令所孚民大協和比屋至無吠犬政成矣乃于府治之東爲講易
堂延龍舒易經師王虛中居之帥子弟從焉蓋欲窮其所未盡也
虛中嘗著易論四十篇準繫解易二十四卷大率專以古易正文
爲主異衆人之同而味衆人所不味鉤深致遠自得于心又豈如
前屋下架屋之比哉先治春秋學爲四傳辨失左氏正鑑紹興初
嘗抱其書質于先人文康公文康深許之濡削遺之曰遠類康成
發公羊之墨守下卑元凱爲左氏之忠臣今又得賢主人相依倚
以緝熙三聖之傳相輝相扶迭爲炳蔚吾知此學之未墜也陳公
字晦叔名輝虛中名曰休云

咸淳臨安志五十二

韻語陽秋序

懶真子既上宜春之印歸休於吳興汎金溪上我先人之敝廬歸
愚識夷塗游宦泯捷徑湛然胸次不挂一絲而多生習氣尙牽蠹
簡雖不能如毛萇鄭康成泥蟲魚之注又不能如虞卿李德裕著
窮愁之書未諳王氏之青箱懶問董生之朱墨獨喜讀古今人韻

語披味紬繹每畢景忘倦凡詩人句義當否若論人物行事高下
是非輒私斷臆處而歸之正若背理傷道者皆爲說以示勸戒書
成號韻語陽秋昔晉人褚裒爲皮裏陽秋言口絕臧否而心存涇
渭余之爲是也其深愧於斯人哉若孫盛檀道鸞鄧粲各有晉陽
秋是皆不畏人禍天刑率意而作如昌黎公所云者也余也非唯
不敢亦不暇隆興甲申中元丹陽葛立方書

贈友人莫之用

抱犬高眠已云足更得牛衣有餘煥起來敗絮擁懸鶉誰羨龍髯
織冰縠蹋翻菜園底用羊從他春雷吼枯腸擊鐘烹鼎莫渠愛小
笔自許猴葵香半世飢寒孔移帶鼠米占來身漸泰吉雲神馬日
而三樗蒲肯作猪奴態虎頭食肉何足誇陰德由來報宜奢丹竈
功成無躍兔玉函方祕緣青蛇

韻語陽秋三

詠春申君二首

朱英若在強黃歇黃歇如何弱李園一旦棘門奇禍作自詒伊戚

向誰論

先秦豈謂羸為呂東晉那知馬作牛不悟春申亦如許敢憑宮掖
妻邪謀韻語陽秋七

二老堂

去家纔隔水一股二老堂成三百弓鶴原暮下沙水暖雁行夜落
霜天空竹根酌酒不妨醉花萼斷詩如許工坐久興闌筇竹杖出
門人指兩仙翁韻語陽秋十

喜子郊登第

吾家五世十三人競擢丹枝撼月輪慶曆賢科開後裔隆興儒業
繼前塵泥金帖報家庭喜燒尾筵開帝里春從此傳芳應未艾桂
香早已襲天倫韻語陽秋十二

喜子郊登第

張鈴走幟到金谿喜子文闡預品題名字巍峩先藥榜詞章斐亶
動文魁階梯已合嬰兒夢星斗先分天老題後日臚傳當第一天

倫科甲尚為低同上

余居吳興汎金溪上暇日率同志拏小舟載魚鼈蝦鱉命五比邱
誦寶勝佛名若十二因緣法作梵唄捨之溪中坐中有請作詩
以紀事者余輒為書云

漁師竟日漁水族作斤賣小捐使鬼兄滿載獲鱗介鯤鯨未易羅
所得亦殊態青蛙盡公私朱鮪兼小大霜鱸尚貫鉞土負或黏塊
輪困積文螺郭索走蒼蠅溼沫相响濡自分煮薑芥豈知惻隱人
規作江湖貸因呼小青翰收畱舞澎湃坐延黑衣號佛指清瀨
經飛流水篇流水長者事見金光明經梵起魚山唄傾盆帶寒藻圍圍看于邁
驚疑或依蒲喜躍或生喝快若鷹辭鞫歡如囚破械定非校人池
恐是餘不派願汝藉佛力永脫鉤網債口腹聊爾耳香餌莫渠愛

韻語陽秋十二

瓢蓋亭

我不學許由隱煙霧得瓢不飲惟桂樹又不學德義居虎邱帶瓢

入市多騎牛分無玉甌囊古錦病渴文園只瓢飲下瞰金溪新結
亭未須引吸如長鯨但願金溪化為酒歲歲持瓢醉花柳韻語陽

歸愚集補遺

葛立方傳

繆荃孫

葛立方字常之江陰人中興館閣錄勝仲子書錄紹興八年吳興志黃公

度榜同進士出身治書紹興十七年六月除正字閣錄五月紹興

八年六月賢妃潘氏軼祭文正字葛立方撰十一月一日臣僚言

欲乞遇上辛日祀感生帝并依本朝舊制大祀樂章報祀書省修

撰有旨從之降神大安之十九年六月除校書郎閣錄五月紹興

九年十一月一日恭和御製郊祀喜晴詩校書郎葛立方一首興

進郊祀大禮慶成詩校書郎葛立方一首口蜡祭百神東蜡大明

正位帝神農氏配后稷氏配歲星以二十一年六月為考功員外

郎館閣錄以吏部侍郎攝西掖忤秦相得罪更化召用書錄解題

興二年十一月六月為考功員外郎秦檜以二十五年七月薨二十

六年閏十月以尚書左司郎中充賀大金生辰使其得罪秦相及

召用當在二十六年閏十月為尚書左司郎中充賀大金生辰使

繫年要錄一言者又以為附會沈該罷去遂不復起書錄歸休於

吳興汎金溪上韻語陽暇日率同志拏小舟載魚鼈蝦蟹命比邱

誦法作梵唄捨之溪中立方博極羣書以文章名一世暇日嘗著

韻語陽秋沈恂韻語二十卷提要四庫歸愚集二十卷外判五卷西


疇筆畊五十卷方輿別志二十卷

江陰志

子邨邨宋史傳

右歸愚集十卷宋葛立方撰立方字常之江陰人紹興八年進士官至尚書左司郎中宋史於葛宮傳附見名字事蹟不詳常之世席華廡置身館閣文筆爾雅爲世所推初以忤秦檜得罪後又爲言者所劾遂不復出志趣亦頗高江陰志稱其著歸愚集二十卷韻語陽秋二十卷外判五卷西疇筆畊五十卷方輿別志二十卷今惟歸愚集韻語陽秋二書尚存然歸愚集本二十卷今所存十卷據宋本止存九卷第四卷第五卷第六卷第七卷均律詩第九卷賦騷銘文第十卷第十一卷均外制第十三卷表啟後人另以詞一卷屬入作爲十卷四庫簡目錄有此書而總目則無之當時不收恐是館臣誤遺未必以殘缺見棄觀馮太師集三十卷止贖前十二卷而亦收入可以執此例彼傳鈔改爲自一至十若爲完善而不知其編次不合門類亦不全不能掩也茲據翰林院底本及勞季言校宋本校定上板又輯播芳大全臨安志韻語陽秋爲補遺一卷附益之光緒丙申五月武進盛宣懷跋

Blank manuscript page with vertical lines.



大正

恒

齋

司

曹
恒
齋

又 滿江紅 和呂居仁酬芮國瑞提刑

又 水調歌頭 送唯齋之官回舟松江賦

又 舟回平望久之過烏戍值雨少憩向晚復晴再用前韻賦

又 滿庭芳 宴黃仲秉鎮江守

述懷

又 又

念奴嬌 和人

又 又

又 再和詠柱巷高君忻聚畫屏

玉蝴蝶 和維揚昆侍郎寄強伯

蘭陵王 和吳宣卿

光緒丁酉武進盛氏思惠齋刊陽湖吳文郁江寧馬長儒江陰繆九疇全校

信齋詞

江陰葛郊謙問

朝中措

送蔡定夫

雙鞬錦領出山西戎幕護旌旗橫掣春風百詠臨淮夜月千卮
風流尊俎瓊花破豔紅藥攢枝賞盡竹西歌吹珠簾十里香迷
柳梢青 和人

謝家池閣翠桁香濃瑣窗紗薄夜雨鐙前秋風筆下與誰同樂

主人許我清狂奈酒量從來最弱顛倒冠巾淋漓衣袂醒時方覺

又

空中雨閣一段輕陰翠鋪林薄橋內仙翁棋邊公子共成清樂

主人有井投車看度上雲輕柳弱斗轉簷頭雞鳴窗外無人知覺

鷓鴣天

詠野梅

千樹家園鎖舊津誰移數點在孤村海仙採藥禽畱影楚客穿花
蝶舞魂 橋斷港水橫門殘霞零落晚煙昏只因畱住三更月暗
裏香來別是春

又
萬木家園霧暗津不須踴影下前村須知茗雪水雲窟自有羅浮
冰雪魂橫水館倚山門參旗有約共黃昏此中有句無人見誰
在尊前領略春

感皇恩

風雨半摧殘一園花老綠徧池塘夜來草看花何處莫被此花相
惱世間多少事邯鄲道憑遠下臨暗塵飛繞數點煙中水村小
斜陽且住爲我花閒畱照從教紅滿地何須埽

又

花似鏡中人不堪衰老空羨青青岸邊草多情消瘦更被無情相
惱近來無限事憑誰道蝴蝶滿園叢邊空繞睡起流鶯語聲小
瑣窗危坐□□玉蟾孤照夜闌梅影瘦憑誰埽

江城子

亭亭鶴羽戲芝田看羣仙起清漣綠蓋紅幢千乘去朝天畱得瑤

姬清夜舞人與月鬪嬋娟凭闌有恨不堪言情誰傳曲聲圓寫
盡清愁香弄晚風妍不羨山頭窺玉井花十丈藕如船

又

鄰鄰白水護青田想真仙弄清漣十里香風吹下碧雲天月在草
堂人未寢松竹暗水娟娟夜闌何事悄無言怨空傳事難圓欲
借寒光誰與伴清妍待得凌波人肯住呼玉笛勸金船

洞仙歌

壬辰六月十二日納涼

瓊樓十二無限神仙侶紫紱丹麾彩鸞馭步虛聲杳靄碧落天高
微雲淡點破瑤階白露暗香來水閣冰簟紗廚一枕風輕自無
暑更上水晶簾斗挂闌干銀河淺天孫將渡終不如歸去在茗川

看千頃菰蒲亂鳴秋雨

又

十三夜再賞月用前韻

藐姑仙子天外誰爲侶八極浮游氣爲馭看朝餐沆瀣暮飲醍醐
瑤臺冷吹落九天風露翠空雲幕淨寶鑑無塵碧樹秋來暗消

暑殘夜水明樓影落寒溪行人起沙頭喚渡任角聲吹落小梅花
夢不到漁翁一蓑煙雨

又
風搖丹□葉翦西巖揭歲律崢嶸又如許看千峰倒影浮動觥船
紗窗外萬幅鮫綃鬪舞 五絃彈不盡碧落天高隱隱孤鴻向雲
度送斜紅斂盡催上蟾鉤金風細點破瑤階白露任笛聲吹濺一
簾秋看人□□闌暮雲高處案此詞揭字不可解疑誤

又
櫓聲伊軋影轉雲閒樹試問扁舟在何許正溪堂波動沙渚蘋輕
漁翁醉隔岸蓑衣對舞 歸來無一事尊酒相逢莫把光陰更虛
度看歌雲杳靄香霧輕盈銀河轉笑浥芙蓉曉露縱西風黃葉滿
庭秋也不礙凝眸亂山多處

又
丹青明滅霜著誰家樹滿眼風光向誰許送寒鴉萬點流水孤村

歸來晚月影三人夜舞 金英秋已老蠟綴寒葩空裏時聞暗香
度任一枝瓶小數點釵寒任人笑□盡牀頭玉露著窗紗紅日上
三竿把蜨影捎空在花□處

滿江紅

和呂居仁酬芮國瑞提刑

家住茗西小池映青山一曲翠深裏猿呼鶴應短牆低屋麥影離
離翻翠浪泉聲泔泔敲寒玉怪夜來有蟻出糟牀笏新綠 和月
種南陽菊饒雲買淇園竹任蠻爭觸戰世閒榮辱兩目未消憑遠
恨一筇費盡登山足便棹舟炊火荻花中鱸魚熟

又

卷盡珠簾楚天迴闌干幾曲最好是瑤臺歸路月翻銀屋深院數
枰風入座高樓一噴雲橫玉看橘林霜淺未全黃猶懸綠 悠然
意淵明菊真如指國師竹道是非識破都無榮辱不管浮生如蜨
夢從教萬事添蛇足坐西崑一笑八千秋蟠桃熟

又

郢客高歌猶未覩陽春一曲多應是連城有價閱藏華屋但使章
臺無異意何妨一見邯鄲玉料錦囊隨客汎東溪凌波綠 難獨
唱籬邊菊誰伴詠階前竹想秋光不久又成虛辱過雁不知蛩有
恨行夔應笑虻無足願爲予落筆走盤珠爭圓熟

水調歌頭

送唯齋之官回舟松江賦

年來慣行役楚尾又吳頭餐霞吸露何事佳處輒遲留雲聽漁舟
夜唱花落牧童橫笛占盡五湖秋胡牀興不淺人在庾公樓 繡
簾卷曲闌暝翠鬢愁森羅萬象與渠詩裏一時收天設四橋風月
地會三州山水邀我伴浮鷗明朝起歸夢一枕過蘋洲

又舟回平望久之過烏戍值雨少憩向晚復晴再用前韻賦

帆腹飽天際樹髮渺雲頭翠光千頃爲誰來去爲誰留疑是吳宮
西子淡掃修眉一抹妝罷玉匳秋中流送行客卻立望層樓 風
色變隄草亂浪花愁跳珠翻墨轟雷掣電幾時收應是陽侯薄相
催我胸中錦繡清唱和鳴鷗殘霞似相貸一縷媚汀洲

又

青銅昏水面烏帽裏山頭風濤如此天公作意巧相留常記垂虹
晚渡臥看菰蒲煙雨屈指十三秋恍若華胥夢無語下西樓 翠
翻空寒入座不禁愁五絃彈盡隱隱天末暮虹收欲伴漁翁釣艇
欸乃一聲江上寒碧點輕鷗無人阻歸興直欲邁長洲

滿庭芳

復黃仲秉鎮江守

紅葉飛時青山缺處 橫秋影斜陽鳳凰旌節何事到吾鄉要見
大江東去寒光靜水與天長人爭看恩袍煥錦新惹御鑪香 滿
城誇盛事兩邦鼓吹幾部笙簧看萬紅千翠簇擁雲裳況是重陽
近也萸露紫菊吐輕黃休辭醉明朝一枕歌韻尙悠揚

又述懷

歸去來兮茗波深處上有蒼翠千峰月橋煙墅家在五湖東試覓
桃花流水雞犬靜人跡纔通沙汀晚一天雲錦飛下水晶宮 兩
年官事少江梅霧暗多稼雲豐把毗壇清夢盡入詩筒只欠蘆花

夜宿金溪上一葦秋風蓑衣在不辭重整來作釣魚翁

又
歸去來兮家林不遠夢魂飛繞煙峰洞房花木只在小池東誰道
雲深無路小橋外一徑相通功名小從教羣蟻塵戰大槐宮故
人書夜到秫田百畝已兆年豐把烏程爛醉不數郵筒醉後村歌
社舞團樂坐一笑春風洪崖伴定驅鸞鶴時一訪衰翁

又
歸去來兮心空無物亂山不鬪眉峰夜禪久坐窗曉日生東已絕
乘槎妄想滄溪迴不與河通維摩室從教花雨□舞下天宮何
人開宴豆楚羹尊嫩吳鱸盤豐看一聲欵乃落日收筒應笑紅塵
陌上津亭暮十里斜風從今去青鞋黃帽分付紫髯翁

念奴嬌

和人

馮夷微怒被鮫人水府織成綃縠何處飛來雙白鷺點破一溪寒
玉岸柳煙迷海棠酒困贏得春眠足凭闌搔首爲誰消遣愁目

遙想居士牀頭竹渠新雨潤甕中春醪不惜千鍾爲客壽倒臥南
山新綠晚月催歸春風畱住費盡紗籠燭恍疑仙洞夢游天桂林

屋

又

陽關西路看垂楊客舍嫩浮波縠寶馬嘶風人漸遠隱隱歌聲戛
玉鬪徧春山歸來高臥笑濯滄浪足孤鴻天際斷霞搖曳心目
香露飛入壺中仙家九醞釀百花醞醱一朵巫陽休悵望且看家
山眉綠歌罷風生舞餘花顛鳳髓飄紅燭瑤臺月冷夜歸斗挂銀

屋

又

年來衰嬾漸無心賞徧目前佳趣寂寂牆陰春薺老不到先生鼎
俎詩卷尋醫禪林結局酒入昏田務山頭雲氣爲誰來往朝暮
猶有筇杖多情捫蘿蹋石墮半巖花雨更向葭叢搖短艇驚起飛
鴻煙渚橫玉淒清焦桐古淡一笑忘千慮更聞人靜此聲今在何

處
又再和詠柱菴高君忻聚畫屏

蓬萊一島臥長煙千柳兩溪幽趣首藉盤中初日上不把裁臚充
俎和月栽松饒雲買石只此爲家務倚楹清嘯斷霞斜倚天暮
聞道塊磊澆胸槎枒肝肺動筆端風雨壁上瀟湘秋一幅影落荻
花洲渚暗浦潮生寒磯雪漲無復□塵慮此時漁父短蓑合在何
處

玉蝴蝶

和維揚晁侍郎寄強伯

憶昨茗溪慣弄五亭月笛四水煙蓑何事毗檀門外馬駐長坡野
花中亂紅杳靄小橋外疊翠嵯峨且顏酡但□長袖舞到婆娑
云何主盟惠政春行五馬月皎千波贏得賓僚聽隔牆無事高歌
帳煙寒瑞麟影墮簾霧細寶鴨香多試蹉跎一枰落日又送樵柯

蘭陵王

和吳宣卿

亂煙簇簾外青山漸肅蓮房靜荷蓋半殘欲放清漣媚溪綠憑高
送遠目飛起滄洲雁鶩寒窗靜茶椀未深一枕胡牀晝眠足閒
行問松菊□今雨誰家空對銀燭簫聲忽下瑤臺曲看鶴舞風動
烏唳雲起何須舟內怨女哭抱琴寫幽獨情觸會相續況節近
中元月浪翻屋長鯨愁曉寒蟬促要百柁傾□萬花流玉山肴倒
盡又空腹餽野藪

信齋詞

蘇軾念奴嬌 赤壁懷古 故壘三吳，曼江通海，

風帆浪卷，亂山雲樹，西望滄海。潮打三更，

潮聲似卷千堆雪。江山如畫，一時多少，

風流人物。遙想當年，小舟輕棹，飄然曾

遊冶。而今安在哉。水猶清，山猶在，不見

當年，故壘三吳，曼江通海，風帆浪卷，亂山

雲樹，西望滄海。潮打三更，潮聲似卷千堆

雪。江山如畫，一時多少，風流人物。遙想當

年，小舟輕棹，飄然曾遊冶。而今安在哉。

水猶清，山猶在，不見當年，故壘三吳，曼江

通海，風帆浪卷，亂山雲樹，西望滄海。潮打

三更，潮聲似卷千堆雪。江山如畫，一時多

少，風流人物。遙想當年，小舟輕棹，飄然曾

遊冶。而今安在哉。水猶清，山猶在，不見

當年，故壘三吳，曼江通海，風帆浪卷，亂山

雲樹，西望滄海。潮打三更，潮聲似卷千堆

